

DE
**MORBIS BILIOSIS
ANOMALIS,**

OCCASIONE EPIDEMIÆ,
CUIUS HISTORIA PRÆMISSA EST,

AB ANNO 1776—1780 IN COMITATU TECKLENBUR-
GENSI OBSERVATIS.

Accedit
DUORUM INFANTUM MORTIS CAUSA
PER
ANATOMEN DETECTA.

AUCTORE
LEON. LUDOV. FINKE M. D.
ATQUE
COMITATUS TECKLENBURGENSIS PHYSIC.



Monasterii Westphalorum
SUMTIBUS PHILIPPI HENR. PERRENON
MDCCLXXX.

*Non est fateri , rerum natura , largius
mala, an remedia genuerit.*

Plinii Hist. natur. Libr. 8.

VIRO ILLUSTRISSIMO

ATQUE

EXCELLENTISSIMO

DOMINO

CAROLO ABRAHAMO.

L. B. de ZEDLITZ

AUGUSTISSIMI & POTENTISSIMI

BORUSSORUM REGIS

ADMINISTRO

STATUS ET IUSTITIÆ INTIMO,

RERUM ECCLESIASTICARUM ATQUE CONSISTORII

REGII

PRÆSIDI PRIMO,

REGIARUM ACADEMIARUM
CURATORI SUPREMO,
BIBLIOTHECÆ REGIÆ REGIQUE ANTIQUI-
TATUM

NUMISMATUM CET. ARMARII
DIRECTORI EMINENTISSIMO

rel. rel.

DOMINO ATQUE FAUTORI SUO

longe gratiosissimo

S. D. P.

LEON. LUDOV. FINKE.



Quem nomini TUO splendidissimo atque Musis dilectissimo inscribere gratiose permisisti libellum, VIR ILLUSTRISIME atque EXCELLENTISIME! serius equidem, quam par est, manibus TUIS nunc supplex offero; spero autem confidoque, me eius moræ benignam abs te veniam vel eo nomine impetraturum esse, quod, ut alias taceam rationes, necessarium esse duxi, longius temporis spatium in hocce qualicunque opusculo consumere, ne istud nimis tenue

*Et exiguum, atque adeo nitido Nominis
TUI splendore plane indignum iudicare-
tur.*

*Quod si qua vero vel levissima in par-
te, Mæcenæ indulgentissime ! qui Et ipse
omni eruditionis genere admirandum in
modum excultus es, Et faventibus Magni
atque sapientis FRIDERICI auspiciis
laudabiliter in id tota mente omnique ani-
mi impetu incumbis, ut artium discipli-
narumque studia magis magisque vigeant
atque florent, paulo supra tyronis modu-
lum*

*lum sapere videar: TIBI persuadeas, non
in eum, qui muniis plane impar sit, Pro-
fessionem Medicam in Academia Lingen-
si, esse collatam.*

*Accipe igitur, optime & maxime
Fautor! serena fronte, ac ea, qua soles,
benevolentia, hoc quantulumcunque opus-
culum tanquam non fucatum gratissimi in
TE atque officiosissimi animi indicium,
atque publicum quoddam argumentum;
neque, obsecro TE, plurimum valenti
TUA benevolentia, favore, gratia me
pro-*

prosequi & dignari in posterum desine.

*Supremus rerum omnium Moderator TI-
BI, VIR ILLUSTRISIME atque EX-
CELLENTISIME! nestoreos largiatur
annos, TEque in commodum atque salu-
tem reipublicæ, Ecclesiæ, orbis litterati
salvum atque incolumem servet quam
diutissime.*

Scribebam Tecklenburgi mense Julii

CICIDCCCLXXX.



AD LECTOREM.

Si, quid ad editionem harum observationum medicarum me impulerit, comperire aveas, AMICE LECTOR! hoc adhortationibus doctorum virorum atque amicorum unice factum esse, scias.

Nam cum nulla in parte homines magis viderem cœcutientes, quam si de propriis cogitationibus iudicium rectum ferre satagunt, siquidem vel supra dignitatem eas evehant hi, vel infra modum deprimunt alii, amore timoreve capti, ut recte hinc olim philautiæ ponendorum cancellorum iustus arbiter *Teventius* pronunciaverit: *ita natura hominum comparata est omnium, aliena ut melius videant ac diiudicent quam propria*: iam dudum apud me statui; iudicium super cogitatis meis penes illos collocare, qui litterarum secreta callent, & non alio quam veritatis amore tenentur.

Hac motus, antea doctorum virorum & in arte Machaonia versatissimorum sententias super præsentibus paginis, ne crudam atque indigestam molem L. B. traderem, colligere e re esse putavi. ...
Preci-

Precibus meis hinc adiū Viros Illustres atque in Medicina vere antesignanos, *Leidenfrostium*, *Baldingerum*, *Metzgerum*, in quibus an benevolentiam magis, quam doctrinæ amplitudinem admirer, nescio, qui has meas animadversiones dignis æstimarunt, ut cum orbe literato communicarentur.

Ad manus mihi sunt horum celeberrimorum virorum amicitia atque benevolentia plenæ epistolæ, in quibus nudæ huic descriptioni epidemiæ Tecklenburgensis, cum ornato dicendi scribendique genere parum polleam, adstipulationem benevolam, quod grato animo recordor, præbere haud dubitaverunt.

Facultatem mihi dedit Ill. *Baldingerus*, epistolæ responsoariæ typis mandandæ atque huic loco inferendæ. Sed vereor sane, ne ita facturus, laudum mearum præco videar magis esse, quam ut assensum eruditissimi viri ostendam.

Factum est inde, ut huius epistolæ, cui avare pretium statui, finem, ne de sententia doctissimi viri apud lectorem dubium restet, hic tradere tantum non erubescam.

Gratulor Tibi, hæc sunt verba Cel. viri, ex animo doctorum virorum applausum, sed magis gratulor Tibi emolumentum artis nostræ, quod auges sane libro Tuo edito, quem medicis practicis omnino utilissimum fore, censeo.

Permittat etiam Vir Illustris atque laude mea maior Cel. *Leidenfrostius*, ad quem partem libri
per-

perlustrandi causa, itidem dederam, ut literas suas, humanissime ad me scriptas, ex parte earum aliqua, tanquam testes veritatis, quia *magni* huius *viri* arbitrium atque existimatio apud lectorem haud parum valebit, adducam.

Obtuleras, inquit Cel. Leidenfrostius, facultatem notandi, si quæ deprehenderem, in quibus ad iustum veritatis æquilibrium aliquid deficere videri posset. Eamque mihi sumsissem libertatem, si quid offendssem, vel minima notula dignum. Remitto igitur exemplar absque mutatione &c.

Auctoritate tantorum virorum fretus, quid in hoc scripturæ genere ingenium meum possit, experiri decrevi: neque mihi nunc locus est cogitandi, has paginas, omni quidem elegantia Attica destitutas, sub quotidiano tamen usu enatas, dum iam inde ab aliquot annis hoc saxum volvam, nulla in parte apud lectorem hæsituras esse; præsertim cum ad enarrationem morbi nemo magis possit esse idoneus, quam qui, dummodo in observando non plane hebes sit, quotidie inter ægros versatur.

Non equidem inanis me tenet arrogantia, in observando eam me acquisivisse ingenii solertiam, quam in medico speculatore oppido necessariam esse, depredicavere Ill. viri *Zimmermannus* atque *Habnius*. Attamen viam illam semper tenui, quam sana, tranquilla, modesta ratio, usu & periculis subacta, experientiæ & historiarum luce collustrata, mihi monstravit. Inter observandum disper-

disperfas atque disjectas partes veritatis collegi; in
collectis convenientiam quandam deprehendi; prop-
ter convenientiam, morborum bilioforum familiam
auxi.

Atque sic enatum est leve hoc opusculum, quod
L. B. æqui bonique consulat, atque si velit, in
rem suam vertat.

Scribebam Tecklenburgi mens. Jul. C1C1DCCCLXXX.



INSTI.



INSTITUTI RATIO.



Quanta nostris temporibus, post continuationem medicinalium observationum, quas incomparabilis *Bacon*, omnium scientiarum, quin & medicinae strenuus iudex, promotor & augur, collocavit inter desiderata sui aevi, ceperit incrementa ars salutaris, neminem, cui huius doctrinae conditio nota, latere arbitror.

Etenim adeo nostro tempore aucta sunt observationum volumina, ut omnia, quaecunque humana fert imbecillitas, comprehendere, nec his ultra quidquam adiici posse, videantur. Quid quod! id ipsum etiam, quod nunc tracto, argumenti genus, tam tritum tamque vetus est, ut ipsam medicinam, quando serius coli coepit, aetate aequet. Sed hac vetustate non obstante, cum dies diem doceat,

A

studio



studio adhuc memorabiles observationes esse colligendas, ut omnem morbi ambitum, quamvis is ipse morbus non lateat, rite pernoscamus, nemo ibit inficias. Nam, monente eodem divo VERULAMIO, *multa in modo rei & circumstantiis eius nova, quae in genere ipso nova non sunt.**

Simili res modo comparata est cum morbis ex bile oriundis, nunc vero a me describendis. Nimirum, genus ipsum morbi, quod a bile nomen habet, inde a temporibus *Hippocratis*, ad nostra usque, in scriptis medicorum plurimis annotatum reperitur; adiectique occurrunt varii huius morbi modi, eiusque species variae. Nondum autem penitus hanc rem exhaustam esse, modorumque huius morbi descriptiones adhucdum esse augendas, continuandasque medicinalium narrationes, multis modis, in egregia Dissertatione: *de amplitudine generis februm biliosarum*, demonstrare annuifuerunt Ill. *Schroederus* & Cl. *Lud. May*, quam nuper recudi curavit Cl. *Ackermann* in opusculis viri eruditissimi.

Voluerunt enim hi doctissimi viri, inter morbos febriles, febrem biliosam, ad genus summum, quod plures species comprehendit, esse evehendum; dolueruntque, a multis Scriptoribus, etiam a nonnullis, qui nostra aetate artis compendia scripserunt, biliosam febrem pro inferiori quadam specie, haberi, eiusque cum aliis mixtae indolis mentionem vix ullam fieri. Variis hinc complicationibus,

tanquam

* De dignitate aequae augumentis loquitur, Argentor. 1654.



tanquam speciebus, antea praetervisis, huius morbi familiam egregie auxerunt, laudati hi viri. Haud diu post autem in *Academia Halensi*, multis nominibus laudanda Differtatio Cl. *Selle*, *methodi februm naturalis rudimenta* exhibens, prodiit, quae plures species febris biliosae, ex scriptoribus collectas & in ordinem naturalem redactas, refert; deinceps vero Cl. *Selle* hanc doctrinam perpolvit in libro, cui titulus: PYRETOLOGIA.

Tantum autem abest, ut omnes ac singulas species descripserit auctor, ut plures potius prorsus omiserit. Nec hoc aliter fieri potuit, cum nemo ingenio comprehendat morbum, qui non antea sensibus obviis existerit, vel, qui illum scriptis mandaverit, offenderit. Interim tamen, in tanta auctorum abundantia, iure meritoque desideratis nostri temporis adnumerandus est liber, qui omnia vitia bilis, indeque orta mala, fufius paulo, quam antea factum est, exponeret, nexu individuo.

Nimis audacter, me talem inopiam accusare, credentem, rogatum volo, ut praesentes, quales quales sint observationes, omni *tamen* fide candoreque, absque styli ornamento enarratae, cum aliorum comparare velit; posteaque, liber ab omni partium studio, iudicet, utrum species quaedam, nam de omnibus id affirmare non audeo, morbi biliosi supersint, prorsus ab aliis praetervisae, iam vero a me descriptae.

Contigit mihi nempe occasio per quatuor annos



continuos, nempe ab anno 1776 — 1780 in comitatu Tecklenburgensi, et in vicinis locis, statum morbi biliosi populariter grassantis, multumque devastantis observandi, ut mirum sane esset, in tanta aegrotantium multitudine, & in tam longo temporis intervallo, nihil plane quidquam memoria dignum, vel vidisse, vel annotasse. Idque eo magis foret mirum, cum esset morbus, qui ab ordine ab auctoribus designato, ne dicam ordine naturali: *cum & sua morbus quilibet habeat symptomata, sibi propria, necessaria, semper eadem, quae & praesentem declarant, & cum ex natura eius profluant, inque diversis ideo diversa* * identidem defleceret quam longissime, meritoque hinc proteiformis dicendus. Nam haud rari, morbum accuratius indaganti, obvii existerunt casus, qui, quoad characterem externum, ad hos modo, modo ad alios morbos, referri; exuta autem, veram morbi naturam tegente larva, morbis biliosis, suo quodam adnumerari debebant iure. Id non solum aperta, per signa diagnostica, edocebant vestigia bilis; quamvis in nonnullis, quod itidem saepenumero contigit *Cel. van den Bosch in epidemia verminosa*, ** ratiocinando tantummodo, de eius existentia sim convictus; sed quae instar lapidis probatorii sunt, morbi eventus; rerum sex non naturalium applicatarum vel bonus vel pravus effectus; & ipsa denique methodus medendi, rem extra omnem dubitationis aleam posuerunt.

* Gaubii instit. Pathol. §. 835.

** Editio nova, curante J. Chr Ackermann. Norimb. 1779



runt. Neglecta enim a prava bile desumenda indicatione, sed ad morbi nomen potius quam ad veram eius indolem, directa medela, cum multis, qui ante me hunc medentium errorem reprehenderunt, inter quos *Cel. van den Bosch* tanquam praeceptum nomino, funestum lugubremque saepedolui eventum: idque non tantum in morbis a mera bile oriundis, sed magis etiam in aliis, cum febre biliosa complicatis.

Tanta enim erat in hac epidemica constitutione corporum ad bilis degenerationem proclivitas, ut tunc temporis, vix morbum alium, sine symbolo bilis videres.

Instituti rei ratio non est, ut his complicationibus in praesenti prolixè inhaerere velim, ut malim potius *anomalias* febris biliosae, ab illis diversas, enarrare. Quum autem isti morbi haud longe a calcanda via absint, etiam has paucis verbis comprehendam, necessitate quadam coactus, ut differentia, inter morbum huius generis anomalum atque complicatum, lectoribus pateat eo magis.

Prima, quae nunc movetur, quaestio hæc est, ut ostendatur, quaenam sit morbi biliosi anomali vera idea.

Morbi biliosi anomali vocabulo comprehendo omnes morbos a causa biliosa febrili natos, & sub larva alius longè diversae aegritudinis, sive sit acutae sive chronicæ indolis, subdole latentes.* Pro
ratio-

* Infra realitatem huius notionis tufius demonftrabo.



ratione atque similitudine causae, minime vero pro symptomatum convenientia, hoc morborum genus esse constituendum, sanioribus principiis medicis imbutus, minime reprehendet, cum iam diu *Themsiformis* explosa sit sententia: nullius causae notionem ad curationem quidquam pertinere sistens; sed magis *Celsi* effatum sit amplectendum, qui *eum recte curaturum* profitetur, quem *prima origo causae non fefellit*. Quum autem character specificus morbi biliosi anomali vel a morbi tenore, vel a symptomatibus insolitis dependeat, omne studium in eo est collocandum, ut neutiquam cum morbis complicatis biliosis, in quibus, praeter causam biliosam, accuratiori indagatione, adhuc alia longe ab hac diversa causa dignoscitur, confundatur, morbusque complicatus pro morbo anomalo ventiletur.

Neque minus committendum, ut lectori symptomata febris biliosae, quorum tanta varietas existat, ut in eo sibi parem vix morbus alium habeat, & verius de corrupta bile, quam olim de utero valeat proverbium: quod sit sexcentarum aerumnarum, & tot malorum causa, pro morbis huius generis anomalis, obtrudantur.

Accidit etiam saepe numero, ut ex reliquiis febris biliosae, horrenda mala remanerent, quae non satis cautum deciperent, ut haec pro morbis anomalis haberet. Sedulo autem a me esse cantum, hac similitudine non decipi, lege sancita, nullum alium morbum hic admittere, in quem praefata notio non
qua



quadret, ex nonnullis observationibus reliquiarum febris biliosae, parti huius operis priori adnexis, patebit clare atque perspicue.

Ne autem quis me criminis fallaciae causae ac-
cusset, quod referente *Baglivio* contigit *Henrico*
Screta, qui omnes febres ex unica causa, ex in-
flammatione nimirum ortas credidit; vel aliis, in-
ter quos primus est *Andry*, qui in omnibus ferme
morbis causam animatam vid. bant; neque putet quis,
me multos morbos pro biliosis ventilasse aliunde
ortos, huic suggero: hos morbos in constitutione
epidemica febris biliosae esse enatos tantum; dein
suis signis diagnosticis, infra enumerandis, ab aliis
potuisse discerni; & tandem, hos morbos, vix ac
ne vix quidem aliis quam contra bilem adhibitis
medicamentis, vel parum molliri.

Cum observatoris magis, quam systematici mu-
neribus fungar, meae partes non fuere, omnem
hanc rem penitus exhaurire, vel omnes species
morbi biliosi anomalî, huc usque cognitas enume-
rare; dein etiam non omnes atque singulas species
exhaurit mea, qualiscunque sit experientia; sed
quae multarum aliarum specierum natura sit, apud
auctores, qui de his scripserunt, relatum legitur.
Ex multitudine horum morborum aliquos tantum-
modo describendos mihi sumsi, partim quod plane
nondum, quantum ego saltem sclo, apud medicos
descriptos existent; partim etiam, quod quaedam
memoria digna contineant, & rarioribus sint ad-
numerandi. Fallor, vel exipsarei tractatione elu-
cescet,



cescet, in praxi medica. ad absconditam materiam biliosam summopere esse attendendum, frequentiorque esse bilem morborum causam, quam olim credidere multi. Sane hinc arbitror: anomalam morborum biliosorum haud minorem mereri attentionem, quam excitarunt apud doctos viros arthritidis anomala a *Musgravio* graphice descripta; vel a *Mortono* aliisque celebratae febres proteiformes; vel denique potentia animata morbosa a *Cel. van den Boscb* plurimum investigata.

Neque hoc absolum videbitur perpendenti, ex unica causa, tam varia atque diversa mala oriri posse, quae non nisi hac sublata, tolli nequeunt, quin etiam, praepostera adhibita medela, omne medentium studium solent frustrari, non secus ac in morbis verminosis saepe usu venit. Exclamare hinc subinde cum *Cl. van den Boscb* debebam: *insueta perquam animadvertentur symptomata, quae ordinariae medendi methodo minus aequo parebant, etiamsi ex nomine & singulari morborum deducta, secundum artis normam adhiberentur.**

Desiderant autem morbi anomali a me descripti non adeo singularem & methodum medendi, & victus rationem, valde a medela febris biliosae discrepantem, ut hic singulari descriptione indigeant: sed iisdem etiam medicamentis, eademque victus ratione, quibus illis medemur, hic etiam uti possumus; interim tamen pro cuiuslibet morbi natura de-

* L. c. p. 13,



delectum quendam esse instituendum, sedula me docuit experientia. Istam autem in medendo convenientiam, de materiae morbidae, ne dicam identitate, saltem similitudine egregie testari, quis non videt? Alia similitudine in methodo medendi commoti sunt magni in arte viri, ut MORTON, TORTI, WERLHOF, febres quasdam proteiformes, cum intermittentibus eiusdem naturae censere & illis, uti intermittentibus solemne est, mederi. Nonne eadem valet in nostris, quos descripsi, morbis argumentandi ratio?

Nihil medicinam magis posset promovere, quam si velimus illam ab inutilibus ambagibus atque verborum lenociniis, quibus ars salutaris nondum plane liberata est, ad simplicitatem revocare. Optime hoc fieret, monente *Baglivio, accurata historia causarum, quae bos & non alios morbos fere semper, aut frequentius tamen producunt.* Quamvis id votum sit, neque a me fortassis satis praestitum, tamen usu qualemcunque meum laborem, hac in re, plane destitutum fore, neminem, chamaeleontis unius causae effectus, rite perpendentem, & in indagine causarum occupatum, affirmaturum esse, reor. Tantus autem absum, ut materiam exhaustam tradidisse aestimem, ut doctioribus potius ad augendam excolendamque tradam, fatis contentus, me hic non prorsus hallucinatum esse.

Restat ut moneam, ad rem ipsam pertinere, proprietates ipsas febris biliosae constitutionis nostrae
epi.



epidemicæ, nosse : primum, ut lectores sciant, qualis morbus fuerit; dein ut liceat mihi investiganti morbos biliosos anomalos, subinde ad eam provocare, neque necesse sit, semel dicta frequentius repetere. Fieri hoc aliter non potest, quam, ut historiam epidemici nostri comitatus paucis depictam, tanquam normam, anomalie describendæ præmittam.

Antequam autem id præsto, vel dico, quibus præcedentibus morborum timor subsit, & qualis morbi decursus fuerit: non alienum videtur, antea exponere, qui locorum situs; quæ tempora anni; quæ vitæ ratio; quæ tempestatum vicissitudines; quæ stadia ætatis, & qualis sexus periculis maxime opportuna fuerint. Omnis itaque tractatio duas præcipuas habebit partes; quarum prior aget de ipsa febre biliosa; altera vero de morbis huius census biliosis anomalis.

HISTORICA COGNITIO

EPIDEMICÆ TECKLENBURGENSIS ANNOR.

1776 — 1780.

Non ignoro quidem, dari genus hominum, cui horrendum nomen Gueſtphalia ſit; attamen illuc ſatis bene vivitur dummodo incolumitas non deſit. Hac vero per quatuor annos continuos, nempe ab Anno 1775 — 1780, orbatus fuit comitatus Tecklenburgenſis, minor regio Gueſtphaliæ; quatuor milliaribus complexa; montibus diviſa; una parte epiſcopatu *Oſnabrugeniſi*; altera vero *Monafte-*



naſſerienſi incluſa; ſub FRIDERICI Ildi magni Regis, glorioſo ſceptro, cum magna incolarum frequentia, ſarta teſtaque degens.

Pauci incolarum habitant in urbibus: nam maxima pars rure vivit atque terrae munere, agros colendo, veſcitur, quorum aedificia culmo teſta, pecudibus alendis atque agriculturae apta, dulcedini vitae non valde blandiuntur. In his tamen contentos agricultura, quae hominem ſanum praefſtat, exercet viros; cum e contrario lintei textura, & pecudum cura feminis ſint reſiſta. Magna hominum multitudo quotannis Hollandiam petit, unde feſſa labore, cui ſubeundo par eſt, aurum reportat, morboſque. Eſt ſane indefeſſum genus hominum, corpore robuſtum, animo ſincerum, nec multum ſeculi vitiis contaminatum, vel a priſca ſimplicitate deieſtum! Paucis contenti ſine apparatu atque blandimentis diu poſt tempora *Taciti* expellunt famem, atque vivunt pane nigro; lacte; placentis; carne ſuilla, vel bovina, fumo indurata; braſſica oleracea, raro capitata; rapa; radice dauci; fabis; piſis; phaſeolis; imprimis autem ſolanis tuberoſis. Aegrotantium atque parturientium cibus eſt multo cum pane nigro decocta cereviſia, quam etiam, repugnante ſaepe natura, decumbentibus in larga quantitate ingurgitant, rem conclamataſſe putantes, ſi vel unicum diem ſine cibo viverent. In morbis levioribus ſere nunquam, in vehementioribus malis autem raro medicum accerſunt; at nunquam ante id tempus, de quo dicit CELSUS: *in malis magnis non alia ſpes eſt, quam ut impetum.*



zum morbi trahendo aliquis effugiat, porrigaturque in id tempus, quod curationi locum praestat. Longe autem magis damnandus est abusus spirituosorum, praesertim in febribus, quibus nunquam non tunc temporis utuntur. In multos hinc *Epicuri*, qui morbo iam conclamato decumbens, meri largiori haustu, ventriculum atque sensus obuisse fertur, quadrat epigramma:

Stygias ebrius haufit aquas.

Alterum aequè damnandum vitium est, quod ferme sibi religioni ducant, venae sectionem in febribus cuiuscunque indolis, non instituisse.

Morborum principia purgantibus aloëticis propellere festinant, vel magis turbant: declinante autem morbo, plane quiescunt, neque quidquam medicamentis moveri sinunt, virium iacturam indetimentes, vel ut rectius dicam, somniantes. Inde Lerna malorum post febres biliosas, atque mirabiles morborum metaschematismi!

Caeteroquin levi malo non terrentur, neque subinde aegrotant, quod eo magis mirum est, cum coelo iniquo saepe ntantur; neque valetudinis curam habeant, atque copia paludum atque stagnorum, lino cannabique macerandis accommodatorum, iuxta domos adsint. Multum incolumitati adjicit absentia illorum, quae homines in civitatibus affligunt, effeminantque; desidiam puto atque luxuriam. Mature hinc atque a teneris, vitae durae sobrietatique adsueta, increscunt cito; maturam acquirunt pubertatem atque seram senectutem. Grandae vos

daevos



daevos ea propter videre neutiquam rarum. His ditiores rustici atque plerique in civitatibus degentes, tam tenui vita non contenti, gulae palatoque magis indulgent, maxime in potibus calidis vehementer delinquant, quod multorum morborum causa evadit. Omnibus autem his id commune est, mulierculae atque aniculæ maiorem in medicina fidem habere, quam medico. Ill. METZGER nuper in *Adversariis medicis* p. II da erudite disputavit de victu & morbis incolarum Guesphaliae nostrae, ad quem, brevitatis studio, lectores ablegamus.

Cum ante annum 1776 ne vestigia quidem febris biliosae in nostro comitatu adessent, dicendum nunc est, qualis tempestatum ratio huic morbo creando, postea tantopere disseminato, maxime fuerit idonea. At vero sane non PYTHIUS APOLLO, nec probabilia coniectura sequens homunculus, fando hoc exsequetur. Neque ego affirmare audeo, ingens frigus mensis Januarii 1776, quod Ill. van SWINDEN * in libro edito, singulari descriptione profecutus est, corpora his morbis tantopere reddidisse obnoxia. Docuere autem observationes sequentia. In aedibus quibusdam suburbanis, primo huius anni vere, sub coelo non valde iniquo, primum accensum virus, in aestate sequenti paulo remissius, circa autumnum, Africo regnante, & coelo saepe nebuloso, increbuit valde. Cum huius

* Observations sur le froid rigoureux du mois de Janvier 1776.



ius anni statum epidemicum a me descriptum Adversariis medicis Part. II^{ae} p. 58 & seq. inferuerit Ill. METZGERUS; dictis plura non addo.


Silnit dein quodammodo hyeme 1777 febris, neque aliis morbis tunc temporis laborabant homines. Proximo autem huic vere, frequenti mutatione caloris aestivi in frigus hyemale insigni, qua corpora meridianis caloribus relaxata, subito frigore excipiebantur, longe lateque aegrotantium numerus augebatur. Praeter febrem biliosam occurrebant frequenter pleuritides atque anginae biliosae. Subsequens aestas valde pluviosa, non imminuit morbos, adiecit magis alios, vix non peiores & ex intermittentium natura. Ultima parte aestatis autem, atque maxima parte autumnii substantibus serenis, prioris damna sunt remunerata, atque homines tunc temporis erant tutissimi, qui autem hyeme anni 1778, morbis ditissima excipiebantur incauti. Nam morbi, qui antea quieverant, nunc denuo recruderunt atque repetierunt; quin etiam his morbis non vacabat ver pluviosum eiusdem anni. Nam nunc aegrotantium numerus fuit auctus, & apparebant febres scarlatinae biliosae, atque anginae anomalae; multosque dein vexabant pleuritides atque tussis biliosae, quae multos confecerunt. Aestas calida atque constanti fere serenitate atmosphaerae laetissima, quaeque cuncta ferme Europae regna, si orientem spectantia intra gradum aequatoris 30^{um} & 50^{um} exceperis, fertili segete, laetaque salubritate beaverat, omnino non carebat morbis, abundabat illis
potius



potius, præsertim angina biliosa tentabantur multi. Circa finem æstatis autem, & quod ad maxumam partem autumnî, in quantum placide decurrebat, morbus ex bile adeo siluit; ut disparuisse videretur: interim tamen multi querebantur de doloribus artuum, atque mala digestio vexabat multos; quin & tussis ex bile apparuerunt.

In hoc statu ægrotantium conditio permanserat usque ad finem hyemis 1779, post aliquot hebdomades a rigore plane detonantis, & hinc lenitate magis quam salubritate insignis, quæque multos postea oppressit. Nunc varii morbi sunt orsi, bilem redolentes. Nimirum in hac tempestate variolæ multis in locis erant pessimæ indolis: parturientes graviter decumbebant; atque teneram ætatem tussis atque anginæ vexabant malignæ. Quæ succedebat æstas torrida, multis inducebat febres arthriticas atque scarlatinas anomalas: circa finem æstatis repertæ sunt febres biliosæ, quæ omnes etiam incidebant in autumnum, quibus insuper superveniebant foedissimæ diarrhoeæ, dysenteriam æmulantes. Quæ tempestas nebulosa atque pluviosa debilibus præcipue erat molesta. Morbi hinc in his difficulter elidebantur, & quia progredi non poterant, fere retro, ut verbis CELSI utar, quasi ruina revolvebantur.

Ætatum autem atque sexus ratio talis erat. Magis adulti quam infantes; magis pueri quam iuvenes; magis feminæ quam mares morbo sunt offensi.



offensi. Juvenes tutissimi erant. Quando autem corripiebantur, vix in his defuit periculum.

Circa morbos biliosos anomalos annotavi frequentia.

In genere : homines iuniores atque infantes laborabant febribus biliosis anomalis atque tussi ; cum e contrario aetas senilis , reliquis morbis anomalis non febrilibus esset obnoxia. Speciatim autem, febre scarlatina biliosa correptae sunt feminae iuniores , quae maxima ex parte arthritide biliosa itidem sunt offensae. Febrem putridam subinde parturientes subierunt ; vel hi, qui praeter bilem interaneorum animalculorum fomitem alebant. Propter ventriculi debilitatem dispositi multi sunt redditi ad febres nervosas atque catharrales biliosas. Pleuritides , hepatitides atque febres intermittentes biliosae, vexabant mares ; orthopnoea senes.

Haec quidem potiores me edocuerunt observationes , omni exceptione non carentes. Nam nulla aetas certa , contra hunc morbum, praestabat praesidia atque satis tuta. Vidi infantem vix aliquot horas utero materno exclusum viridem bilem , non meconium , evoementem, matre, post triduum, febre biliosa correpta. Occupabat febris biliosa senem 92 annorum , qui curae meae commissus , feliciter satis morbum superavit , & adhucdum in vivis est. Sed haec sunt levia. Nam : *Quod ipsa natura dictavit systema , non illico turbandum , si qua forsitan parte ob cognitionis humanae defectum biat.* *

PARS

* Gaubii Instit. Pathol. §. 587.



P A R S I.

QUÆ

FEBREM EPIDEMICAM DESCRIBIT.

DIVISIO PARTIS PRIORIS.

Recenſitis iis, quæ ad hiftoriam epidemiæ Tecklenburgenſis pertinent, paucis verbis ſumma capita prioris huius partis ſunt comprehendenda, ut lectori in limine ſtatim pateat, de quibus fermo ſit futurus.

Conſideranda autem primo febris ſub trifario a ſe diverſo ſtadio.

Stadium primum nempe complectitur ſymptomata, quæ febrem sæpe diu antecedere viſa ſunt.

Stadium ſecundum ipſo febris decurſu abſolvitur; quod excipitur


Stadio tertio, in quo reliquæ febris ſuperſunt.

Dein vero de nonnullis ſymptomatibus ſeorſim dicam.

Poſtea denique complicationum enarratio me occupabit, cui

Digreſſiones quædam adneſtentur, quas *Crifes*, ſive molimina naturæ ad morbum ſuperandum apta, ſequentur.

Neque ſalubritas morbi exemplis illuſtrata plane ſilentio prætereunda videtur.



Tandem methodus medendi, cui libet studio apta, tractationi meæ imponet colophonem.

STADIUM I.

Imminens morbus iam e longinquo ex suis signis cognoscendus, raro sane hominem cito corripere solebat, neque erat admodum periculosus, dummodo sibi tunc temporis per aliquot dies temperarent, & monitis medicis, mature morbo occurrentes, obsequiosas præberent aures, ciboque carnem subtraherent ægrotantes.

Morbum timendum indicabant sequentia. Lassitudo artuum; dolor in membris atque in dorso rheumaticus, circa noctem sæpe increscens; sensus formicationis in musculis; pulsatio scrobiculi cordis mox præsens, mox cessans, maxime post prandium; capitis dolores in multis nulli; in aliis leves; in paucis vehementes, mox frontem, mox fynciput occupantes; sensus ponderis circa ventriculi regionem, cardialgicos dolores æmulans; dolor hypochondriorum vel hepatitidem vel pleuritidem spuriam mentiens; ructus continui, inanes, nidorosi, quos nostrates nuncupabant: *ein rauheriges Aufstossen*, quosque in Cholera adesse testatur *Cælius Aurelianus*; lingua impura, in his levi, in aliis tenaci muco obducta, albicans simul & interdum flavescens; papillas in hac parte sæpe elongatas vidi cum verminosa, in intestinis, colluvie; absentia appetitus; nausea, quin & vomendi cōnatus; fames in nonnullis naturali maior; alvus



vus nunquam recte respondens, suppressa in plurimis, cita in aliis; neque spiritus infra transmittabatur; urina pallida, straminea, sæpe bullas diu persistentes exhibens; pulsus debilis, interdum iusto frequentior; noctes inquietae, atque subinde anxietates subitanæ, præcipue circa captum somnum, illumque pellentes; alii inani screatu atque levi tussi, ad se liberandos a mucositate, guttur faucesque obsidente, multum, circa noctem, temporis consumserunt. Faciei color pallidus erat in his, in aliis rubor genarum; interdum autem genæ aut rubore aut pallore novo mutabantur; in feminis hæc magis aperta erant quam in maribus. In his enim circa eruptionem mensium acriora sunt reddita omnia; menses hinc sæpe suppressi atque turbati. Nunquam circa signa graviditatis animus magis hæsit, quam si saburram biliosam subolerem, utpote quæ graviditatem mentiri sæpe sæpius est visa.

Durante hoc primo stadio muneribus suis fungendis ut plurimum adhuc pares erant homines; neque ab his, nisi oppido raro, medicina facile parabilis, quærebat, ex prandio vel cœna ventriculus offensum esse putantibus.

Verum enim vero haud diu in hoc statu permanere poterat morbus, qui triplicem habebat exitum. Vel enim transivit in stadium Ildum, mox describendum; vel excipiebatur morbus anomalus biliosus; vel tandem inde status quidam valetudinarius est exortus, nisi forsan evacuatione præternaturali a mala materia liberarentur viscera.



Quum enim natura tantum onus recipere subinde non idonea, neque supervacanea atque nociva ad certos exitus amandare fatis potens sit, opprimitur illa, & statum illum valetudinarium excitat.

Ita nimirum propter longam moram, quam in visceribus neſtebat materia bilioſa, fieri non potuit, quin functiones naturales, & in ſpecie digeſtionis negotium eximie læderetur, unde poſterius in alias partes promanavit malum. Debiles hinc ſæpe atque macilenti ſunt redditi, qui muniis ſuis ignaviter vacabant; mœſtique trifies atque iracundierant.

Remaſerunt dein obſtructio alvi pertinax, atque dolorès dorfì membrorumque rheumatici, admodum rebelles. In feminis menſtruorum turbatio obſervabatur, & mali hiſterici incommoda multum increverunt, uti etiam debilitas nervorum, atque ſanguinis orgaſmi. Quod ſi vero ſecundis viis immitteretur materia, in aliorum morborum cauſas abiit e. g. in fluxum coeliacum; obſtructionem urinæ; tuſſum pulmonalem; phthiſin atque tabem corporis.

Quando autem in ſtadium IIIdum vel in morbum anomalum migrarent incommoda deſcripta, hoc raro factum eſt cito. Sed ſæpe poſt aliquot demum ſeptimanas. Quid quod! vidi homines per trimēſtre ſpatium de morbi adventu, per ante memorata incommoda, præmonitos, & ſi his mens non læva fuiſſet, parva medicina curabiles.

STA-



STADIUM II.

Corpora tali seminio morbi, ut Cel. *Gaubii* verbis utar, prædita, ex levissimis potentiis nocendi in febrem subito sæpe incidisse, nemo mirabitur, nexum causarum bene intuens.

Terror, ira, animi pathema; refrigerium corporis; intensi labores; nimia ingurgitatio; laxantia intempestive adhibita; nec non sine ratione celebrata venæ sectio; mensium eruptio; quin etiam partus sæpe sæpius febrem acenderunt. Subinde etiam sine prævia causa febrem enatam vidi, ex abundantia materiæ peccantis nimirum, vel ex defectu virium morbo resistentium: tandem ex contagio, dum raro uni in domo semel infecta, & immunditie fœda, pepercerit malum.

Morbi insultum autem indicabant sequentia. Præter illa in Stadio Imo enarrata, vel horror vel calor præternaturalis vexabant, raro ingentes, sed magis vicissim sese excipientes. Per dorsum imprimis currebat calor ingratus ferventis aquæ instar, qui ad faciem migrans, genas coccineo rubore tingebat, post aliquot horas iterum pallefcentes. Sudor vel nullus; vel saltem in initio levis, particularis; in nonnullis universalis, minime criticus; diarrhœa, si qua antea fuerat, aucta; vel obstipatio alvi pertinacior. Jam nunc incommoda circa ventriculum augebantur, quod ex maiori aversatione esculentorum, præcipue carniū; ex conatibus vomendi, & ex præcordiorum anxietatibus pro ratione obstructionum incrementum, satis abund-



abundeque apparebat. Noctes hinc inquiete ducebantur, & si forte fortuna somnum caperent oculi, subito quodam terrore sunt expergefacti. Siti confecti, limpidam aquam amabant, averfantes calida, quia inde anxietatum incrementa sensere. Quid quod! semel a potu calido largiter & supra modum hausto, vidi delirium maniacum per aliquot horas durans, donec viscerum abdominalium præter modum aucta expansio, qua mediante, diaphragma magis in pectoris cavum adactum est, ad statum pristinum rediret. Potum Théë postea semper suspectum habui.

Febris, uti inceperat, uno impetu, perseverabat, & si forsan tempus quoddam remissius esset, circa vesperam integritas quædam aderat. Pulsus debiliior atque multo frequentior, quam antea fuerat, in robustissimis sæpe imperceptibilis, ingentem virium iacturam in morbis putridis indicans, vix quem in hoc morbo semper terrere debebat, dummodo de materiæ biliosæ circa præcordia satis constaret præsentia. Inventi enim sunt multi, qui unico adhibito emetico, vel laxante, morbum unacum causa feliciter fatis, & brevi temporis decursu funditus superarent, & paulo post cum pulsu bono munis suis vacarent. Similia post vermes excretos viderunt *Andry* atque *van den Bosc*.

Aliis autem tam fauste res non cessit, neque hi tam subito cum sanitate in gratiam redierunt. Diētis enim malis tempus plura atque peiora adjiciebat, quæ vel ex pertinacissima alvi obstructione,
 vel

vel ex diarrhoea simul coniuncta, enata esse videbantur, quam maxime. In illis enim, qui alvo tarda laborabant, increfcebant dolores artuum atque dorfi; anxietates; vigilæ vel somnolentia, quibus accedebant suspiria; deliria; furditas, ex observationibus *Tulpii*,* cum febre simul evanescens. Febrem denique habebant ab omni remissione destitutam; linguam aridam, quoad colorem flavescentem, in nigredinem vergentem, atque mucro tenacissimo obductam, qui præter linguam, etiam dentibus atque labiis firmiter adhærens, has partes inter se conglutinabat.

Illis vero, quos fusi ventris mala vexabant, minus dolebant partes externæ; capitis e contrario dolores erant vehementiores; hinc etiam deliria phrenitica in his frequentiora; sitis maior; dolores colici; urina varia atque mutabilis; excrementa varia, aquosa, spumantia, viridia, nigra, pessime olentia. Pulsus, a casibus inflammatoriis discefferim, & in his & in illis, quos obstructos dixi, non solum semper debilis, sed & sæpe æquis intervallis micare desinens. Respiratio, si ab anxietate vacarent, ut plurimum bona. Haud amplius citam alvum habere, multum in his spei iniiciebat; uti e contrario in obstructionibus salutare erat, alvum mollem sentire.


In genere autem sperare licebat, ægrotum superstitem fore ex morbo, si mature valentissimi
ge.

* Monita med. No. 59.



generis cibus exularet; si tenuius viveret æger; si medicamenta non negligeret; si nulla vel saltem levi tantum complicatione coniunctus esset morbus; si post sumptum emeticum, quod biliosa cum mucos remixta, quin & viridia reiecerat, anxietates cessarent, neque redirent; si excrementa mollia atque figurata redderentur; si urina antea nubeculam gerens, deponeret sedimentum laudabile, die XIV. & serius, nec postea limpida redderetur, quod sæpe accidit in febribus biliosis nervosis, uti infra ostendam; si bullæ in urina mox disrumpèrentur; si lingua ab apice ad eius radicem usque pura redderetur, non sine prævia egestionem materiæ biliosæ; & quando forsan quid pleuritici adfuerat, si sputa costæ biliosa non deessent; si somnus, appetitusque redirent, & eius generis plura.

Morbum autem longum fore, indicio erant sequentia. Sudor statim ab initio profusus; vomitus, post emetica, non levantes, nec biliosi quid educentes; emetica plane neglecta; laxantia præmature adhibita; venæsectio sine ratione instituta; continuæ anxietates præcordiorum post emetica continuantes; hypochondria tumentia; pulsationes scrobiculi cordis continuæ; lingua crispa, nigra, fissa; papillæ linguæ elongatæ. Malum etiam erat, medicamentis subter in alvum missis, ventrem non molliori, neque diarrhœam sisti. In longis malis adesse solebant furditas atque loquelæ defectus, cum frequenti aurium tinnitu. Longum reddidere morbum variæ complicationes e. g. vermes, partus &c. Certissima autem urina diuturnitatis indicia dabat;



nam talis erat, quæ semper tenuis existeret; vel quæ nubeculam nullam vel saltem in suspenso gerebat; quæ multas bullas habebat, sæpe ante octavum diem non dissilientes; vel denique talis, quæ mox sedimentum deponeret, mox vero non. Quibus optime confirmantur ista *Hippocratis*:

*“ Si urina intermittat, & interdum quidem pura meiatur, interdum autem subsideat album & leve, diuturnior & minus securus evadit morbus. ”**

Dein alio loco. *Quibus in urina bullæ, significant longam fore valetudinem. ***

Denique. *Urina lentum sedimentum habens, & quæ in melius & in deterius commutatur, temporis diuturnitatem postulat. ,***.*

Pulsus in his febribus diuturnis ferme non semper debilem inveni: interim tamen quandoque adeo mutabilis fuit, ut tutum præsagium inde haurire vix possibile. Nam qui in initio durus, postea molli; qui magnus fuerat, cito parvus est factus: interdum pulsus alius ex alio est subortus. Videbantur autem distensiones intestinorum a flatibus; vel pertinax alvi obstructio; vel tandem spastica in interioribus contractiones, tantæ debilitatis atque mutationis causa fuisse. Certe hinc in hoc morbo,

* Prænot. 77.

** Aphor. 7. 24.

*** Coac. prænot. §75.



morbo, si unquam aliter, pulsui, quem fallacissimam rem nuncupat *Celsus*, fides quodammodo est deneganda, vel saltem non tanti æstimanda, quanti in aliis casibus. Quid quod! ne ex pulsus magnitudine quidem, neque ex ejus duritiæ necessitas semper venæ sectionis potuit æstimari: siquidem post levem venæsectionem ex pulsu magno identidem admodum parvum enatum vidi. Admonendi hinc semper erant chirurgi: vellent potius hanc operationem dividere, quam uno flumine vires exhaurire. Longum vero morbum appello, quando ultra sextam septimanam extenditur.

Ad ultimum ventum esse testabantur varia. Si cum morbo diu luctaretur æger, neque de materiæ fomite e corpore decederet quidquam, sed in statum putridum vel hecticum migraret. Vomitus æruginosi, parvi, nihil levantes, diarrhœa pessimæ indolis, excitata a materia acri vasa arrodente, spasmosque & diros dolores colicos irritante, cum intermixtis striis sanguineis, atque materia purulenta, tunc mortem portendebant, utpote quibus significabatur, massam sanguineam iam iam in putrilaginem abiisse. Multas septimanas, antequam sub multis cruciatibus animam efflarent, vitam hanc miserrimam ducebant. In aliis venter continuo constipatus; sopor profundus; deliria phrenitica; oculi sanguine suffusi; epilepticæ convulsiones in parturientibus, vel quando vermes in causa essent; ventris inflatio cum murmure, vel ingens eius contractio; lingua tremula, muco pingui obducta; nigra; ca-

vum

vum oris cum muco tenaci in fila ductili repletum, malum eventum præfagiebant. Maximum vero metum incutiebant, respiratio admodum læsa, post venæsectionem non liberior; instans partus; perpetua deliria; muscarum captus; sitim, quamvis pro ratione febris quam maxime urgeret, non sentire; extremorum tremor; pulsus plane non perceptibilis vel intermittens; variolæ malæ indolis simul complicatæ; aphthæ; frigus extremorum cum sudore frigido; tandem facies *Hippocratica*.

Et ita quidem morbi facies erat comparata! Inde morbi nomen, eiusque naturam eruere haud magnus quidem erit labor, neque singulare desiderat ingenii acumen. Nam nemo facile erit, qui non, me saltem ita sentiente, ex datis signis *Febrem biliosam* vel prima fronte statim cognosceret, nuncuparetve, atque ab aliis ægritudinibus discerneret. Operæ hinc pretium vix erit, tam apertæ rei plura argumenta addere. Quod si vero cui dubium circa hanc rem enascatur, adeat, amabo, elegantissimum librum *Celeb. Tissot* ab Ill. *Baldin-gero* editum, in quo febrem biliosam *Lausannensem* accurata descriptione expositam inveniet, cum adiectis argumentis gravibus, cur febris, nostræ quoad causam atque phænomena similis, biliosa sit salutanda.

Aliud mihi potius nunc agendum restat. Evincendum nempe est, an omnium supra descriptorum malorum una semper eademque fuerit natura; neque



que ulla, in nostra epidemia, exstiterit generis diversitas, haud omittenda.

Non hic diuturnitatem, neque intensitatem morbi, vel alia accidentia a me quæri, quilibet etiam haud monitus, facile intelliget, sciens: magnitudines vel accidentia rerum naturas non mutare, neque genera sed species sistere.

Quærimus autem aliam diversitatem, talem nempe, quæ ex ipsa morbi natura fluit, & medentem docet, num in methodo medendi aliquid mutandum, vel illi insistendum.

Puto autem, ex præfata historia morbi patere sequentia.

I. Fuisse genus quoddam ægrotantium, quod pertinacissimis laboraret alvi obstructionibus, in quibus multorum medicamentorum apparatu, vel ore haustis, vel per inferiores partes infusis, ad ventrem liquandum opus erat.

II. Fuisse huic contrarium genus, in quo semper fusi ventris mala vexabant, quæque a priori & diversam methodum medendi & victus rationem desiderabant.

III. Fuisse tandem genus, priora intercedens, tutissimum & facile curatu, neque peccans nimia obstructione, neque propter diarrhœam extimescendum.


Ex his colligo, epidemiam *Tecklenburgensem* sistere trifaria genera proxima febris biliosæ, vario modo


modo vel cum aliis morbis vel inter se complicata;
& in varias species, five morbos biliosos anoma-
los, vel huic vel illi generi vicinas, deducenda.

Cum ex descriptione symptomatum (p. 11 — 23)
differentia generica satis abundeque constet, pro-
ximum nunc est, ut tantæ diversitatis causam pro-
ximam propius inquiram, quam non nisi in diver-
sitate materiæ peccantis positam invenio.

Alia enim erat materiæ conditio in genere prio-
ri; alia in secundo; mixtæ naturæ in genere tertio.

In genere morbi priori, præter materiam bilio-
sam viridem, nigram, piceam, tetri odoris, quam
in omnibus morbis biliosis præsto esse scimus, nec
non in atrabiliaris, aderat quoque istud glutino-
sum spontaneum magni *Boerhaavii*; five materia
quædam pituitaria, summa tenacitate, forsan &
acrimonia prædita; in maxima quantitate intesti-
norum latera undique incrustans; pertinacissimas-
que obstructions alvi, loca alias pervia clauden-
do, & spasmos excitando, efficiens. Quæ iuncta
cum materia picea nigraque antea descripta mirum
in modum obstructions auxisse, eo minus miran-
dum, dum iam *Hippocrates: materiam atrabi-
lariam omnium fluidorum viscosissimam* pronun-
ciaverit.

Tam diversos corporis humani humores, bilem
puta atque pituitam, intimo connubio consociari
amare, sane admirandum, & res altioris indaginis
est: *plerumque tamen & vero consentaneum ani-
madvertitur, ambas simul, & bilem copiosam*




& *mucum intestinale* — *obesse*. * Qui plura de ortu atque effectu *materiæ mucosæ* scire cupit, adeat sæpius laudatum van den *Bosch* & Illustres viros *Ræderer* atque *Wagler* in Dissertatione de *morbo mucoso*.

Quod autem ad *materiam pituitariam* in nostris casibus attinet; singulari sane eget descriptione, haud plane omittenda, & vitrea mento nominanda. Vidi illam primo in illustri quadam persona, quæ singulari sane animi constantia, bis febrem biliosam tulit, tresque recidivas. Quæ cum ingentem vitreæ *materiæ* quantitatem excerni quotidie videret, comiter me, uti illi solemne est, admonuit: vitarem muco intestinali naturali, cuius exemplum legimus apud *Tulpium*, ** corpus privare, rationem interferens: pessima mala inde esse extimescenda. Verum enim vero symptomatum turbas, quibus antea ad orci limina rapiebatur, nunc educatione huius *materiæ*, leniri videns, in *mucum intestinale* naturalem, ne cogitatio quidem insidere potuit.

Est autem ista materia albumini ovi, aut si magis, succo baccarum visci quercini, admodum similis; alba, perlucida; haud parum elastica; in glebas ova columbina & maiora, quoad magnitudinem, æquantem sese colligens; in aceto vini vix resolvable; in terram proiecta globi instar se volvens;

in-

* van den Bosch l. c. p. 257.

** Observat. med, Libr. III. Cap. 17.

intestinis firmiter adhærens; etiam sine vermibus præfens, & multorum malorum* infra dicendorum causa; paucis, non abſimilis illi materiæ, cuius descriptionem dedit *Tulpius** & quam excrevit *Lipſius* ex relatione *Heurnii*.**

Quod nunc descripsi, quoad materiam, primum genus genus morbi, frequentissimum, in varias species atque morbos biliosos anomalos transire amabat. In pulmonibus atque in partibus his vicinis vehementes excitabat inflammationes; dein pleuritides spurias; febres catharrales; tussim; orthopnoeam &c. in partibus remotis arthritidem & eius generis plura, de quibus in parte II^{da} sermonem instituam. Aetas infantilis atque senilis; temperamentum cholericum — melancholicum atque phlegmaticum; mollis corporis habitus; cibi crudi atque valentissimi generis, ut pingua, dulcia, solani tuberosi quotidianus usus, nec non calida, corpora civium nostrorum ad hoc genus morbi apta reddiderunt. Est morbus longissimæ durationis, nec facile eliditur; hinc medela, tædii plenum opus.

Quum multi ex tædio, propter diuturnitatem morbi, vel omnia medicamenta negligenter, vel quævis oblata arriperent, febris putrida sæpe est orta; vel sero tantum, post longam luctam naturæ, convalescerent. Quamvis multos hoc morbo decumbentes viderim, plures tamen reliquiis materiæ

* Lib. II. Cap. 23.

** Vid. van den Bosch p. 256.



teriarum, quam febre ipsa, sunt interempti. Multi enim sine omni medicinarum auxilio sunt restituti, naturarum, mala sæpe optime averruncanti, omnem medelam relinquentes.

Secundum genus morbi, priori foedius, magis peccabat materia acri biliosa, quam pituitaria. Quæ magis fluida, & ad maiorem putredinem vergens, diarrhoeas pessimæ indolis efficiebat, atque causabat morbos mali moris, neque tamen ex classe febrium biliosarum excludendos, vel putridis, per eminentiam talibus, adnumerandos. Bilis viridis vomitu reiecta, & materia picca supra descripta, & sub finem morbi, cruditate superata, egesta, extra dubitationis aleam morbi naturam posuerunt. Neque enim morbum, in principio saltem, valde putridæ indolis fuisse, si a casibus parturientium vel vermium simul complicatorum discefferim, ex constantia virium patebat, diu permanentium, quamvis pulsus debilitas esset eximia. Et, ut absentiam exanthematum malignorum taceam, comprobatum hoc assertum fuit per ipsam methodum medendi, his morbis convenientem, & putridis non ex æquo aptam. Nam quod ad roborantia & præcipue ad Chinam attinet, in hoc morbi genere, præmature vel in nimis larga quantitate propinata, aperte nocuerunt.

Transire & huic generi solemne erat in suas species malignitate timendas. Sic febris lipyrica atque phrenitis pessimæ indolis mala, hic nominanda veniunt. Induit identidem naturam intermittentium; catharrhaliumque febrium; causatque
fe-

febres scarlatinas; arthritides; pleuritides; chole-
ram; colicam; quin & dysenteriam anomalam.
Sic autumnō 1779 cum Dysenteria, quae egregie
descriptam legimus ab Ill. *Leidenfrostio** nec non
a Cel. *Taube*,** vicinis locis haud levem cladem
inferret, his locis subortæ sunt Diarrhœæ pessimæ
indolis, atque dysenteriam exacte æmulantes. Ca-
sibus autem rite examinatis, mox apparebat, san-
guinis strias, quas alius atque alius excrevit, sym-
ptomatis munere bilis ad maiorem acredinem evectæ
tantum fungi; morbumque a vera Dysenteria lon-
ge discedere.

Quod ad durationem huius generis morbi autem
attinet, varius morbus existit. Diu durans, & pu-
tridæ sæpe indolis erat in senibus, & qui malam
diætam sequebantur; brevior autem in his opposi-
tis fuit, quibus providens natura id ipsum, quod
lædebat, e visceribus subinde cito propulsi. Ma-
xime acutus, nec spatii minime longi erat in homi-
nibus cachecticis, quod sequenti comprobabitur
casu.

Quadragenarius, spirituosus deditus, quodammo-
do obesus, phlegmaticus, facie inflatus, iam per
aliquot septimanas diarrhœa vexatus, incidebat die

C

3tio

* Dissertatio inaug. de Dysenteria, quæ 1779 late
graffata est. defend. Joh. Franc. Knicking.
Teutoburgi 1780.

** Taube, Beschreibung der herrschenden Ruhr im
Herbst 1779 u. s. w. Siehe Baldingers neues
Magazin 2ten B. 1. St.



3tio post celebratam venæsectionem, quam proprio suafu instituerat, in hanc febrem ardenti Lipyrice similem, ad quem circa mediam noctem vocabar: Febris erat ingens; dolor circa scrobiculum cordis urens; tussis continua; pulsus magnus atque citatus; sanguis sputo remixtus; anxietas magna; stertor iam primis morbi diebus præsens; sitis urens; diarrhoea continua; non levis ad vomendum conatus; lingua impura; excrementa multa, biliosa, aquosa.

Sequenti die, propter pulsus magnitudinem, aliquot uncie sanguinis per venam sunt missæ, quod malum vero non imminuit. Sanguinem missum crusta inflammatoria tegebat, multumque feri biliosi cruorem inundabat.

Circa vesperam, deliria, pulsus debilis atque mollis. Nox inquieta, Die 3tio reddebat urinam, quæ nubeculam nigram in suspenso gerebat. Pulsus iterum admodum magnus. Urgebant hinc adstantes, venam denuo aperire, mittebantque, me dissuadente, uncias circiter sex sanguinis priori similis. Hora somni pulsus debilis; respiratio impedita. Crescunt deliria, tussis, stertor; diarrhoea continuat. Applicata sunt vesicatoria suris, atque sinapismi plantæ pedum; dein clyster emolliens atque lubricans est iniectus. Sequitur autem nox turbulenta. Dies quartus, ut præcedens. Clyster est repetitus.

Die quinto in lecto æger detineri non potuit, & raultum in domo obambulabat.

Die

Die VIto abiit ad plures.

Per totum hoc tempus nil cibi sumsit; & semper habebat respirationem summe impeditam. Vomitus hinc medicamentis ciere non ausus sum. Propinata autem sunt temperantia acidula; succus expressus ribesiorum, * atque sal Riverii cum aquis analepticiis mixtum. Dedi etiam Ienia laxantia e.g. Tamarindos, idque feci auctoritate magni *Hippocratis*, qui *febres lipyricas non nisi cholera superveniente solvi* ** statuit. Qua in re mecum etiam consentientem videbam *Hollerium* apud *Baglivium*, qui posterior hanc febrem *cacochyram malignam* recte nuncupat, *coniunctam cum inflammatione, quam pauci effugiunt.* ***

Sed redeo ad institutum. In nonnullis, uti iam dixi, morbus longioris erat durationis, & nonnunquam a tempore, de quo dicit *Celsus*: *quod saepe in morbis incipiat esse praesidio, dummodo vita prorogetur*, multum solatii exspectans. Minus autem recte curatus vel transiit in febrem putridam, vel obstructions viscerum excitavit; provocavitque phthisin atque hydropem. Quid quod! illis malis secundariis plures sunt interemti quam

C 2

ipsa

* In magna quantitate eiusmodi succos propinare periculosum esset, quia, docente *Pringlio*, atque confirmante Ill. *Leidenfrostio* in *Diff. cit.* cum bile fermentant.

** Coac. praen. 7.

*** Bagl. p. 57.



ipsa febre, in qua subinde alvus tenerrima multorum aliorum malorum tutus fuit averruncus.

In tertio genere homines tutissimi erant. Cum nempe in eo neque materia pituitaria, neque acris, saltem non per eminentiam talis, peccaret, raro adfuit obstructio alvi, medicamentis non cedens; vel alvi profusio; in qua intestina desidendi atque oneris ferendi amiserunt moram.

Paucorum medicamentorum apparatus sufficiebat ad morbum, intra aliquot dies, debellandum, ægrumque in tuto collocandum. Perversa tamen adhibita medela, uti hoc sæpius usu venit, aliorum morborum fomites inde sunt enati.

Non carebat hoc genus suis speciebus, nec hic tacendis. Tussis; angina; pleuritis & vera & spuria; hepatitis levioris gradus, nominanda hic veniunt mala.

Etiam in his lingua sæpe muco bilioso, & ad nigredinem vergente obducta visa est; sed non tam firmiter adhærebat mucus, qui cultro facile potuit auferri.

Hæc pertinent ad genera febris biliosæ nostræ constitutionis epidemicæ, atque ad universum; infra, cum ad ea loca pervenero, quæ de morbis biliosis anomalis agunt, fusius & figillatim de singulis speciebus agam.

Transeo nunc ad *stadium tertium*.

STA-



STADIUM III.

Stadium tertium morbi id mihi venit, quod reliquis hac de re Scriptoribus reliquiarum nomine insignitur. Sic legimus apud CELSUM: potest morbus minus gravis esse, quam antea fuerat, neque tamen ideo solvi, sed RELIQUIIS quibusdam inhærere. At facilis verborum consensus, dummodo conveniatur in re

Singularem fane hoc stadium desiderat animadversionem. Quærenda hinc sunt primo signa, unde constet, an inutilis materia corpori adhucdum superfit. Cognoscimus autem hoc vel revocatione in memoriam eorum, quæ, durante morbo, hunc eventum præsagire valuerunt; vel intelligimus hoc ex signis præsentibus. Quod ad primum attinet: de eo edocemur vel per absentiam signorum costionis; vel si evacuantia plane sunt intermissa, aut in non sufficiente quantitate propinata; vel denique si inutilia laxantia, talia nempe, quæ de *intento atque inflammato nihil auferunt, sed ea, quæ morbo resistunt, colliquefaciunt, debili evadente corpore*, * sunt data.

Symptomata præsentia autem, id demonstrantia, erant talia. Sensus ponderis circa scrobiculum cordis, eiusque pulsatio; tensio instar fasciæ adstrictæ infra umbilicum; dolor illam hepatis regionem occupans, quæ vesiculæ felleæ regionem indicat; appetitus ad cibos non rediens, vel naturali maior; pigri-

* Hippocr. de victus rat. No. 36.




pigritia alvum exonerandi; excrementa nigra, atque præ tenacitate recto intestino adhærentia. Vires his non redeunt; macilenti sunt; sæpe fiticulosi; & somnus nunquam non est turbulentus; Plerumque autem ex lingua desumpta signa certissima, atque minus fallacia erant. Videlicet linguæ radix in his impura adhuc restat, reliqua & maxima parte munda. Quando vero primas vias reliquit materia, & fluidis C. H. sese insinuavit, five partem aliam occupavit: alia signa, infra enumeranda, non erant negligenda.

Quod vero ad signum ex lingua desumendum attinet, unde constabat, partem quandam materiæ biliosæ in intestinis adhuc dum latere: sciendum est, fugientibus oculis hoc facile occultari, & morum elegantiae adsueto, non nisi admonitos, ringendo linguam ostendere. Inspicienda autem eius radix, locus, in quo nervos fungiformes atque foramen cæcum ostendunt anatomici. Ibi tenax atque viscida materia, quæ instrumento auferri non potest, ad fauces porrecta, abscondita latet. Similem linguam in morbis biliosis anomalis, nec non in multis præterito autumno ex *Hollandia*, febre biliosa tunc temporis fertili, redeuntibus, observavi. Qui posteriores præmaturum corticis chinæ usum ad unum omnes accusabant; & hinc solventibus atque laxantibus, diu continuandis, opus habebant.

Longe autem acrior, quam præcedens, casus iste est, quem homines subeunt, in quibus talia signa non adsunt, & qui, ut *Hippocratico* loquar more,
 non

non *secundum rationem levati sunt*, neque tamen bona sua suspecta habent, sed se restitutos credunt, corpore adhucdum existente impuro. Usq̃ hoc interdum venit; & hinc sub herba latens anguis, eo magis extimescendus.

Vidua 69 annorum, ætate &, antea passis morbis, viribus quodammodo fracta, mense Junii 1779 incidebat in pleuritidem biliosam. Vix convalescere, & a materia biliosa liberari inceptit, cum subito in urbe exortum est incendium, quod ægrotantis propriumprehendit domicilium. Quæ terrore panico & debilitate fracta, neminem, qui igni eriperet, videns, & hinc propter ingruentem noctem ferme plane desperans, tandem, tignis iam iam labascentibus, in filio alterum invenit *Aeneam*. Totam noctem sub divo degebat, & non ante matutinum tempus in familiaris cuiusdam domum deportabatur, ubi illam videndi causa, eodem die, adii. Semimortuam putabam, quam sellæ insidentem, quod antea nondum potuit, videbam, ab omni febre doloreve liberam. Linguam impuram videns, bonam valetudinem suspectam habere incepti. Admonui hinc: nollet nimis tuta esse. Sde vix aliquot dies erant elapsi, cum illam, sine ulteriori egestionemateriæ biliosæ, plane restitutam audirem; neque ulterius medicamenta optabat hæc ægra. In hoc statu falsæ integritatis, quam semper timui, permanfit usque ad finem mensis Septembr. e. a. muniis suis, absque omni incommodo, & alacriter vacans, quamvis omni hoc tempore linguam impuram haberet. Tunc colica biliosa, quæ




quæ in passionem iliacam abiit, subito illam coram
reptam rescivi. Tentata quidem sunt varia; sed
die morbi octavo, dira morte est extincta.

Sed hæc pertinent ad universum, & ad signorum
rationem. Nunc videndum, quid ex reliquiis oriatur.

Primo nominanda est proclivitas recidivandi, quæ
in hoc morbo tanta est, ut maior in alio esse ne-
queat. Supra iam mentionem inieci feminæ cu-
iusdam tribus recidivis vexatæ: sed hoc non adeo
mirum, quam quod sequitur. Nota mihi est fe-
mina, mobili genere nervorum prædita, & ingenii
acumine præclaro, quæ intra triennium novem
recidivas febris biliosæ primi generis, & unam se-
cundi generis febris subiit, sua ipsius culpa, pro-
pter quotidiana in diætâ commissa vitia. Nam cum
ita semel restituta progredi non poterat, fere re-
tro, quasi ruina, revolvebatur. Accidit etiam
nonnunquam, recidivas tam longo temporis inter-
vallo videre recurrentes, ut dubium oriretur, utrum
quilibet insultus pro recidiva, vel pro nova febre
sit habendus. Vidi puellam rusticam quater mor-
bo recurrente, singulo trimestri, laborare. Dein
neque silentio prætereunda est annotatio: recidi-
vas anni temporibus quodammodo fuisse adstrictas.

Quod nunc ad causas, recidivas excitantes atti-
net, primariæ sunt sequentes, ab observationibus
desumptæ:

1. Neglectus medicamentorum resolventium, at-
que evacuantium legitimorum.



2. Præmaturus usus medicamentorum tonicorum.

3. Abusus carnis, lactis, vel alius generis valentissimi.

4. Refrigerium corporis; atque anni tempestas frigida, humidaque.

5. Animi dein pathemata; mensium eruptio impedita; aer impurus, atque munditiei neglectus; morbi alii &c.

Quamvis cuiuslibet commatis exempla in medium proferre non difficile esset, tamen exemplo illius personæ, quæ decem recidivas subiit, rem illustrasse sufficiet. Quæ, uti paulo ante dixi, ullis regulis diæteticis sese adstringere recusans, carnem suillam, & pingua, nec non dulcia, quæ bili creandæ favent, in deliciis habebat quam maxime; neque omittendum esse lactis usum putabat. Paucis, ut verbis *Celsi* utar: *liberaliter agere secredebatur, cum cætera arbitrio medici relinqueret, in genere cibi autem se liberam æstimans.* Hoc commune est vitium civium nostrorum: quod gula nimis indulgeant.

Sed eadem femina alio tempore per corticis chinæ usum, cui, propter antea inde perceptos bonos effectus, nimis fidebat, recidivam excitavit morbi generis prioris; cum e contrario, in secundo genere febris, nil mali ex hoc medicamine sit experta. Ut reliqua taceam, confirmantur hoc exemplo egregie ea, quæ supra de differentia generica febris biliosæ cum lectore communicavi. Sed hæc de recidivis sufficiant. Nunc alii morbi, ex reliquiis mate-



materiæ biliosæ enati, enarrandi. Ingenti sane horum morborum varietate abundamus, quorum gravitas vel ex nobilitate partis affectæ; vel ex duratione morbi; vel ex urgentibus symptomatibus; vel ex ipsa denique materiæ natura æstimanda est.

Succedunt mox febres intermittentes, quotidianæ, tertianæ, quartanæ rebelles; mox lentæ nervosæ, vel mere lentæ. Hæ febres vel solæ, vel cum aliis morbis complicatæ procedunt. Febris quartana, coniuncta cum hydrope, ascite atque tussi ingenti, exceperat febrem biliosam, qua homo mihi amicissimus diu, alio loco, decubuerat. Posteaquam illum a materia biliosa liberaveram, per corticis chinæ atque millepedum usum, cui decoctum pectorale interponebatur, adspirante summo numine, fausto eventu hoc malum debellavi.

Morborum chronicorum ditior adhuc proles, & ægre detegenda.

Occupabat interdum parvam, five singularem corporis partem materia, ut ventriculum, hepar, lienem, mesenterium, pulmones; hæcque loca, obstruendo, vehementer lædebat, & ad alios morbos secundarios, ut ad cachexiam, hydropem, morbum regium, phthisin atque tabem corporis, disposita reddebat. Quid quod! ad cerebrum vi rus istud rapi, sæpius est visum.

Ante annum & dimidium, febre biliosa tertii generis, laboraverat vir quidam robustus atque
spi-

spirituosus deditus, qua non ex artis reguliserat liberatus. Varia ex ventriculo mala postea sensit, quibus dein singultus atque vomitus accedebant. Pulsus erat admodum intermittens atque inconflans. Tandem post aliquot menses, variis & a medicis & a medicastris adhibitis medicamentis, vertiginosus, tanquam vino fartus, concidit, & subitanea morte est peremptus, de ingenti capitis dolore antea conquestus.

In puero 12 annorum, non purgato, iam ex toto, ante aliquot dies, quieverat febris, cum frigus vespertinum illum feriret, unde mala materia repressa in partem maxime nobilem, in caput nempe, incubuit subito. Tetanicus fixis oculis lunam obtuscescebat, cui vota solvere credebant parentes iudæi, non prius de morbi nequitia convicti, quam cum puerum convulsam viderent, atque mirum in modum distortum. Nunc illum, cui alba oculorum grandescabant, arripiunt, quique post aliquot horas, syderatione tentatus, immobilis iacebat per aliquot dies.

Vesicatoria variis corporis partibus, quia id vitium non aliam curationem admittebat, & quia satius erat, summam cutim corrumpi atque exulcerari, quam id, quod nocet, in interiores partes verti, sunt imposita. Postea autem, cum sensus & ratio redirent, aliis medicamentis, locus est datus: nondum tamen plane convaluit puer.

Sequar



Sequar nunc illum casum, ubi toti corpori in-
hærescit, atque per singula membra, perque flui-
da quæcunque ita disseminatus est fomes biliosus,
ut nulla ferme pars ab illo libera sit, hominesque
in horrendas calamitates, vix aut ne vix quidem
curabiles, deiiceret, instar exempli sequentis.

Femina obesa, nullius diætæ, 48 annorum,
difficulter & post aliquot demum septimanas, ne-
que ex toto, quia medicamenta odio prosequeba-
tur, ex febre biliosa emerfit, post varios conflictus
naturæ. Quæ cum a reliquiis materiæ purgari
recusaret, in febre peiora mala, anni spatio vix
superabilia, quia omnia fluida materia biliosa erant
inquinata, incidit, paucis nunc enarranda.

Nunc aderat purpura chronica; nunc in bullas
elevabatur cuticula uno loco, quæ altero scedaba-
tur ulceribus; mox materia tussim excitabat, paulo
post in caput irruens, oculosque offendens, ubi fi-
stulas lacrymales excitavit. Somnus erat inquie-
tus, summisque anxietatibus turbatus; neque ani-
mo ulla erat quies. Appetitus nullus; fitis in-
gens; horror frequens.

In pedibus erant spasticæ contractiones, præ-
cipue durante nocte, & in abdomine gravis dolor,
motus convulsivos æmulans, viscera fatigabat, fla-
tibus auctus. Spiritus infra non trans mittebatur,
& venter erat varius, maxime vero fufus, in quo
materia, gravi odore molesta, partes, propter
acrimoniam, arrodens, valde peccabat. His tan-
dem



dem successit status cachecticus, ex quo, cum urina parce flueret, incipiens hydrops, ascites. Motus febriles erant aperti; atque incommoda circa pectus augebantur quotidie. Paucis, conclamata habebant omnes, quæ tamen, infra enarranda medicina, eo malo, magna ex parte, est liberata.

DE NONNULLIS SYMPTOMATIBUS.

Symptomatum plurimorum supra quidem a me exposita ratio est, & hinc superfluum videri posset, his de novo immorari. Sed cum id agam, ut lectoribus differentia, quæ inter symptomata, atque inter morbum anomalum intercedit, pateret quam maxime, seorsim symptomatum nonnullorum mentionem iniecisse, non abs re esse putavi. Hoc loco autem illa symptomata tantum exponam, quæ vel rarioribus sunt adnumeranda, vel quæ propter singularem subiecti conditionem, in quo deprehendebantur, memoria quædam digna continent, neque in stadio secundo enarrata.

Sic, ut per exempla res agatur, nonnulli, citra inflammationis indicia, sanguinem tussi reiiciebant, qualia exempla etiam cum orbe literato communicavit Cel. *van den Bosch*.* Hæmorrhagiarum nunquam non symptomaticam, minime criti-

* L. c. p. 297.



criticam vidi, quod itidem observavit *van den Bosch*.* Convulsiones atque animi deliquia non nisi in parturientibus vel verminosis sunt observata, in quibus etiam urinam, præter voluntatem, elabentem vidi; cum feminæ hystericæ e contrario, non sine dolore, vesicam exonerare possent. Aphoni tantum pueri sunt redditi, in quibus etiam *Tulpius*** hoc symptoma vidit: & in senibus modo erat deglutitio impedita, pessimi ominis. Subinde vexabat singultus, magis circa finem quam in initio irruens. Tussis; salivatio; atque levis angina, molesta erant his, qui purgationem nondum sumserant: purgati autem, ab his malis, uti & a singultu, liberati sunt inventi. Pulsus intermittens tam parum instantis mortis, ex præsagiis medicorum *Sinensium* atque *Japonensium**** certum semper indicium, quam raro ex pulsationibus scrobiculi cordis, mania extimescenda. Proclivis autem fuit obsurdescentibus infania. Dein, tantum abfuit, ut post ingentes anxietates præcordiorum, pustularum eruptionem viderim, quas tamen intimo connubio coniunctas agnoscit *Huxhamus*; ut nullas magis pustulas vel miliares, vel petechias, quamvis illæ causæ non deessent, quæ ex sententia Cel. *Hæmii*, his exanthematibus gignendis, aptæ erant, in febre biliosa, oculis unquam usurpaverim.

Tandem

*L. c. p. 168.

** L. c. Cap. 39.

*** Vid. Cel. *Gruner* in *Semiolog.*

Tandem alvi proluviei nonnullorum sanguis purus interdum fuit admixtus, quod imperitos fefellit, ut morbum pro dysenteria haberent. E contrario alba vel purulenta dysenteria laborare crediti sunt illi, quibus, auxiliante natura, materiæ pituitariæ magna quantitas fuit egesta, quod & *Lipſio*, uti iam ſupra monui, evenit.


DE NONNULLIS COMPLICATIONIBUS.

Pravtatem morbi noſtri epidemici non magis videre eſt, quam in complicationibus, quæ etiam diſcrimina recipiunt. Nam cum non ſolum vitii ſed & curationis ratione a præcedentibus diſtent, omnimodam medici deſiderant attentionem. *In iſta enim morborum curatione non tantum aſſiduo ſpeculatu uti debet medicus, ut cauſas ſedesque malorum, quoad fieri poteſt, perſpiciat, ut naturæ vires & copias accurate æſtimet, ut opportunitates agendi diſcernat; ut idonea inveniat medelam; ſed & futuros caſus velut ex ſpecula proſpicere, ne inexpectatis eventis identidem conturbetur, neve intempeſtiva medicatione ægris ac ſibi ipſemet plus noceat, quam proſit.**

Morbum complicatum non cum morbo anomalo eſſe confundendum, iam ſupra monui: interim difficile interdum, id præſtare, propter ſummam, quæ inter hos morbos intercedit, ſimilitudinem.

Poteſt

* Vid. Ill. *Habnii* orationem de medico ſpeculatore Lugd. B. 1775.



Potest enim æque facile morbus, *Sydenhamo intercurrentis* dictus, *prædominans epidemicum imperium*, præeunte Perill. van *Swieten*, * *sentire*, quam ut ipsa materia biliosa, certa modificatione prædita, eundem excitet. Sic pleuritis febris biliosæ superveniens, sistit morbum complicatum; cum e contrario, morbi anomali nomen fert, quando illam a materia biliosa ortam scimus.

Morbum complicatum tibi concipere debes, instar morbi, cui inest vis intensa, optime dixit Cel. *Nietzki* in egregia Differt. de *Febribus complicatis* **. Innumeris observationibus rectitudinem huius asserti confirmare possem. Sed cum nimis longum foret, singulis complicationibus inhærere, neque id esset admodum proficuum; maxime memorabilibus & in praxi medica bene attendendis expositis, reliquas filebo.

Primo loco ponenda est graviditas. quæ, quamvis ipsa morbus non sit. tamen ob eam causam, quia negligitur, eo magis periculosa. Nam cum, durante graviditate, exorta mala, uteri incremento tribui soleant indiscriminatim: haud mirum, vel sagacissimas feminas, quin & medicos, hac in re, decipi, quam frequentissime. Videre hoc in nostra epidemia quotidie contigit.

Multæ, quarum conditio tolerabilior, conflabantur symptomatibus stadii Imi, quibus dysuria

* Vid. Commentar. Tom. V. p. 153.

** Halæ 1753. p. 51.

ria & pertinax alvi obstructio accedere solebant. Aliis, propter continuos vomitus, vel dolores dorsi artuumque, partus, ante definitum tempus, erat extimescendus; in paucis tamen tantum abortivus, sive præmaturus. Acrior quidem casus illarum erat, quibus ipsa febris insurgere cœpit; quæ tamen ut plurimum servatæ sunt, dummodo adhuc a partus tempore abessent. Quando autem correptis febře partus instaret, vix hac re quidquam potuit esse calamitosius. Nam sopore atque rigore detentæ, vel convulsionibus iactatæ, paucas horas, post partum editum, moriebantur vix non omnes, vel saltem triplo solito plures. Neque primiparam 36 annorum, cui brevi ante partus tempus febris biliosa incurfabat, quamque, propter viarum angustias & dolorum legitimorum absentiam, forcipe *Levretiana*, feliciter quidem satis, ab infante robusto liberaveram, a morte insequente servare potui.

Similem feminæ, ad quam propter difficilem partum, die, a quo inceperant dolores, secundo vocabar, præfagire debui eventum fatalem. Brachium infantis, pridie adhuc vivi, ad humerum usque ex partibus verendis propulsum, & bullis nigricantibus, sphacelum indicantibus conspicuum, uteri matrisque, iam ante aliquot tempus, variis symptomatibus febris biliosæ, & præsertim diarrhœa, atque talibus, quæ *Epicratis** uxori acciderunt, vexata, statum putridum satis superque

D indi-


* Vid. Hippocrat. de morbis vulgar. Libr. I. Æger V.



indicabat, quem manus mea, infantis situm explo-
randi causa utero immissa, humore nigro foedoque,
non sanguine, conspurcata, satis superque confir-
mabat. Auxilio hinc succurrere primo recusabam
certa morte perituræ. Sed propter adstantium
continuas preces, nollem miseram hanc deferere,
fidem dedi marito, me quævis quidem in arte po-
sita velle tentare; nihil cæteroquin promittere.
Immissa hinc utero manu sinistra, quia dextræ ob-
stabat caput, infantem pedibus arreptum, secun-
dum regulas artis, quas hic describendas præter-
mitto, quia de his apud auctores, qui de arte ob-
stetricia scripserunt, inter quos Cel. *Stein* emi-
net, quem honoris atque reverentiæ causa com-
pello, quia præceptore illo sum usus, legi potest,
in situm illum commutavi, ut hæ partes locum
inferiorem occuparent. Qua cita, quamvis diffi-
cili, nec tamen, quod pessimi ominis erat, vix do-
lorem excitante operatione, tantopere afflicta est
parturiens, ut spiritum ultra trahere nesciret. De-
stiti hinc a proposito, ne manibus auxiliatricibus
mortis inevitabilis, a male volentibus, tribui pos-
set causa. Quia autem propter ingruentem noctem
domum me conferre non poteram, maritus atque
ipsa parturiens, quæ post assumpta antiseptica atque
analeptica vires quodammodo collegerat, lacrymis
me adierunt: vellem ab infante liberare, certissima
morte alias extinguendam; manus dedi victas, &
infantis cadaver extraxi ex utero.

LECTO nunc assidens, ex inquietudine atque ri-
gore, quo nunc parturientem videbam prehendi,

me



me recte præfagiisse, mox animadverti. Postero enim die, fato cessit, optime confirmans illa magni Hippocratis: *Quæ ante partionem in modum cholæræ morbi affliguntur —; febræ tentatæ, maligne habent, tum vero præcipue, si quid fauces vexet, aut in febre maligni aliquid appareat.** Confirmatur etiam novo hoc exemplo sententia Cel. *Ernesti Platneri: *** citra inflammationem, malignam gangrænam incipere posse, sistentis. Partum enixis frequentior quidem erat febris casus, sed minus periculosus. Recta adhibita medela servatæ sunt, quæ me medico satis mature utebantur, quantum scio, omnes; cum e contrario, vel nullis vel perversis adhibitis remediis, interierint haud paucæ, febre putrida antea accensa. Febris his accedebat vel eodem partus die, vel secundo, vel, quod frequentius, die 4to, *** ingenti abdominis dolore stipata, & per stadium primum, iam diu ante editum partum, prædicta. Dolor regionem inguinalem occupans, cum duritie quâdam & tumore insignis, uterum inflammatum arguere videbatur, cuius suspicionem lochiorum interceptus fluxus, qui tamen in aliis aderat, quodammodo auxit. Sed accurato instituto examine, quod eo melius, propter propriæ meæ uxori morbum

D 2

fieri

* Vid. Coacar. prænot. No. 535.

** Vid. Supplem. IVtum.

*** Plerumque epidemiæ phœnomena ad 4tum stumve a partu diem, lacteæ forsan febris opè, in actum ducebantur. Vid. van den *Bosch* l. c. p. 241.



fieri potuit, inflammationis memorabilis metus cito evanidus est redditus; dum saburra biliosa, haud ægre detegenda, atque spasticas in intestinis contractiones excitans, nunquam non in his sit visa, methodoque medendi comprobata. Nam vix aliis, quam contra febrem biliosam, infra laudandis remediis, opus habebant parturientes, venæsectione atque corticis præmature usu, in deterius ruentes. Paucis; æque in his casibus, morbi dominantis ratio erat habenda, ac fermentum febris intermittens, in parturientibus a *Mortono* accusatum. Iisdem medicamentis, quibus *Mortonus* utebatur, Opio nimirum atque China, febre nondum in statum putridum mutata, meas, nullus dubito, iugulassent ægrotantes. Quibus autem, propter perversam medelam, vel propter malam humorum qualitatem, id vitii genus accedebat, haud procul ab inflammationis vel febris putridæ periculo, quo vix subtrahebantur, aberant.

Molesta etiam erant feminis lactantibus incommoda febris, quæ maxime tunc temporis insurgebant, quando præmature lectum desererent, vel vitia in diætâ committerent. Tussis his accedebat, & proclivis erat lentescens febris. Proxime præcedenti accedit malignitate complicatio verminosa, dirissimis symptomatibus, & nonnunquam febre putrida stipata, genti iudaicæ, durante hac nostra epidemia, admodum molesta. Sed cum hac in re, doctrina atque experientia præ aliis eminens *Celvan den Bosch* adeo multus fuerit, ut eius observationibus plura addere vix possibile videatur, ad hunc

hunc auctorem , qui egregie dixit : *attentiores practici iam dudum observarunt , vermes in constitutionibus epidemicis biliosis , præ ceteris grassari* , * quemque nocturna diurnaue manu volvisse non poenitebit , lectores ablegatos volo. Mo-
neo tantum : hac in nostra epidemia , vermes præ aliis partibus , ventriculum maxime irritasse , & hinc sæpius per vomitum , cum plenaria morbi solutione , esse reiectos. Ad ductum naturæ vomitoria hinc sæpius utiliter tentavi.

Dein , symptomata ex sententia *Hæmii* maligna , nunquam frequentius , quam sub statu colluviei vermium sunt inventa , febrisque vere putrida inde sæpe accensa.


Tandem non prætermittenda animadversio *Cælii Aureliani* multoties confirmata. *In augmento accessionis februm* , inquit , *exclusi vermes turborem altiorum partium ostendunt , & magis si fuerint sanguinolenti : in declinatione vero , laxamentum , sicut cætera , hoc est stercoreum vel urinæ , vel quorumlibet officiorum egestio. Etenim laxatis corporibus reddi videntur.***

Post gravia vulnera , præcipue post vulnera capitis , identidem febrem biliosam , cuius antea ne vestigia quidem adfuerant , excitatam vidi , mox suppurationem parum retardantem , mox vero ulcus

ma-

* Vid. l. c. pag. 122.

** Vid. *Cælii Aurelii* de morbis chron. Lib. IV. Cap. VIII.



malignum irritantem. Neque febris, neque vomitus viridis bilis, unquam in his erant in ratione vulnerum, sæpe iam sanatorum, febre a tenore nondum remittente.

Femina octo mensium gravida, in terram incidens, forfice acuta percussierat genu ad patellam usque, osculo angusto vulnere hiantem. Primo die neglexit malum; secundo autem Chirurgum vocari iussit, qui vulnus aperire negligens, emplastro tegit; tertio accenditur febris acuta, & biliosæ indolis, partibus vicinis ingentem in modum intumescentibus; quarto, loco puris, fertur sanies; quinto accedit insania; sexto, cum ego vocarer, sine omni sensu, partum edit mortuum; extincta est die nono.

Sequar nunc illum casum, qui vel tussim inveteratam, vel aliud pectoris vitium latens coniunctum habet. Febris biliosa his superveniens, propter tussim admodum molestatam, identidem, non tamen semper, quod sæpius sum admiratus, excitavit vel talem vel phthisin corporis. Quando autem tussi biliosæ, iam diu antea corpori inhærescenti, accederet febris, putrida ea est interdum reddita, quæ præceps afferret periculum. Tussis biliosa, gravis atque sicca, per multas septimanas, excercuerat puellam 20 annorum, ferme tabidam inde redditam, cui, post assumptum emeticum, quo magna quantitas materiæ biliosæ fuit egesta, subito accensa est febris putrida.



Mala etiam, quæ cum erysipelate coniuncta procedebat, complicatio nominanda nunc est, dum facili negotio, quod nuper adhuc vidi, nervis antea stupefactis, in gangrænam vertitur. Jam sæpius antea igne sacro laboraverat patiens, cucurbitularum, ipsi loco affecto applicatarum, ope, cito semper sanatus. Sed hoc auxilii genus, quamvis suaferam, nunc neglexerat æger, potius in repetita venæ sectione, ab Ill. *Zachar. Platnero** reiecta, custodiam quærens; unde tantopere vires ei sunt fractæ, nervique stupefacti, ut mirum non esset, morbum, levi febre biliosa auctum, in gangrænam abeuntem videre, optime sic confirmata sententia Cel. *Ernesti Platneri*.** Solo corticis usu superari hoc malum non potuit, sed laxantia atque acida huic medicamini erant iungenda. Externæ autem efficaces contra morbum erant profundæ scarificationes.

Omniū pessima complicatio illa, quæ cum variolis oriebatur. Non sine insigni animi mœrore febrem, vel magis pestem variolosam, primo vere 1779, in hac nostra urbe, pessime sævientem, nominare queo. Nam cum multi civium nostrorum, durante hac tempestate, febre biliosa laborarent: istud virus, undique versum, adeo est disseminatum, ut & corpora infantilia occuparet. Cui adjunctum virus variolosum, eheu! quantam stragem nostræ urbi intulit. Variolæ secundo statim die

* Vid. Chirurg. p. 77.

** Vid. Supplement. IV. p. 101. &c.



die erumpentes, vix se elevantes, statim regredientes, iam quinto, post eruptionem, die, sphacelascere incipiebant, neque ullum servabant typum. Quare recte pronunciavit optimus Præceptor Cel. *Nietzki: Quo magis typus febris complicatae, a typo febris simplicis abhorreere videtur in casibus subnatis, eo maior hic quoque differentia obtinebit, nec difficultate carebit, cognoscendi initium, incrementum, statum & declinationem.** Omnia signa bilis ex ore, lingua, vomitibus viridescantibus, & excrementis nigris desumenda, nunquam non aderant. Inter has calamitates, quibus puriora pectora dederat Titan, pauci de inoculatione variolarum serio cogitare coeperunt. Divertebantur ad me adhucdum hæsitantem: cum autem precibus instarent, ulterius resistere non valui. Primum esse putavi, corpora a materia biliosa liberare, atque dein liberata inoculationi submittere. Quod ita præstitum, egregios edidit effectus: Sic enim benignis variolis, vita infantum fuit servata.

DE NONNULLIS DIGRESSIONIBUS.

Morbus, qui neque complicatus, neque anomalus dici potest, a legitimo tamen ordine defleat, singularem quoque desiderat animadversionem. Eiusmodi casus autem in nostra epidemia minime defuere. Sic febris interdum tam brevis fuit decursus, ut intra nycthemeri spatium esset
abso-

* Vid. Elementa Pathol. p. 571.

absoluta: ephemeram dixisses, nisi a natura vomitum biliosum excitatum, vel diarrhoeam salutarem vidisses. Sed quanto peior morbus in casu sequenti! occupabat nempe febris biliosa plures in eadem domo decumbentes, inter quos puero decem annorum, ex pustula circa angulum sinistrum oris, tam pravæ indolis ulcus est enatum, ut non solum hunc angulum, sed etiam huius lateris buccas, imo & gingivas, ad ossa usque, sphacelo, pessimum odorem spargente, trium dierum spatio, penitus consumeret, & morte insequenti, calamitatis pueri, & quatuor aliorum, simul in eadem domo decumbentium, egenorumque hominum, optimum sic imponeret finem.

An casus sequens etiam hic locum habet? Vidi hominem primis morbi diebus laborantem febre biliosa regulari, quæ autem dein alternis diebus remissior est facta. Die exacerbationis autem alto sopore, per aliquot horas, sepultus iacebat homo, haud absumilis casibus magni *Werlbosfi*. Febrem semitertianam soporosam dixisses. Quod restat, medicamentis antibiliosis feliciter & brevi est restitutus. Chinam vero non ante plenariam educationem materiæ biliosæ sumsit.

Maxime etiam a statu illo benigno, in stadio I. & II. enarrato, recedebat sæpenumero febris, natura sua maxime biliosa, sed perversa victus ratione, vel arte medica perversè applicata, in synochum putridam mutata. Aequè de his, quam de illis complicationibus paulo supra commemoratis,



tis, optime pronunciavit Ill. *Vogelius*: ejusmodi vero febres, aperte vel ad intermittentes quotidianas, vel ad synochum putridam pertinent; nec ut nostræ biliosæ, sed ut malignæ putridæ curari debent. Sed quæ his subiungit Cel. auctor: adeoque nomine biliosarum latiore ac improprio sensu, ceterum confusiones multas pariente, insigniuntur,* ad me pertinere non videntur. Nam eadem materia simplex, non turbata, nec cum aliis morbis complicata, quæ in his febrem biliosam accendebat, in aliis, quod infra docebitur, morbos non febriles, ut tussim, sanguinis profluvium, & eius generis plura, irritasse est visa. Taceo exemplum Cel. *Tiffoti*, qui epidemiam *Lausannensem*, biliosam nuncupat. Provoco magis ad methodum antibiliosam. Sic in casu novissime proposito China carere potui, quia non ea erat exquisita semitertiana, in qua, monente *Lommio*, paribus fere portionibus & intermittentis tertianæ, & cotidianæ continuæ subest materia.**

DE CRISI, SIVE DE NATURÆ MOLIMINIBUS.

Judicationem perfectam, quam, interpretante *Lommio*,*** & fidam, & certam, & securam, & evidentem esse decet, raro in hoc morbi genere absolvit sibi relicta natura, sed corpus ut plurimum, diu post febrem superatam, materia inutili onustum restat.

* Vid. Prælect. p. 58.

** Observat. med. p. 21.

*** L. c. p. 40.

restat. Neque etiam crises subitaneas hic tuto expectare possumus. Rari saltem sunt casus, in quibus natura omnem vim morbi, uno impetu depellit. Emeticum præscripseram homini valde id odio habenti; hinc sumserat pharmaci partem tantum dimidiam, quæ vomitum non ciebat. Jussi hinc, id sequenti die repetere. Sed quid evenit? Nocte, quæ secundo emetico anteceffit, somno evigilans, & emeticum se sumsisse per insomnia credens, vomuit vicibus repetitis, & sequenti mane ferme sanus prodiit.

In aliis, ad depellendum hostem, non ita prompta auxiliatrix inventa est natura. Dies enim iudiciales haud tanti, in hoc morbo, esse valoris, quanti in aliis æstimantur, vel mea vice, *Baglivius* testatur, inquiens: *sæpe inutile vidi esse dies criticos, eorumque vim atque potestatem observare.**

Urinam nullo alio in morbo tam variam, tamque inconstantem vidi, quam in eo, de quo sermo fit; quod vel longitudinis vel periculi, ut iam antea dictum est, indicium erat. Febres tamen tertii supra positi generis, atque cum inflammatione quadam coniunctæ, excipiendæ, dum, non turbatæ, diebus criticis essent adstrictæ, & laudabile quid in urina deponerent. Reliqua genera autem solvebantur lenta lyfi, successive, e corpore, materia egrediente, per vias, materiæ biliosæ maxime vicinas.

Quod

* L. c. p. 52.



Quod si qua animadversio in curatione horum morborum attentionem meretur, certo hæc modo dicta, quæ medici consillium; in diiudicandis casibus dirigit, decernitque: *an in incipientibus morbis aliquid sit mutandum*; vel quamdiu in *vigentibus quiescendum*,* memoriæ est mandanda.

Viæ, per quas materia e corpore ducitur, variae sunt inventæ. Plerumque hoc fit vel per vomitum; vel per diarrhœam; nonnunquam per sputa; raro per sudorem, vel exanthemata chronica; nunquam, quantum ego animadverti, per hæmorrhagiam.

Metastases raro vidi. Sequens casus tamen memorabilis. Puer sex annos natus vix febrem superaverat, cum illi crus dextrum tumere atque dolere inciperet. Parentes & ego ulcus futurum expectantes, cataplasmata calida loco affecto imponi curavimus, sed absque effectu bono. Nam nulla neque magnitudinis neque duritiei mutatio incruere est inventa. Propinata hinc sunt medicamenta resolventia atque diluentia. Urina nunc non solum liberior fluere, sed & materiam albam gelatinosamque deponere incepit, cum decremento tumoris. Continuatis dein diureticis atque resolventibus, dolor disparuit; & tumor, materia per urinam quotidie secedente, evanidus est redditus.

Parotides, tantum bis, ad summum, ter, vidi.

DE

* Hippocr. Aphor. II. No. 29.



DE SALUBRITATE FEBRIS BILIOSÆ.

Id sane ex sententia *Celsi* mirum: *eandem rem corpora affligere, atque in aliis saluti esse posse.*

Quid febre biliosa deleterius? quid varia eius forma generi humano gravius? An salutare potest esse id, cuius pravitatem in singulis paginis nunc demonstravi? Sed ita sane providentia naturæ, tam diligentis tamque solertis esse iussit, ut inde, monente *Cicerone*, possit intelligi, *quantæ res hominibus a Deo, quamque eximiae sint tributæ** Ab obstructionibus viscerum inveteratis, & præcipue a mala digestionem, ex cruditate atque visciditate orta, liberatos, post febrem, vidi haud paucos. Senibus præcipue, dum viscidam materiam gerant, id evenit quam maxime. Orthopnoea atque asthma iam multis retro annis laboraverat virgo 40 annorum, quæ febre biliosa, ab his, felici liberata est eventu. Innotuit mihi dein alia femina, quæ diu ante febris incursum, miris phantasmatibus melancholicis torquebatur, quæque vim medicam febris, contra hunc morbum, sensit egregiam. Reliqua exempla nunc taceo.

DE METHODO MEDENDI.

Hactenus de morbi natura disputata sufficient. Nunc methodus medendi æstimanda, atque ita tradenda esset, uti cuilibet studio atque generi, convenit quam maxime.

Quævis

* *Cicero de natura Deor.*



Quævis huc spectantia capita paucis verbis attingam, observationes meas magis interferendo, quam generalem methodum medendi, febris biliosæ accommodatam, monstrando, iam a celeberrimis in arte medica viris, ut *Pringlio* atque *Tiffoto*, quorum opera in manibus omnium versantur, satis superque expositam.

Curationis principium autem ab animadversione *stadii primi*, sive illius temporis, quod futuræ valetudinis notas exhibet, est faciendum. Istud tempus vero, cum leviter tantum homines affligat, præter exquisitam victus rationem, quæ carnes, iura carniū, lac, & eius generis plura, a mensa excludit, & res ex medica materia acidulæ indolis postulat, fugamque causarum occasionalium iubet; vix, quibus multa mole pugnatur, desiderat alia. Incidunt tamen etiam interdum casus, ut præter resolventia digestiva, adhuc alia, vel ad alvum liquandam, cohibendamve summe sint necessaria. Huic indicationi satisfaciunt vel simplex cremor tartari in sufficiente quantitate sumtus, vel diacrydio sulphurato acuat; vel electuarium lenitivum Edinburgense; vel mixtura denique ex sale mirabili Glauberi cum Tamarindis, per decoctionem, præparata. Si alvus liquida & frequens erat, rheum cum sale ammoniaco profuit.

Hæc omnia immortalis *Sanctorius* * sequenti aphorismo egregie exprimit: *Nemo incidet in mor*

* Vid. *Sanctor. Static. Sect. III. No. 89.*



morbum, si sedulo praevident, ne cruditatibus laboret.

Stadium secundum, cum sit magis acutum, fortiora, cum id ipsum suas habeat diversitates genericas, alia atque alia desiderat medicamenta. Videndum autem semper antea, an morbus sit Imi, Ildi, vel Iltii denique generis, utpote quæ non solum communes indicationes, sed & proprias habent.

Indicationes communes sunt sequentes :

- I. Materiam biliosam ad superiora vergentem, quam cito fieri potest, per vomitum eliminare.
- II. Quæ cruda sunt, non movere, sed antea concoquere; atque scire, ad inferiora loca destinata, ferme semper cruda esse : tempore hinc atque medicamentis egere.
- III. Coctam materiam evacuare per colatoria materię biliosę vicina.
- IV. Putredini resistere.
- V. Complicationum atque symptomatum rationem habere.

Sequar nunc indicationes speciales, quia generales uberius exponere vix operæ pretium, vel saltem huius loci non est.

Duas autem indicationes proprias sibi vindicat genus primum :

- I. Viscidam materiam pituitariam medicamentis incidentibus solvere.



2. Omne id vitare, quod viscida inquinamenta possit impacta reddere, eorumque egressum impedire.

Secundum genus sequentes habet indicationes speciales:

1. Materiam, quæ acrimonia spasmos atque diarrhœam efficit, blandis medicamentis lenire, atque diarrhœam sistere, donec materiam coctam habeas.
2. Coctam materiam quidem evacuare, sed & debilem naturam roborantibus sustinere.

Genus tertium, præter indicationes generales, vix alias desiderat.

Circa indicationes secundarias, cum de his in tractationis parte secunda agetur, nunc in præsentiarum non moror, ad expositionem indicationum specialium transiens.

Propter materiam Imi generis per eminentiam viscidam, prima ponenda fuit indicatio specialis.

Omni hinc tempore medicamenta, tenacissimam materiam dividendi vi prædita, largiter, & diu continuanda, propinavi.

Elegi non solum ad vomitum ciendum, sed & resolutionis causa, tartarum emeticum, cuilibet ætati accommodatum, & infantibus simul tutum, dummodo in quantitate non peccetur, uti hoc ex infra dicendis apparebit latius. Addo tantum, me resolutionis scopo, *solutionem Tartari*, quæ constat

ex



ex tartari emetici gr. i. & aquæ simplicis Uncia i,
guttatim mixturis aliis sæpius addidisse.

Magnas autem, ut egregia illa resolventia atque digestiva e. g. Sal Absynthii cum Aceto vini saturatum, vel Mixturas illas salinas a *Pringlio* præscriptas, quæ nunquam non mihi in usu fuere, taceam, merentur laudes sal mirabile Glauberi; Pulvis digestivus *Tiffoti*; * dein kermes minerale; Pulvis alterans *Plümmeri*; & a *Lyson* laudatum Calomel. Quæ, dum, multis diluentibus iuncta, viscosissimam materiam egregie dividant, circumspecte adhibita, optimos identidem, in hoc primo morbi genere, ediderunt effectus. Posteriora medicamenta autem, cum heroicis, in febribus saltem, sint adnumeranda, in parva dosi a granis 2 ad grana 3, semel de die, raro bis, & nonnisi mixturis salinis antea præmissis, vel iis inutiliter tentatis, nonnunquam in his febribus, sed frequentius in morbis infra dicendis biliosis anomalis, laxantibus iunctis propinanda dedisse, nunquam me poenituit. Nam his, ut cum *Galeno* loquar; *crassi atque viscosi succi præsubtilitantur, inciduntur, atque meatus, per quos transmittuntur, aperiuntur, ut purgatio quam optime usquequaque sperari possit.* ** Nec, qui ita agunt, incidunt in errorem, quem quam maxime reprehendit *Hippocrates* dicens: *Quicumque ea, quæ inflammantur, statim in principio morborum me-*

E

dica-

* Vid. Libr. de Febre biliosa Lausannensi p. 31.

** *Galen.* Libr. de Purgatione. Parif. 1528.



dicamento solvere adgrediuntur, bi de intento quidem & inflammato nihil auferunt: nam non remittit affectio, quæ adhuc cruda est; quæ vero morbo resistunt, atque sana sunt, colliquefaciunt. Debili vero evadente corpore morbus invalescit.* Applicari hic quodammodo etiam possunt, quæ Boerhaavius de atra bile inveterata atque impacta pronunciavit. Si evacuantibus tunc, inquit, pugnatur, sani & facile mobiles humores expelluntur; tenaces malique hærent, unde peior morbus.** Pluribus hæc omnia confirmantur in egregia Dissertatione Cel. Brendelii de *seiori evacuantium in febris usu.*

Quousque autem cum solventibus, temperantibus atque diluentibus esset continuandum, donec laxantibus daretur locus: vix non unice ex signis coctionis, præcipue ex lingua atque urina depromendis, patebat clarè. Quando autem huc ventum erat, laxantia repetita, nec numero determinanda, postulabat morbus. Quid quod! ad decimam purgationem alvinam me sæpius confugisse memini, & annotationibus meis insertum reperio, ultra decimam esse reiteratam. In epidemia *Lau-sannensi* tertium, ad summum quater, alvum movere se coactum fuisse, refert Ill. *Tissotus**** Quod ad remedia autem attinet, sumsi vel Mixturam Tamarindorum supra laudatam, vel pulveres
ex

* Hippocr. de victus ratione No. 36.

** Vid. Aphorism. 1100.

***. L. c. p. 33.



ex Cremore tartari atque Diacrydio sulphurato confectos, qui & in infantibus tuto atque sine incommodo possunt adhiberi.

Rheum e contrario, sal sedlizenſe atque Manna, cum exſpectationi non reſponderent, raro ſunt data. Prius enim, quod iam obſervavit *Foreſtus*,* calorem in febribus huius proſapiæ auget: Poſteriora autem ſanos & facile mobiles humores tantum expellunt, atque viſcida coërcent, vel ſaltem bilem non detrahunt.

Qui ſecuritatem conſequi volunt, regulam illam ſtaticam: *quo maior eſt cuique evacuationum latitudo, eo minus is morbis eſt obnoxius*,** maxime ad egeſtionem alvinam applicabunt, neque a laxantibus prius deſiſtent, quam cum linguæ radicem ab omni immunditie liberam vident. Plerumque præſtabat, laxantia ita dividere, ut per epicraſin tantum alvum moverent. Nonnunquam autem adeo urgebat periculum, ut medicamenta eſſent rapienda, atque feſtinatione utendum. Cuius regulæ neglectum in femina, multos quidem annos nata, ſed adhuc vegeta atque valde obefa, in mortis cauſam abeuntem vidi. Nam cum vires illi propter morbi diuturnitatem, nam 3 ſeptimanas iam decubuerat, non ſuperfore intelligerem, ſi, uti hætenus factum erat, in nimis refracta doſi propinarentur medicamenta: fortiora atque frequentiora danda ſuaſi. Sed unus ex familia, vir

E 2

digni

* Foreſt. Libr. II. p. 203.

** Vid. Keil Aphor. ſtatic. p. 18.



dignitate atque eruditione præ aliis eminens, scrupulum sententiæ movit, rationem interferens: maiorem a medicamentis laxantibus, quam a diuturnitate morbi esse extimescendam corporis debilitatem. Medicinam hinc illi ulterius facere recusavi, quæ paulo post dira morte est extincta.

Transeo nunc ad indicationem secundam specialem generis Imi, cui satisfactorius omne id vitare debet, quæ egressui pravæ materiæ impedimento esse possunt. Exulent ergo omnia adstringentia, nec non cortex peruvianus a *Tiffoto* in hoc morbi genere reiectus, & a *Baglivio* in morbis mesentericis proscriptus, utpote qui chinam in his morbis damnabilem appellat medicinam.

Quamvis hæc *Baglivius Romæ* & in ære scripserit *romano*, * nulla tamen inde in nostris terris magis tuta contra hanc febrem, corpore adhucdum substante impuro, parari potest medicina. Interim tamen cum *Plinio* dolendum: *banc esse omni in re animorum conditionem, ut ex necessariis orta primo, cuncta pervenerint ad ninium.*** Sunt enim inter nostrates quidam, & ex medicis Belgii foederati innotuerunt mihi plures, qui febrem hanc biliosam, morbum malignum nuncupantes, chinam statim in principio morbi, post assumptum unum alterumve laxans, in haud parva quantitate, visceribus adhucdum materia cruda inquinatis, propinare audent. Quo bono vel malo
eventu

* L. c. p. 13.

** Plin. Libr. XXVI. Cap. IX.

eventu autem id faciant, mali moris inde relictī morbi, satis superque comprobant; doletque adhuc dum quotidie tam perversæ medelæ victima reddita ingens copia nostrorum incolarum, ex Hollandia præterito autumno redeuntium. Pugnare quidem pro horum medicorum sententia videntur vel magnæ, quas cortici chinæ in absorbenda bile tribuit laudes Cel. *Torti*; * vel etiam celebria illa nomina *Bianchi* **, atque *Cleghorn* , *** qui experientia suffulti, toxicum epilemiæ feliciter, hoc remedio, expugnaverunt. *At in casu epidemicæ constitutionis*, inquit *Sydenhamus*, *non iam illa methodus adhibenda est, quæ iis debetur, quoties sunt morbi essentialis, at ista potius, quam postulat sibi morbus, cuius nunc sunt symptomata, ad quorum quidem curationem illa leviter tantum inflectenda est.* ****

Animadversiones propriæ autem effecerunt, ut *Baglivii* sententiam ambabus ulnis amplecterer, & ne hilum quidem ab eo discederem. En exempla quædam!

Anno 1776, cum morbi naturam nondum satis intelligerem, ad feminam 30 annos natam, & febre biliosa primi generis correptam, quarto morbi die

* *Torti Therap. Spec. Francof. & Lips. 1756. p. 32.*

** *Bianchi hist. hep. part. III. p. 287.*

*** *Cleghorns Beobacht. u. s. w. übersetzt von Aldermann p. 204.*

**** *L. c. Sect. VI. Cap. I. p. 326.*



die vocabar. Propter vomendi conatum dedi emeticum, quod aliquoties vomitum viridis bilis, non sine levamine ægrotantis, excitavit. Sequentes dies digestivis salinis transgebantur; & dein laxantibus dabatur locus. Cesserant hæcenus omnia bene: mucus in lingua, saltem in anteriori eius parte, haud amplius erat conspicuus; nec anxietates ultra vexabant, alvo quotidie bilem deponente. Propinavi nunc decoctum corticis chinæ cum Tinctura rhei aquosa iunctum, cochleatim quater de die sumendum. Primo iam a sumto medicamento die, peiore loco esse videbatur ægra, atque quodammodo anxia. Pergebat ea tamen sequenti die, incommoda non materiæ biliosæ, sed aliis causis tribuens, medicamento uti. Sed effectus spei non respondebat. Nam reditus appetitus iam iam imminuebatur, nec alvus recte respondebat, & anxietates crescebant. Si mihi decumbentem hoc die videndi fuisset occasio, medicinam seponendam iussissem, quam nunc in maiori quantitate, quam præscriptum erat, ingurgitant propinqui: sed absens eram. Pergunt hinc non solum hoc die, sed & die tertio. Quid quod! iusculum ex cerevisia cum multo pane nigro decoctum, in mulierculæ id averfantem ventriculum infundunt. Vix cœna sumta, ingentibus prehensa est anxietatibus, quas medicamento chinato corrigere tentant; sed iugulant semimortuam. Paucis: sequenti die rediens, mortuam illam audiivi. Qua subitanea atque inopinata morte perterrefactus, atque simul persuasus: me catalogum errorum medicorum usu non
caren-

carentium, & ab Ill. *van Davern** enumeratorum, novo hoc exemplo auxisse, circa usum corticis chinæ, in hoc morbi genere, maiori circumspeditione uti, neq; unquam illum ante plenariam materiæ biliosæ educationem adhibere, haud cunctanter statui.

In aliis casibus haud quidem æque sinistre cessit tentamen; sed inde anxietatum turbas omni tempore adeo vidi auctas; ut me ab usu huius medicaminis arcere, & ad digestiva vel ad laxantia redire, res & morbi genus iuberent. Hoc non solum vidi in Chirurgo quodam, maxima ex parte a materia biliosa liberato, & chinam sibi non dari ægre ferente, quemque alterum cochlear decocti corticis Chinæ ad orci limina ducere videbatur; sed in propria uxore instituta experimenta me hac in re adhucdum hæsitantem magis atque magis postea edocuere. Nam cum illi, quarto post enixam puellam die, febre biliosa prehensæ, & postea iam, uti videbatur, a materia biliosa liberatæ, auctoritate *Mortoni* atque *Torti* Chinam cum Rheo propinare non dubitaveram: subito illa sensit incommoda ab anxietatibus oriunda, atque ingentem pectoris oppressionem. Deserui hinc antesignanos modo dictos, eorumque methodum medendi, & ad eccoprotica redii. Quibus dein per aliquot dies sumtis, denuo tentavi Chinam, quam nunc, cum reditu optimæ sanitatis, egregie ferebat.

Neque

* Oratio de erroribus medicorum usu non carentibus.



Neque magis in morbis illis anomalis, in quibus simile fermentum biliosum subest, corticis celebranda virtus erat. Factum est inde, ut sæpe viderim homines non febrientes, propter præsentiam huius materiæ autem admodum debiles, quos china confirmare tantum abfuit, ut & cum Rheo coniunctus cortex sæpe non prodesset. Evacuantibus magis in his casibus etiam locus erat concedendus.

Identidem ex me quæsit rationem femina a materia hac biliosa non libera, cur sibi nunc temporis China non esset remedium utile, cui præcedentium annorum valetudinem secundam deberet? cui modo antecedentia respondi. Simile etiam in multis aliis vidi.

Materia biliosa primi huius generis, fermenti instar est habenda, quæ vel in minima portione lædit, & assumpta quodammodo homogenea, in suam perversam naturam trahit; & cum hæc in corporis molem neque abire, neque nutrire possint: natura, quod ex *legibus staticis* * constat, tantum onus recipere non idonea, vel opprimi debet morbo, vel evacuatione præternaturali liberari. Sed cum neque extrahat China, neque emendet causam morbi: nobile istud remedium ignominia affectisse neutiquam videbor, si in his casibus subnatis inutilem dixerim medicinam. Profuit magis interdum, dummodo febris abesset, Elixirium Vitrioli,
vel

* Vid. Keil Aphor. stat.



vel nobilis illa combinatio, cuius gloria apud Ill. *Zimmermannum* percelebris est, quæ fit ex partibus æqualibus Olei vitrioli & Alcaholis.

Quæ hætenus de noxio Chinæ usu in medium protuli, non ultra statum impuritatis corporis esse extendenda, vel haud monitum quemlibet intelligere oportet. Neutiquam fidem derogare medicinæ minor, omni tempore auro argentoque comparandæ.

Hac methodo trecenti & ultra feliciter sunt servati, dummodo in febrem putridam non incidissent ægrotantes. Nam quemadmodum *facilis*, movente *Lommio*, *a continente non putrida in putridam transitio est*,* sic etiam in hoc morbi genere sæpe usu venire, in Capite de Digressionibus dictum fuit. Sed hoc maxime, si a complicationibus, vel a corporis statu cacochymico discesserim, vitium erat vel ægrotantium vel medentium. Nam quid abusus venæsectionis; laxantium; ** spirituosorum; vel neglectus potus diluentis, munitiei, atque aëris, curæ efficere non possunt?

Transeo nunc ad secundum genus morbi supra descriptum, in quo alvus cita peccat, & quod priori adeo e diametro oppositum est, ut in diversas curandi vias procedens, illa verba *Sydenhami*
hic

* Lommii Observ. med. p. 4.

** Dici non potest, quantopere interdum intempestiva laxantia bilis acrimoniam augeant. 41



hic prætermittere non possum: *febres continuæ*, inquit, *ita toto, quod aiunt, cælo differunt, ut qua methodo, currente anno, ægrotos liberaveris, eâdem ipsâ, anno iam vergente, forsitan e medio tollas.* *

In hoc morbi genere radix Ipecacuanhæ potior esse solebat tartaro emetico, quia hæc minus alvum liquat. Propter eandem etiam rationem a medicamentis supra laudatis stimulantibus, alvumque irritantibus sedulo erat abstinendum. Eligenda potius talia, quæ præter vim resolventem, vi, ut ita dicam, stiptica, nervisque blandiente, atque putredini resistente erant prædita; omne dein studium in eo erat collocandum, ut imminenti febris putridæ periculum procul abigeretur. Mixturæ salinæ, ut sal absynthii cum aceto vini saturatum, aquis analepticiis mixtum, & spiritu vitrioli temperatum, grate utiliterque ab his hauriebantur. Quibus dein, mutatis mutandis, addebatur, vel per se solum exhibebatur præ cæteris in hoc secundo morbi genere eximium sal ammoniacum. Inter laxantia autem, decoctum Tamarindorum atque Rheum suum occupabant locum. Sed quod in priori genere lædebat, ad id mature sæpius erat decurrendum, ad Chinam puta, quæ cum Rheo mixta egregios hic edidit effectus. Propinanda autem hæc erant ita, ut vis evacuatoria superaret vim adstringentem; & his usquedum erat utendum, donec in linguæ radice nulla amplius conspicua esset

* De morbis epid. Cap. 2.

set immundities. Tunc autem rheum commodè potuit omitti, & in eius locum maiores doses corticis Chinæ erant substituendæ.

Quod si non ex præcedentibus, certe ex hac methodo medendi, ex naturæ sinu, deprompta & experientia confirmata, differentia generica morbi nostri biliosi patebit clare & perspicue. Neque diversas has curandi vias animo volutans atque contemplan, facile mihi obiiciet, quod Sydenhamo a Cel. Freindio obiectum miror, quasi perinde esset, morborum diversitates bene intelligere, vel minus: *Ita fere supervacua est omnis, quæ nimis curiose fit, distinctio & præsertim medicinæ studiosos adeo parum iuvat, ut potius in errorem agat; falso nimirum opinantes, cum certam quandam morbo cuilibet proprietatis notam afflicta viderint, propriam itidem esse & omnino suam cuique medendi normam.**

Tertium genus morbi, cum esset leve & mixtæ naturæ, vix singularem vel methodi medendi, vel victus rationis desiderat expositionem. Blandiora hic eligenda erant medicamenta salina, quæ vel in primo vel in secundo genere non sufficiebant, e. g. Cremor tartari; Sal Seignette; Pulpa Tamarindorum, cætera. Rarus fuit emeticorum usus.

Hactenus dicta sunt, quæ vel detrahendo, vel roborando maxime iuvant. Dicendum nunc, quid de iis, quæ nos alunt, experientia constiterit.

Nocent

* Vid. Joh. Freind Commentar. de Febribus Lond. 1717.

Nocent cibi generis valentissimi, ut ferme omnis caro, atque iura carniū plurimarum, pinguium præcipue; ova, lac, placentæ; dein quævis oleosa, atque ea, quæ crudas viscidasque in corpore relinquunt materias, e. g. panis niger Gueßphalorum; solana tuberosa; nec non dulcia, quæ, docente id *Cel. Milgſack*, * bilem, quamvis sacchari amari species sit, tamen augment. Eligenda autem ex medica materia, quæ facilia sunt concoctu, acidulæque indolis; quæ alvum cohibere, vel illam, si morbus generis secundi est, mollem reddere possunt. Optima autem sunt iura, in quibus decoctæ sunt herbæ emollientes, atque putredini resistentes, e. g. Acetosa, Acetosella, Portulaca; vel radices Celeri, Petroselinum &c. Profunt etiam iuscula, aceto vini saniora reddita. Præter dicta olera, iuvant etiam alia, ut Spinachia; Beccabunga; Endivia; Lactuca, & eius generis plura; dein Poma; Pruna; Cerasa &c. a *Tiffoto* laudata. Nihil vero sane iusculo crassioris consistentiæ salubrius est, quod Nostratibus audit *Sammelſohl*, quodque his verno tempore, ex herbis recentius collectis, frequenter in usum cedit. Ad quem finem colligunt turiones Brassicæ selenoïdes (*Braunſohl*) thyrsulos Aegopodii; Hederam terrestrem; Lapathum acutum; Chærefolium; Urticam &c.

Potum optimum præstabat aqua frigida simplex atque acidula reddita, vel super Cremorem tartari fusa,

* Vid. Differt. de salibus essent. C. H. Duisburgi.



fusa, cuius cyathus singulis semihoris erat sumendus. Potus calidi autem, propter augmentum anxietatum, æque in his morbis proscribendi, ac in Cholericis a *Cælio Aureliano** reiectos legimus: minus tamen nocebat potus Caffée quam Théé. Vinum non nisi aqua dilutum concedendum; durante febre autem circumcidendum.


Sed his, ab aliis satis expositis, haud diutius nunc immoror, cum nonnullorum communium auxiliorum adhucdum exponenda restet ratio.

Circa usum emeticorum nonnullos admodum timidos video e.g. *Junkerum*, quamvis methodo *Tissotiana* pota, omnis ætatis atque sexus hominibus, rite ante formata indicatione, tuto possint propinari. Dedi talia, quando res ita facere iuberet, & emetica omittere periculosum esset, infantibus teneris; gravidis; parturientibus; hæmoptoicis; herniosis, vel talibus, qui vomitum cruentum antea senserant, optimo cum effectu, atque citra omnem noxam. Ingentem vomitum cruentum aliquot menses ante partionis tempus subierat propria mea amata; hoc autem tam parum me deterruit, ab emetico, parturienti illi, propter accedentem febrem biliosam, propinando, ut in altero emetico magis certum præsidium invenerim.

Intermissum emeticum semel in homine hernioso, simulque febre biliosa laborante, vidi lethale.

Tempus

* Vid. Cæl. Aurel. de morb. acut. Libr. III. Cap. XXI.



Tempus vomitoria in febribus biliosis propinandi admodum incertum. In multis ab emetico erat inchoandum: vidi tamen etiam alios, & quidem non paucos, in quibus periculosum fuisset, materiam adhucdum crudam statim in principio morbi supra movere. Medicinam quondam feci feminae, cui ante diem decimum quartum, propter cruditatem materiae, emeticum propinare non ausus sum. Quod restat, legi atque relegi debent, quæ hac de re cum orbe literato communicavit Cels. *Tiffetus*. *

Tartarum emeticum non nisi multa aqua dilutum dedi, haustibus repetitis, donec vomitus adestet, sumendum.

Videntur autem emetica nostræ regionis incolis, propter cibos viscidos ex solano atque fagopyro præparatos, quorum descriptionem dedit Ill. *Metzgerus*, ** & quibus nunquam non utuntur, magis apta esse, quam populis, qui teneriori victu vivunt. *Baglivius* hæc videns, recte hinc germanis populis, propter annum ferme semper hyemantem, & quia nimis gulæ indulgent, emetica cæteris nationibus utiliora censet. ***

Accidit tamen etiâ interdum, ut propter summam debilitatem, vel ob aliam causam e. g. propter inflam-

* L. c. p. 27. & seq.

** L. c. p. 20. 21.

*** Bagl. Prax. med. p. 156.

inflammationem, vomitoria propinare vix esset tutum. Dedi tunc aliquoties de die scrupulum unum pulveris ex Cremoris tartari Uncia I, & Tartari emetici gr. I parati, quo vomitus, antea iam ferme semper præsens, sine virium iactura, egregie fuit auctus, quod infra exemplis comprobabitur.

De venæsectione a *Pringlio* laudata, a *Tissoto* vero reiecta, meam nunc qualem qualem exponam sententiam, ex visis tantum enarrans.

Centies, quin sæpius, illam celebratam vidi precario a Chirurgis sanguinis humani sitientibus. Candide loquor: si uni prodesset, certo decem damno fuit. Communis effectus erat atque levissimus, morbum inde trahi videre; idque non magis in ipsa febre biliosa, quam in pleuritide etiam anomala, quod magnorum virorum & præsertim *Baglivii** experimentis confirmatur. Nam in vehementissima pleuritide biliosa decem uncias sanguinis detraxisse sufficiebat, pulsu iam iam reddito molli atque parvo debiliq. Plus sanguinis misisse, non morbum sed vires imminuit, quod nuper adhuc in homine affinitate quadam mihi iuncto vidi. Nam cum illi altera venæsectio, me absente atque inscio, sine ratione esset celebrata: dolor quidem evanidus est redditus, sed anxietates atque spirandi difficultates inde adeo increverunt, ut, sudore frigido superfus æger, caput non nisi sublime habere posset, digestivis atque laxantibus postea periculo ereptus.

Sed

* L. c. p. 46. & seq.



Sed longe adhuc peius cum illis agebatur, in quibus citra inflammationem larga venæsectio fuit instituta. Vidi ex quinque in una domo decumbentibus, quatuor, omnem rationem abiicientes, nec regulis medicis moram gerentes, propter venæsectionem & abusum spirituosorum, mensis spatium, febre biliosa crudeliter consumptos; quinto tantum, mature morbo occurrente & venæsectionem odio habente, servato.

Limitandæ hinc sane *venæsectionis in morbis ab epidemica aëris constitutione dependentibus* magni Sydenhami * laudes sunt. Magis Forestus laudandus, qui Avicennam sequens, nullam in ardente ex pura bile, nisi *urina fuerit rubra & crassa*,** venæsectionem admittit, quod, variis exemplis ab eo in medium prolatis, pluribus confirmatur. Neque urinam rubram hanc operationem semper indicare, docet Baglivius quærens: *An ideo sanguis mittendus in illis ob urinam rubram? minime*, inquit, *nam sales dominio potiuntur post phlebotomiam, & enecant*.***

Sed, non obstante tam sinistro eventu, phlebotomiam tamen semper exoptant ægrotantes, atque laudant Chirurgi isti, qui aphorismum comicum: *Saignez toujours — c'est une selle a tous chevaux dans notre profession*, ad verba interpretati sunt.

In

* Epistola responsor. p. 195.

** Forest. Libr. II. p. 103.

*** Bagl. L. c. p. 47.



In huius rei rationem inquirens, nullam aliam invenire potui, quam quod anxietatum imminutionem inde sibi persuadeant futuram. Sed hoc tantum abest, ut hæc inde magis atque magis augeantur, per clysteres maxime leniendæ. Egregios enim ab hoc remedii genere in morbis quibuscunque mesentericis sperare possumus effectus. In primo autem morbi genere subter in alvum sunt iniicienda, quæ vi resolvente eximia sunt prædita, ut sal ammoniacum, vel acetum vini aqua calida dilutum.

Magni etiam momenti sunt frictiones, quæ super ventrem molli instituuntur manu, quibus spissa materia resolvitur, eiusque evacuatio promovetur. Ante annum & dimidium artem medicam ex me petiit femina febre decumbens, & hac spissa materia onusta, quæ ne minimam quidem particulam huius materiæ per alvum exonerare potuit, nisi ea frictionibus repetitis, quotidie instituendis, antea esset subacta, irritis reliquis secundum rationem propinatis.

Vesicatoria in secundo genere frequenter, in primo autem non nisi in casibus cum inflammatione coniunctis, applicasse memini. In rheumatismo inflammatorio bilioso, quem vix unquam in nostra epidemia vidi, utiliter ea adhibuit Cel. *Stolle*.

Sinapismi e contrario, plantæ pedum applicati, in revellendo a capite sanguine, egregium multoties ediderunt effectum, cui scopo & acetum vini solum sufficiebat.



Restat, ut de acidorum usu eorumque selectu sermonem faciam. Juvant in genere priori acida vegetabilia, atque præcipue id vini vitium, quod referente *Plinio*, transit in remedium. Genus secundum autem atque status putredinis desiderant acida fortiora, mineralia, ex aqua fontana haurienda.

Sed ultimo tandem, sæpenumero in ægrotos tumultuantes animoque commotos incidens, cum *Ill. Gaubio* identidem dolui, *negatam esse humanitati facultatem contingentia, prout necessitas exigit, mutandi, neque semper ex pharmacopoliis depromi posse, quæ corpori, ob mentem inquietam laboranti, certum levamen afferant.**

Communia hæc sunt & febribus regularibus, & morbis biliosis anomalis; hinc hætenus dicta infra non repetam.

Stadium Illitium variam desiderat methodum medendi. diversis morbis ex reliquiis enatis accomodandam. Reliquiæ in genere postulant digestiva, resolventia salina; interdum Calomel; tandem laxantia. Carnem a reliquiis offensi cibo debent subtrahere, atque eligere talia, quæ supra sunt laudata.

Recidivarum autem cura ea est, quæ præcedenti morbo, cuius recidiva est, apta invenitur. Cæteri morbi autem primam habent indicationem, qua reliquiæ expugnantur; dein pro cuiuslibet morbi
natura

* Vid. Gaubii sermo 11. de regimine mentis, quod medicorum est. p. 79.



natura methodus curativa, ex Therapia desumenda, seorsim est instituenda. Missos hos morbos facio, tantum contentus, quædam circa curationem reliquiarum inveteratarum, per exempla ostendisse, & quod ad reliqua attinet, lectorem ad *Tissotum* ablegasse.

Primo exponam, quibus auxiliis ista persona, cuius historiam morbi p. 44. & 45. suppeditavi, tandem sit sanata, iam per annum, & quod excurrit, male ex reliquiis antea vexata. Variam methodum medendi in hac ægra iam antea iniveram, sed absque effectu bono. In huius rei causam accuratius inquirens, atque videns, intestinis non solum, sed & vasis sanguiferis, quin & glandulis mesentericis viscosissimam materiam impactam hærere, reliquam curam impredientem, de eius resolutione atque evacuatione serio cogitare incepti. Huic scopo autem nil magis convenire æstimabam, quam Calomel laxante iunctum. Pulveres hinc ex Calomellis granis III. & Diacrydii sulphurati granis VIII. conflatos parari iussi, mane sumendos. Post primum pulverem sumtum, ingens secutus est vomitus materiæ biliosæ, cum muco tenacissimo mixtæ. Sequenti mane vomitus materiæ pituitariæ multo adhuc vehementior atque profusior. Inde ægrotam levatam videns, vellet ita pergere suasi. Sed tertia dosis vomitum haud amplius irritavit, subduxit autem per inferiora materiam biliosam pessimi odoris, omniumque colorum. Ita dein per aliquot dies adhuc pergens, multo meliori loco esse profitebatur ægra. Sed cum venter nondum



decresceret, neque urina parce fluere cessaret, datus est Spiritus mindereri, qui vias urinarias egregie aperuit. Propter tussim autem urgentem parabantur catapotia ex Extr. Taraxaci; Gummi Ammoniaci; succo inspissato Liquiritiæ & sulphure tandem Antimonii aurato 3tiæ præc. Curationi finem imposuit vinum medicatum eccoproticum atque roborans; &, ne morbus recurreret, fonticulus fuit positus.

Ita feliciter restitutæ per annum optima valetudine frui dabatur feminæ. Sed cum semper fellæ infunderet, & corpus, quod suaseram, peregrinatione iactari recusaret: vires postea resumere, morbus est visus. Venter enim non solum a lotio intercepto, sed etiam a quadam tympanitidem efficiente causa tumere incepit. Diro tamen hoc malo non obstante, multas septimanas sine medicamenti vixit, quæ nunc odio prosequabatur. Tandem precibus mariti victa, veniam dedit medicamenti in pilularem formam redactis. Paratæ hinc sunt Pilulæ ex partibus sequentibus constantes. Sumta sunt Pulveris alterantis Plümmeri gr. XII; Extr. Taraxaci drachmæ III; Gummi Ammon. drachmæ II; Rad. Scillæ dr. sem. Inde pilulæ, singulæ pond. gr. III, formatæ, quater de die, numero 5, optimo cum effectum sunt propinatæ. Nam, his per aliquot tempus adhibitis, urina sine impedimento fluere incepit, largum sedimentum deponens; & in præsentiarum hæc ægra tam integra est, quam maxime quis in hoc genere valetudinis esse potest. Restat adhuc dicere, me in
hoc



hoc casu aliquoties vidisse, Cremorem tartari simplicem, optimi diuretici munere interdum fungi.

Sed nunc aliam historiam morbi in medium profero.

Matrona 53 annor. iam a multis retro annis affectibus hypochondriacis atque hystericiis male vexata, 1778 incidebat in febrem biliosam 3tii generis. Propter levitatem morbi, & quia cito disparuit febris, medicinam sumere vix operæ pretium ducebat, vel saltem a reliquiis purgari recusabat. Quam ob causam relinquebatur in corpore apta, novum morbum creandi causa, quam, si mens non læva fuisset, ex variis symptomatis facile detegere potuisset ægra. Nam


*Accusabat Cholerae dextræ dolor, aspera
lingua.*

*Tinnitus, vomitusque frequens, vigilantia
multa.*

*Multa sitis, pinguisque egestio, tormina ven-
tris. &c.**

Paucis, signa bilis non loquebantur, sed clamabant. Singula autem hæc habebantur pro symptomatis affectus hypochondriaci vel hysterici. Vitam hanc miseram duxit ad initium usque 1779. Nunc dicta symptomata tenore non solum increverunt, sed his etiam adiecta sunt alia multo peiora. Quotidie urgebat vomitus materiæ viridis, nigræ, dentes
atque ~

* Vid. Schol. Salernitana. Venetiis 1619. p. 221.



atque gingivas arrodentis, sitimque excitantis. Ex ore post prandium defluebat limpida aqua rivi instar; appetitus erat nullus, & si quid cibi sumtum erat, statim mordebat ventriculus. Dolores artuum erant ingentes, circa noctem incrementum accedebant raucitas; tussis; respirandi difficultas; urina parce fluens; pedum oedema.

Inter has calamitates ægram, viribus fractam, medici consilium efflagitasse, nemo fane mirabitur.

Propter summam debilitatem emeticum præscribere timui, neque videbatur omnem materiam adhucdum crudam e corpore sic posse eliminari. Interim tamen quotidianæ vomitiones id auxilii genus postulabant. Dedi hinc pulverem supra laudatum ex Cremoris tartari unc. I & Tartari emetici gr. I constantem, ad duo vel tria parva cochlearia, tam resolvendi, quam evacuandi causa, quotidie sumendum, presso pede methodum *Hippocratis* * in morbis cholericis adhibitam insistens, neque timens, quæ in contrariam sententiam transiens *Cælius Aurelianus* postea dixerit: *Quod non aliter est contrarium*, inquit *Cæl. Aur.* quam si quis fluore sanguinis pereuntem, vel diaphoresi dissolutum phlebotomare velit. **

Vix

* Vid. Hippocr. de morbis.

** Vid. Cæl. Aurel. m. a. Libr. III. Cap. XX.


Vix p̄r aliquot dies ægra nostra hoc medicamine, quod quotidianos vomitus auxerat, erat usa, cum ingentem in modum illam inde viderim levatam. Sed cum adhuc materiam biliosam reconditam subolerem: continuandi pulveris suasor exstiti. Quamvis difficulter eo adigeretur ægra: gessit tamen morem ad diem decimum quartum hoc modo pergens, qui nullo vomitu amplius turbabatur. Egressit autem omni hoc tempore supra atque infra ingentem quantitatem materiæ biliosæ, mucosæ, quin pigræ, de quo *Talpius* monet, quod vomitus materiæ nigræ interdum ex usu sit; * unde ægram meam levatam vidi quam maxime.

Nam cum absque impetu per ventrem deturbaretur materia: hoc genus auxilii illo periculo vacabat, quod a vehementi ventris liquatione in hydrope & in aliis morbis timet *Aræteus Cappadox*** inquiens: *post subitas & copiosas inanitiones extremosque casus prostratis interdum viribus, quemadmodum in sanguinis profluvio accidere solet, ægri intereunt.*

Sed redeo ad ægram meam multum sic emendatam. Tussis vix amplius irritabat; neque voci deerat sonus; respiratio reddebatur bona; & appetitus redibat, siti haud amplius urgente. Nunc pilulæ ex Extr. Taraxaci & aliis resolventibus amaris in usum sunt vocatæ, cum interposito quotidiano

* Libr. II. Cap. XXI.

** Aræteus Cappad. Libr. I. de diuturnis affectibus Cap. XXIII.



diano usu decocti corticis Chinæ. Pedes oedematofii ligabantur fasciis, & ut primum tempestas id permittebat, haufit aquas Pyrmontanas. Sub finem mensis Junii e. a. ferme restitutæ applicatus est foniculus in uno pede.

Per omne hoc tempus tenuissimo victu fuit contenta, & non alii cibi, quam ex oleribus acidulæ indolis parati, mensæ sunt impositi, cum interim quotidie corpus levi inambulatione dimoveretur.

Quod restat, similitudo, quæ inter hunc morbum & inter alium ab *Hippocrate* descriptum intercedit, tanta est, ut locum silentio prætermittere non possim. Ita autem habet Pater medicorum :

Homo subfulvus & gracilis & oculis cum virore pallidis, & tenuem cutem habet, ac debilis. Quanto autem tempus amplius progreditur, tanto amplius morbus afficit. Et vomit omni tempore velut stillamentum modicum, ad duorum poculorum parvorum mensuram; frequenter etiam cibum & una cum cibo bilem & pituitam, & post vomitum dolet totum corpus, aliquando etiam antequam vomat. Et horrores tenues & febris tenet, & ad dulcia atque oleosa maxime vomit.

Circa medelam autem monet sequentia : Medicamentis sursum atque deorsum purgare, & lac asininum postea bibendum dare. Cibis uti mollissimis, ac frigidis, piscibus littoralibus, & cartilaginei generis, & betis & cucurbitis, & carnibus tritis. Vinum bibere album vinosum
aquo.



*aquosius. Labore & deambulatione uti, calide non lavare & a sole abstinere.**

Eximias, in expellendis reliquiis, fonticulorum uterum diu trahendorum virtutes, quarum antea mentionem inieci, singulari adhuc comprobabo exemplo. Feminae arthriticae 33 annorum propter reliquias ex febre biliosa fonticulus fuit positus. Quæ, cum a malo arthritico inveterato neque aquis Pyrmon-tanis, neque Aquisgranensibus, neque Meinber-genfibus, quas bis adiit, potuit liberari: in hoc remedio non solum contra dirum hunc morbum, egregium invenit solamen, sed & a reliquiis materię biliosæ ita maxima ex parte est liberata.

Hæc de curatione trium stadiorum dicta nunc sufficere arbitror; nec opus erit enarrare, quomodo symptomatis, vel morbis complicatis, vel reliquiis denique ex debilitate enatis medicina sit faciendæ; cum id non solum nimis longum foret, atque ab instituti ratione alienum, sed & superfluum. Nam ex notione morbi principalis vel complicati, ad curationem vel symptomatum vel complicationum facilis via patet. Sic in casibus variolarum, vermiumve complicatorum, vel parturientium nonnullarum res erit comparata. Omnimodus horum morborum complicatorum status est attendendus, & si in casibus subnatis, quod sæpe accidere monui, status sanguinis putridus simul adest: ad methodum antisepticam tunc erit
trani-

* Vid. Hippocr. de morbis.



transeundum, atque in China, Camphora, acidis mineralibus atque Veficatoriis unica atque certa spes collocanda.

Quod autem ad symptomata attinet, illa, inquit Cel. Tissot, * *quæ primo intuitu genio morbi aliena videntur, eandem cum omnibus aliis originem habent, & remedii principis continuatione feliciter fugantur.*

Quod restat, lubenter subscribo sequentia verba Baglivii: *Præ cæteris animadverto, in nullo morborum genere, tantâ opus esse patientia, expectatione, cunctatione ad bene feliciterque curandum, quanta ad bene curandas febres mesentericas.* ** Nam, cum corpora ignavi quadam materia, quæ vix mobilis reddi potest, sæpe sint repleta: difficulter istud pondus pravæ materiæ a corporibus aufert hæud semper satis incitata natura, uti hoc ex morbis anomalis patebit clare, quod cum reditu sanitatis e corporibus antea eliminare ægritudines debere, docet Statica Sanctorii. ***



PARS

* Tissot. l. c. p. 91.

** Libr. I. pag. 53.

*** Sect. I. No. 81.



P A R S II.

D E

MORBIS BILIOSIS ANOMALIS
IN GENERE.

Dicta sunt hætenus præcipua, ad febrem biliosam nostræ Epidemiæ, eiusque medelam spectantia, Capitula selecta. Dicenda nunc est ea, unde totum opus nomen suum accepit *Anomalia* febris biliosæ, cum descripto morbo nexu individo atque tam arcte cohærens, ut omne pondus, si ullum illi est, inde mutnetur, & a morbo dominante non nisi novis determinationibus sæpe discrepet. Sed cum homines sumus, non omnes relationes statim intelligentes; neque in rerum natura vix alia existet morbi anomalia, nisi habita ratione ad intellectum humanum: quilibet statim persentiscet, & in cognitione illorum morborum, quos nunc pertracto, animorum identidem perstringi aciem. Medicus enim, cui leges naturæ, cur materia biliosa hanc potius partem occuparet quam aliam, eamque magis læderet, cognitæ perspectæque essent, nullibi videret anomalias morborum, nunc temporis, pro mentis humanæ imbecillitate, ex apparitionibus externis iudicantis, mirum in modum auctas.

Quæ cum ita sint comparata, & cum etiam ad medicum pertineat, monente supra laudato *Verulamio*, modos atque circumstantias rei nosse, quæ
adhuc



adhuc ignota , quamvis in genere nova non sint : hanc meam qualemcunque de morbis biliosis anomalis tractatiunculam promulgare atque publici iuris facere , non plane superfluum , vel a medici dignitate alienum esse censui ; maxime incitatus monitis magni *Hippocratis* , dicentis : *debet autem medicus differentiam morborum , assidue in vulgus grassantium , cito animadvertere , nec temporis statum ignorare.* *

Eiusmodi autem , quas descripsi , aberrationes morborum , frequenter in epidemicis constitutionibus occurrere , *Sydenhamo* , qui sollicitudine summa morborum genium indagavit , nemo pulchrius demonstravit , dicente : *Notandum est , quibus annis variæ illarum species grassantur morborum , eas omnes , modo , quo primum adgrediuntur , atque symptomatis , consensive.* **

Apertius autem hac de re , ut *Cel. Grinum* *** taceam , loquitur *Ill. Strack* : *Quæ inter petechiarum morbum , cum is popularis erat , currebant affectiones ; harum duo potissimum exstabant genera : alterum , quod sine petechiis quidem erat , at omnes petechiarum morbi ipsius notas ex toto habuit ; alterum , quod aliqua tantum eius indicia retinuit ; plurima vero diversa , ut pleuritidis signa habuit ; per quæ & facile fefellit , & magis occidit.* **** Sed

* Prognost. Text. 4. Charter. Tom. VIII. p. 585.

** Sect. I. Cap. II. p. 51.

*** Grimm Epidemie zu Eisenach.

**** Vid. Carol. Strack de morbo cum petechiis.

Carolsruh. 1766. p. 276.

Sed, antequam morborum anomalorum descriptionem adgredior, quædam adhuc circa notionem morbi anomali monenda restant.

Tria autem potissimum, uti supra iam patuit, ad notionem morbi anomali, requiruntur momenta potiora.


Primo, sit morbus sub facie alius longe diversi, non febris biliosæ procedens; vel naturam alienam induisse visa, nomineque singulari consignata ægritudo. Sic e.g. quod ad faciem externam attinet, febris scarlatina biliosa longe distat a febre biliosa ordinaria, cuius naturam magis exuisse videtur.

Non alios casus ad *Arthritidem anomalam* retulit Cel. *Musgravius*, quam qui nomine atque forma haud parum ab arthritide regulari deflectunt.

Postulo dein: sit morbus a materia biliosa febrili, i. e. a tali materia excitatus, quæ in aliis subiectis, pro diversitate naturæ, ipsam febrem biliosam irritavit.

Sic ingens morborum periodicorum, febris intermittens typum non exacte observantium cohors, in cuius descriptione maximam industriam præstitit Cel. *Medicus*,* non aliam causam, quam fermentum febris intermittens postulat. Exulente ergo a præsentis descriptione morbi alii ab alia causa exorti, vel alio tempore observati. Describo
tantum

* Geschichte periodischer Krankheiten. Carlshuhe 1764



tantum morbos anomalos sub constitutione nostra epidemica enatos, atque illi vicinos, parum in præsentiæ curiosus morborum alius originis, quod bene notandum røgo.*

Tandem requiritur: morbum subdole i. e. infidiose infestare; incauto imponere, & si non medicamentis antibiliosis pugnetur, ferme nunquam elidi.

Hoc sæpe sæpius vidi, multosque novi, qui diu post morbum superatum, adhuc perversæ medelæ luunt

*Necessarium fuit hoc monere, ne me hepate obstructo laborantem accusent, qui apud Ill. *Zimmermannum* in den Erfahrungen aus der Arzneigelahrtheit I. Theil, exemplum practici illius viderunt, qui, propter id vitium innatum, in omnibus suis ægris simile quid videre putabat.

Tantum enim absuit, omnes atque singulos morbos mihi obvios factos huc retulisse, ut multos potius sicco planè pede præterierim, qui tamen maxima ex parte horum pertinere videbantur.

Dein adfuere etiam alia morbi genera, in quibus vix vestigium prædominantis morbi imperii ulla arte potuit detegi.

Sic ætatem infantilem exercebat nuper tussis convulsiva gravis atque epidemice regnans, cui nulla sane intercedebat cum biliosa familiaritas. Absonium hinc esset, omnia ex uno fonte velle explicare.

luunt pœnam, medentibus, andabatarum more, cum ignoto morbo luctantibus. Commune ergo his morbis erat, faciem biliosam testam servare, atque sub nomine alius morbi, bene noti, diu latere.

Inde nunc patet ratio, cur morbi, qui non insidiosè neque occulte irruunt, quamvis larvam alius morbi induant, minus recte ad classẽ morborum biliosorum anomalorum possint referri. Nam hi vel morbi nomine audito statim cognoscuntur, vel ex antecedentibus eorum natura patet. Prioris exempla sint Cholera; colica biliosa; vomitus biliosus; nausea, & eius generis plura. Posterioris autem exempla ex capite de Reliquiis morbi sunt repetenda. Morbos anomalos enarraturus, caveat ergo sedulo, ne reliquias febris biliosæ, pro morbo anomalo sive occulto ventilet; caveatque, ne morborum historiæ in immensum augeantur. Sed non repetam semel dicta.

Quod restat, parum refert, an cum morbo anomalo febris simul sit coniuncta vel minus, ea in essentialibus huius notionis parum mutante. *Est enim æquum, ita discernere, ut non accidentium diversitas passionis differentias ostendat, sed generalis quædam ac necessaria designatio, quæ sit ex principalibus passionibus, unde etiam curationum ratio sumitur.** Parili ratione ad morbos

* Vid. Cæl. Aurel. Libr. I. de morb. acut. Cap. VII.




bos periodicos retulit & febriles & non febriles
supra laudatus *Medicus*. *

Semiologiam horum morborum multis premi
difficultatibus, nemo mirabitur, ad tertium paulo an-
te dictum requisitum attendens. Accidit mihi hinc
sæpenumero, ut, destitutus signis directis morbum
indicantibus, non nisi per coniecturam; per usum
remediorum vel bonum vel pravam, & per re-
ductionis denique viam, de morbi natura potuerim
convinci. Plerumque tamen aderant vel anteceffe-
rant signa in stadio Imo enarrata; lingua nempe
impura, biliosa; nausea; appetitus deiectio; dolor
scrobiculi cordis, eiusque pulsatio; alvi obstipa-
tio; urina pallida; pulsus debilis atque mollis, si
a casibus inflammatoriis discefferim; dolores ar-
tuum; noctes inquietæ; quibus tandem accedebat
constitutio epidemica. Permulti enim sunt inven-
ti, morbo bilioso anomalo decumbentes, qui in ea-
dem domo socios febre ordinaria epidemica labo-
rantes haberent. *Omnia ergo sunt providenda;
non enim ex uno vel duobus, sed ex multis con-
currentibus significationem firmandam esse, op-
time monuit Cælius Aurelianus.* **

Quod si vero nunc quærat, quænam sublit
ratio, quod in tam multis a simili causa, tam dissi-
milis effectus sit enatus? respondeo verba *Celsi*:
*Possunt quædam subesse corpori, vel ex infirmi-
tate*

* Geschichte period. Krankheit.

** Cæl. Aur. Libr. I. de morb. ac. Cap. II.



tate eius, vel ex alio affectu, quæ vel in alio non sunt, eaque per se non tanta, ut concitent morbum: tamen magis obnoxium aliis iniuriis reddunt.

Ita hac de re sentiendum esse, quotidiana me edocuit experientia, optima rerum magistra. Ulterius autem in re dubia progredi, vel istam idiosyncrasiam detegere velle, si non impossibile, tamen a scopo meo alienum duco, non philosophantis, sed observatoris munere fungens.

Et profecto verosimile est, et *Hippocratem*, et *Sydenhamum*, et *Baglivium*, aliosque non eam ob causam eximios medicos fuisse, quia idiosyncrasiae naturam detegere sategerunt, sed eos potius vel ideo majores extitisse artis præceptores, quia mature intellexerunt, *ex hoc fonte*, uti refert Cel. Keil, * *revera oriri, quidquid est in medicina incerti, et obscuri*, quod non nisi accuratissimis, fidelissimis, ac sagacissimis observationibus, ac morborum historiis tolli potest.

Dictis adhuc adiicio: morbos biliosos anomalos considerandos esse tanquam species febris biliosæ. Cum autem trifarium hujus febris genus supra sit demonstratum, prono inde fluit alveo, relationem specierum ad genera, diversam esse debere. Aliæ hinc sunt species generis primi; aliæ secundi; aliæ denique tertii. Methodus curativa, quamvis

G

in

* Vid. Tentam. med. Phys. Lond. 1718. p. 116.



in univēsum antibilioſa, propterea ſæpe mutanda, atque cuius generi aptanda fuit. Sed propter novas determinationes ſpeciales, alia atque alia methodus ſubinde ineunda.

Monendum adhuc reſtat : obſervationes ſæpe docuiſſe, morbos anomalos identidem complicari, vel cum aliis morbis e. g. vermibus, vel & inter ſe. Sic conſociari amant febris arthritica bilioſa, atque ſcarlatina bilioſa; vel neruoſa bilioſa cum multis aliis malis. Inde peiora mala oriri, quis non videt?

Ordo rei iubet, ut morbos bilioſos anomalos, in ſequentibus deſcribendos, paucis in limine nunc enumerem. Sequenti autem ſeſe excipient modo.

Primo exequar morbos huius cenſus febriles.

Qui ſunt:

1. Febris bilioſa neruoſa.
2. Febris bilioſa bulloſa.
3. Febris bilioſa ſcarlatina.
4. Febris arthritica bilioſa.
5. Angina bilioſa.

Dein agam de non febrilibus, ut

6. de Tuſſi bilioſa.
7. — Orthopnoea bilioſa.
8. — Raucitate bilioſa.
9. — Singultu bilioſo.
10. — Salivatione bilioſa.
11. — Stupore paralytico unius pedis.



12. de Anxietatibus præcordiorum ex causa biliosa.
13. — Obstructione urinæ ex eadem causa.
14. — Hæmorrhagiis biliosis.
 - α. hæmoptysi.
 - β. mictu cruento.
 - γ. hæmorrhoidibus.
15. — Morbis mentis, & quidem de morofitate ex causa biliosa.

DE FEBRIBUS BILIOSIS ANOMALIS, GENERATIM.

Numerus febrium biliosarum anomalarum ingens sane est, & longe superat catalogum nunc paulo ante a me in medium prolatum. Cum enim constitutio nostra epidemica in affligendis corporibus non solum sæva, sed & in variandis speciebus, ne una forma læderet, admodum prolifera, varios casus videndi mihi daret occasionem; factum est inde, ut præter modo recensitas species, sæpius etiam observaverim alias e. g. Febres hujus prospiciæ intermittentes, catarrhales atque inflammatorias. Sed de instituto hos morbos describere, cum brevitatis sim studiosus, eam ob causam omisi, quia celeberrimorum & de medicina bene meritorum libri prostant medicorum, in quibus dicti morbi, quamvis non sub nomine morborum anomalorum, ad naturam tamen depicti occurrunt. Consulendi ergo isti auctores e. g. *Perill. van Swieten in Commentariis Bærbavianis: Senac in libro von den Wechselfiebern: Huxhamus in operibus Physico medi.*

G 2



medicis : nec non Grimm in der Epydemie zu Eise-
nach : reliquos taceo.

Sed ne ita facturus rem majoris momenti, non
ex sufficiente ratione, prætermisſe videar, etiam
has paucis verbis infra comprehendam. Quod ſi
mihi autem nunc largiatur, hos morbos, quos omni
tempore ex hoc fonte enatos viderunt practici atten-
tiores, ſaburra bilioſa eſſe productos, cur de reli-
quis dubitabimus?

Equidem viderunt ex fonte bilioſo longe adhuc
alios, diſſimisſisque ſymptomatibus ſtipatos morbos,
auctores alii. Sic inde febrem ſumme putridam
enatam vidit *Clegborn* in Epidemia *Minorcana*;
Petechias Cel. *Strack* ; Purpuram *Frid. Hoff-*
mannus ; Morbillos viderunt alii. *

Sed ego, fidem celeberrimis viris non abnegans,
tantam malignitatem, ſi verbo licet uti, quod Cel.
Marcardus ** reddidit dubium, in hac noſtra epi-
demia, ſi a ſtatu partus, variolarum atque ver-
mium complicatorum diſceſſerim, vel nunquam vi-
di, vel ſaltem non ſemper huius originis fuiſſe pu-
to, magis *Vogelio* *** accedens, qui eiſusmodi
morbos ad ſynochum putridam refert. Nemo hinc
mirabitur, methodum antiſepticam, per eminentiam
talem

* Vid. Cel. Selle in Diff. ſupr. alleg.

** Vid. Differt. Examin. rigor. mal. febr.

*** Vogel. Præl. l. c.



talem, in morbis ab hac constitutione epidemica dependentibus raro, exceptis illis paulo ante commemoratis complicationibus, & ferme nunquam aliter, a me fuisse adhibitam. Parili etiam ratione morbis; quoad externa, toto, uti dicunt, cœlo, a febre biliosa regulari distantibus, factam esse feliciter medicinam, ex sequentibus patebit clare & perspicue. Nec crimini mihi posse verti arbitror, quod pro singulari morbi natura diversam quandam methodum medendi, paulo a methodo generali deflectens sæpius iniverim, ad Poëtam provocans:

Et quoniam variant morbi, variabimus artes;
Mille mali species, mille salutis erant.

Monendum adhuc restat: febres biliosas anomas mox in intensiori, mox in remissiori gradu homines affligere; raro autem, si a febribus biliosis nervosis discefferim, tam diu trahi, quam ipsam febrem biliosam. Habent porro hi morbi suos prodromos, in stadio primo enarratos, neque deest stadium tertium. Nam morbi semel fugati levissima ex causa recurrunt.

De subiectis infra seorsim dicetur.

DE FEBRE BILIOSA NERVOSA.

Sequens hominum genus, docente id experientia, huic feбри maxime patebat: homines iuniores; feminæ hystericae atque debiliores; qui frequentibus ingurgitationibus atque potui inebrianti erant dediti;



dediti; qui potentiam animatam in visceribus alebant; qui laxantibus atque venæsectione erant abusi; vel qui labores intensos subierant; denique tales, qui difficulter & non ex toto ex alio morbo emerferant. Magis hæc febris sub fervido sole, quam sub aliis tempestatibus accensa est visa e. g. æstate 1778 & 1779. Antequam autem illa prehenderentur homines, plerumque querebantur de ingenti capitis dolore, nunc frontem, nunc, quod frequentius, occiput occupante, & per totum morbi decursum sæviante, cui statim iungebatur molestia quædam circa ventriculum, quem ex prandio vel coena offensum esse putabant. Nauseosi hinc sunt inventi, & in nonnullis erant vomitus inanes. Animo erant abiecti; morosi, timidi, lacrymantes & facile desperantes, quod non itidem in febribus biliosis regularibus animadverti. Membra his ad quemvis motum tremebant, atque genua vacillabant. Frigus calore intermixtum in principio vix perceptibile, ingravescente morbo quidem increscens, semper tamen ita ut calor alius ex alio fieret, nunquam in ingentem æstum abiit. Faciei color in febre biliosa prehensis roseus; his magis pallidus, luridus atque fulvus fuit. Febre non obstante, raro primis morbi diebus lecto erant adstricti, sed foco adsidebant, vel pedibus incertis in domo obambulabant. Quamvis nonnullos viderim, qui non ultra aliquot horas de die lecto, durante morbo, essent adstricti, plures tamen gravior factus morbus lecto affixit. Facili autem tunc negotio sudore diffluiebant; somno non resistebantur, & si forsan oculos clauderent, turbabantur



bantur miris phantasmatibus, quæ etiam sæpe vigilantibus aderant. Pulsus erat multo debilior ac in simplici febre biliosa; lingua impura, in principio morbi tantum mucida, tandem lutea, quin & nigra, cum sapore amaro, nauseoso. Alvus nunquam ex æquo parebat; in principio maxime diarrhœa vexabat. Urina valde varia. maxime limpida atque turbida. In nonnullis singulares contractiones manuum pedumve sunt observatæ; in aliis autem spasticæ quædam contractiones viscerum abdominalium, vel eorum a flatibus distensiones sunt subortæ. Semper hinc eructabant hysteriarum in modum.

Surditatem iam primis morbi diebus enatam vidi, ad finem morbi perdurantem.

Multi propter levitatem morbi se febrile nescientes, per legitimam diætam & per usum medicamentorum alvumque moventium, sine ulteriori incommodo, cito convaluerunt, febremque superarunt in aliis pessimas insidias struentem, & homines nonnunquam, nemine periculum subolente, vita, præter omnem expectationem, subito privantem. Sic morte subitanea vir 33 annorum, qui ad nonum usque morbi diem, cum mens vitari cœpit, in domo ambulabat, die undecimo, superveniente phrenitide est interemtus. In plurimis autem diuturnior morbus est factus, ad 7mam, quin 8vam septimanam perdurans.

Venæsectione nil magis lædebat; atque laxantia, durante cruditate, sumta morbum semper exasperarunt,



rarunt, debiliori evadente corpore. Emeticum a contrario bene ferebant, vomebantque viridem bilem.

Differt itaque hæc febris a mera biliosa per momenta potissimum sequentia.

Febris est debilior, atque difficulter, quod in phreniticis animadvertit *Cælius Aurelianus*, ad superficiem corporis adscendit; dolor capitis maior; vultus pallidus atque tristis; moeror animi in his, in aliis mira præsto sunt phantasmata. Tandem variae spasticæ contractiones, tremores artuum, atque debilitas universalis oppido frequentius animadvertebantur.

Quibus rite perpensis, nemo dubitabit arbitror, descriptum morbum ad febres nervosas referre, ingenti nervorum ataxia, in singulis symptomatis, non loquente, sed clamante.

Quod si dein volupe sit, præsentem descriptionem cum observationibus Cel. *Huxbami*, * circa febres lentas nervosas institutis, comparare: ingenti, quæ inter hos morbos intercedit, similitudine quilibet sane tenebitur, atque convincetur de eo: nervos in his casibus subnatis mirum in modum fuisse fractos.

Verum enim vero, quanta quanta etiam ista similitudo sit, ea tamen non est tanta, ut omnem

ex-

* Opera Physico med. Pars I.

excludat differentiam. Nam morbos lentos nervosos conjunctos vidit Cel. *Huxhamus* cum exanthematibus pessimi moris, ut pustulis miliaribus; petechiis, male medicis audientibus, atque aphthis nigricantibus, certo infallibilique documento: materiam quandam putridam, sanguini admixtam, nervisque inimicam, tantorum malorum fuisse causam. Sed putridum talem sanguinis statum nunquam in hac febre biliosa nervosa vidi, neque comperi, illum aliis innotuisse. Aliam ergo causam, æque valentem febrem nervosam excitare corporibus, hic locorum, inhæsisse, morbumque irritasse, inde sane fluit. Quam autem causam proximam, *Bilem* circa præcordia hærentem, nervosque singulari modo lædentem, nec aliam fuisse, strenue affirmo. Cuius asserti rectitudinem signa bilis in historia morbi paulo ante suppeditata; constitutio epidemica, nec non methodus medendi maxima ex parte antibiliosa, extra omnem dubitationis aleam posuerunt.

Sistitur itaque febre biliosa nervosa singularis quædam species febris mixtæ naturæ, et nervosæ, et biliosæ, in quam, propter insidiosam principii lenitatem, anomali morbi notio omnino cadit.

*Medentem autem oportet, secundum effatum Hippocratis * in hoc morbo intueri tam communia quam propria.*

Communes habet hæc febris indicationes supra positas generales febris biliosæ, materię biliosæ præ-

* Hippocr. Epid. I. 5.



præparationem atque evacuationem indicantes. Sed suas quoque agnoscit proprietates, quæ in viribus fervandis, illisque, corticem peruvianum atque alia analeptica propinando, sublevandis, positæ quam maxime.

Huic ergo morbo medicinam faciens, primo vel quam statim licet, nam interdum digestiva sunt præmittenda, emetico quodam, quo corpus quidem fatigatur, minime vero infirmatur, ventriculum a saburra biliosa liberare, neque timere velit, quæ olim contra emetica, cum schola *Stabliana*, pronunciaverit *Junker*,* optime exemplo *Huxhami* refutatas, qui *homines minus vomitoriis quam laxantibus lædi* ** æstimat. Post vomitus celebratos, digestivis salinis, sal *Riverii*, vel sal ammoniaco, si diarrhœa vexaret, vel aliis mediis digestionem resolutionemque promoventibus, atque aquis stillatitiis gratis, locus erat concedendus. His interdum mature, interdum vero, quando corpus materia pituitaria onustum videretur, serius, cortex peruvianus, vel, quod cortice præstabat, extractum corticis erat interponendum, in parva dosi etiam utile, nam horresco quatuor uncias corticis, quas viginti quatuor horarum spatio propinasse refert Cel. *van den Boscb*.*** Præstabat dein, hæc medicamenta cum salibus atque aliis ita coniungere, ne æger propter debilitatem deficeret, vel
propter

* Conspec. Therap. Tab. 56.

** Vid. l. c.

*** L. c. p. 38.

propter obstructions alvinas supra modum angeretur.

Laxantibus hinc, superata cruditate, nunquam carere potuerunt decumbentes, quibus non ante egestionem magnæ quantitatis materiæ biliosæ redierunt vires; alias semper manente proclivitate recidivandi, vel in alium morbum migrandi.


De vino quidem inquit *Plinius: certum est non dandum in febre*, sed his paulo post adnectit: *Cardiacorum morbo unicam spem in vino esse certum est.* * Non quidem omnem febrem nervosam pro morbo cardiaco habeo: æstimo, autem, vinum febre nervosa decumbentibus haud tuto posse subtrahi.

Maximam similitudinem habet hæc febris cum phrenitide, cuius naturam atque sedem, singulari diligentia, in arte Machaonia versatissimus, & apud *Osnabrugenses* solertissimus Practicus Cel. *Fein*, * perscrutatus est.

Vidi talem casum in clerico quodam 30 annorum febre nervosa laborante, ad quem non antequam morbi diem, cum se iam restitutum crederet, ingenti diffuente sudore, sum vocatus. Sed, quod prædixi, evenit. Nunc enim primo morbus gra-

* Vid. Plin. Libr. 23. Cap. 24. 25.

** Vid. Dissert. de Phrenitide analecta. Göttingæ 1765.



gravis atque longus est factus. Nam præter ingentem nervorum memoriæque debilitatem aderant interdum deliria phrenitica; sputationes continuæ; loquacitas; laudes bonæ valetudinis atque illa signa, quæ habet *Cælius Aurelianus*: *vultus subinflatus, sive plenus; sanguinis per naves destillatio; vigiliæ iuges; somnus turbatus* * &c.

Urina in hoc semper erat varia, atque mutabilis; mox turbida atque crassa, in tenuem pellucidamque subinde abiens; nonnunquam etiam urina, præter rationem erat cocta. Quæ signa fallacissima, auctoritate *Hippocratis* atque *Baglivii* admodum in hoc morbo damnavit Cel. *Fein.*** Diu, mentis errore præpeditus æger, vim febris non sensit, & post aliquot demum septimanas, superveniente diarrhœa biliosa, convaluit.

Quanta autem in hac febre nervosa ex venæsectione atque laxantibus intempestivis oriantur mala, sequens docebit exemplum funestum. Femina hystericæ 53 annorum, spasmis abdominis sæpe vexatæ solemne per aliquot tempus fuerat, quotidiano laxante uti, quo tamen non potuit impediri, quo minus materia biliosa inquinaretur. Incidit hinc in febrem biliosam regularem, quæ methodo supra dicta non solum est fugata, sed optima valetudine dein per aliquot menses feminæ frui dabatur, donec, post varias animi commotiones, renas-

cens

* Vid. Cæl. Aurel. Libr. I. morb. ac Cap. II.

** Vid. Diff. de Phrenit. anal.

cens sentiret malum, quod laxantibus repetitis atque nimis tenui victu propellere tam longe abfuit ægra, ut febrem magis biliosam nervosam, cum summis anxietatibus stipatam, in maximam sui perniciem irritaret. Chirurgus vocatus, & se medicum iactans, non obstante tam ingenti debilitate, tamen tudit venam. Magis atque magis ista evacuatione intempestiva viribus fracta me tandem vocare iussit.

Anxiam, inquietam, nec in lecto se detinere valentem, sed iam per aliquot dies sellæ infidentem videbam. Somnum non capiebat; atque disfluebat ingentem in modum sudore frigido. Linguam gerebat nigram, atque tenacissimo muco obductam. Sitis erat ingens; sapor amarus; vomitus inanes; spasticæ contractiones in abdomine; ingens alvi obstructio; pulsus vix perceptibilis atque frequens; respiratio bona.

Tentata sunt frustra antispastica atque deobstruentia varia, quibus tandem venter apertus est redditus. Sed irrita erant omnia, neque Chinam perferre potuit. Paulo post fatis cessit.

Recte ad hunc morbum attendens, *Cardiacum Celsi* illum nominare non dubitavi. An ergo recte ad febres nervosas refertur? sub iudice lis est. Affirmat id *Huxhamus*, negat *Vogelius*.*

DE

* Vid. Prælect. academ. p. 40.



DE FEBRE BILIOSA BULLOSA.

Febrem bullosam, quam & Pemphigodem appellat Ill. *Vogelius*,* rarioribus febrium speciebus, sub nostro saltem cœlo adnumerandam esse, ex alto silentio plurimorum scriptorum rei medicæ abunde satis patet. Observatæ quidem sunt a nonnullis bullæ per certas corporis partes distributæ, cutemque fœdantes. Sic in facie & collo vidit bullas H. Fr. *Delius*: in faucibus atque circa pharingem viderunt alii, uti ex *actis Helveticis* refert ill. *Vogelius*. Per omnem vero cutem dispersas bullas, præter *Pisonem*** atque *Frenzelium*,*** animadverterunt, quantum scio, vix alii. Etiam si adessent huius rei scriptores alii mihi adhuc ignoti: operæ tamen erit pretium, illas observationes, quas mihi epidemia Tecklenburgensis circa hunc morbum suppeditavit, memoriæ hoc loco tradere.

Menſe Junii 1777 vocabar a patre ruſtico ad filium 13 annos natum, qui iam per aliquot dies morbo fœdo, nec inter vicinos ulli cognito, graviter decubuerat. Cum pueri videndi gratia domum intrarem: admiratio ſtatim ſubiit animum, in ampla illa domus parte, quæ ruſticis aræ muneribus fungitur, vannum ad cerealia a paleis depuranda aptam videre, quæ nunc lecto, adiectis illi fœno atque paucis pulvinaribus, quibus puerum incumben-

* Vid. l. c. p. 116.

** De Colluvie ſeroſ. Obſerv. 150.

*** Acta natur. curios. Vol. X.



bentem inspiciebam, erat accommodata. Quærenti ex patre, cur tam abiecte cum filio, quem perditæ amare professus erat, ageret, tulit responsum: neminem hæcenus ex propinquis præ fœditate manus auxiliatrices filio præbere ausum esse, remque decumbentis ab omnibus conclamata fuisse habitam. Accedens tamen & lintheamina auferens haud leviter sane inhorruì, cum ingentem copiam bullarum, in quas omnem, quam late corporis partes ambit, cuticulam elevatam inspicerem. Centenis quin pluribus vesicantibus puerum tectum credidisses, si omnem fidem superantem copiam bullarum nunc majorum, nunc minorum vidisses, quæ digito pulsum quærenti, cui parti imponeretur, vix relinquebant locum. Neque enim facies, neque planta pedum, neque alia pars carebant bullis.

Varie autem illæ erant magnitudinis; nonnullæ ova columbina, quin majora; aliæ vero nucem avellanam æquabant; plurimis pisum quoad magnitudinem non excedentibus. Quod ad colorem consistentiamve autem attinet, pellucidæ pallescentesque sunt inventæ. Ex secta bulla profluebat humor albus, albumini ovi similis, tenax atque summe glutinosus, qui lintheamina inter se & partes corporis cum linteo tegente, glutinis instar tam firmiter adnectebat, ut magnus, si cohæsiō ruditer auferretur, puero inde sit enatus dolor, lacrymas excitans precesque: nollem afflictionem addere afflicto. Nec hoc sane mirum erat, quavis rudiore vellicatione sanguinis fluxum excitante, unde loca affecta sanguine suffusa videbantur, quæ tractu
tem.



temporis, sanguineque exsiccatō, in escharam nigram vergebant.

Vidi huic admodum simile phœnomenon, alio tempore, post applicationem vesicatoriorum, in persona gracili, irritabili, febre biliosa decumbente. Ex discissa bulla profluebat humor limpidus, quodammodo tenacior, quam sequi alias solet; sequenti autem die, loco feri, aderat sanguis, qui dein nigrescens, loca reddebat horrida aspectu.

Sed redeo ad præsentem casum. Maculas nigras huic morbi generi familiares esse, hasque a Cel. *Sauvages* esse annotatas, testatur Cel. *Selle* in dissertatione supra citata.

Febris signa dein non solum erant aperta, sed & eius indoles biliosa, ut cetera taceam, ex lingua impura, biliosis simili; sapore ingrato, nauseoso; et ex horroribus intercurrentibus, quodammodo constabat. Erat insuper anxius; siticulosus; ventre obstructus, animo constans.

Dolorem vix alium sentiebat, quam urentem, a materia ex bullis profluente excitatum.

Bullæ primo in pedibus, vix febre præsentē & puero adhuc ambulante, sunt observatæ; dein per totam cutem, uti descripsi, sunt dispersæ.

Primum, quod suasi, erat: bullas saltem maiores lanceola aperire, dein illas linteo sicco mollique expri-



exprimere, materiamque leniter auferre. Jussi dein loca aperta pannis tegere, quibus inunctum erat unguentum istud *Hænianum*, in exasperationibus cutaneis, ex longinquo in partem quandam decubitu eratis, salutiferum, quod fit super ignem ex vitello ovi atque spiritu frumenti. Eligendum autem mihi fuit hoc, quod dixi, linimentum, partim propter insignem, qua pollet, vim refrigerantem, aliunde iam mihi notam, & in casu præsentis, propter sensum ardoris admodum necessariam; partim etiam, quia propter remotionem locorum vix alia erant comparatu. Nunquam autem postea me hoc medicamine usum fuisse pœnituit. Nam sensus ardoris inde non solum egregie est emendatus; sed & arcta linteaminum cohæsiō inde impedita.

In reliqua medela maxime quidem methodum antibiliosam sum secutus: sed illa tamen statui præsentis quodammodo fuit accommodanda. Dedi hinc mixturam salinam ex sale absynthii cum aceto vini super saturationem mixtam, cui dein, præter aquas stillatitias, pauca grana Camphoræ in mucilagine gummi Tragacanthæ solutæ, atque saccharum addebantur. His per aliquot dies adhibitis, laxantia potui dedi, quæ multa biliosa subduxerunt. Decumbendum quidem puero adhuc per aliquot tempus fuit, non febris, sed ulcerum causa. Tandem autem, squamis bullarum desiccantibus, atque deciduis factis, cum sanitate in gratiam rediit.

Sed cum ex his omnibus fons biliosus nondum forsan satis constet: argumenti loco addo, me post

H.

sa-



superatam febrem biliosam, in femina a materia biliosa non rite liberata, similes bullas, sed non tam numerosas, delata materia ex intestinis ad peripheriam corporis, semel observasse; & ex alio audivisse, se simile quid sensisse.

Quod si dein præcedentem enarrationem morbi cum descriptionibus bullarum comparaveris, ab aliis auctoribus, & præcipue ab Ill. *Vogelio** traditis: fieri non potest, quin differentiam quandam, ratione materiæ, detegas. Ex istis bullis enim, feri quandam speciem i. e. fluidum aquosius promanasse, statuunt isti viri; cum in bullis e contrario a me descriptis, materia glutini baccarum visci querni admodum similis sit inventa. Quæstio hinc posset moveri, an serum coagulatum has bullas excitaverit; an potius in intestinis stagnans materia biliosa, pituitaria, supra descripta, ad corporis peripheriam, vias aperiundo, potuerit deferri? Magis pro posteriori sententia pugnant experientia,** atque hac nutritus Cel. *van den Bosch*, inquit: *Degenerata autem materia mucosa, calore corporis inquilino acris, exque primis in secundas vias, indeque ad corporis peripheriam deferretur, &c.****

His

* Vid. l. c.

** Exempli loco febrem scarlatinam, de qua in capite sequenti agetur, atque erysipelas adduco; de posteriori morbo per vulgus ferme notum est, in eo acrimoniam biliosam, in internis partibus genitam, subinde peccare.

*** *Vanden Bosch*, l. c.



His omnibus inter se collatis, nemo descriptum morbum pro bilioso anomalo æstimare facile dubitabit.

DE FEBRE SCARLATINA BILIOSA.

Febris scarlatina nostris incolis admodum adeo familiaris est, ut morbus endemius possit dici. Interdum autem epidemice grassatur. Pandemium vidi in pago quodam, cuius incolis fagopyrum quotidie in cibum cedit, & qui placentis inde frixis abutuntur. Pessima omnium epidemia erat illa 1775, cuius brevem descriptionem *Adversarium medicorum Part. II.* inseruit Ill. Metzgerus.* Maxime, ut reliqua taceam, puellæ a duodecimo ad vigesimum secundum ætatis annum tunc infestatæ sunt inventæ. Erat autem istud morbi genus inflammatoriæ atque putridæ indolis, longe diversum a casibus in præsentibus paginis descriptis, in quibus fomes biliosus, circa præcordia hærens, & levi investigatione detegendus, nunquam non peccabat, demonstrantibus id lingua impura, biliosa; sapore amaricante; ructu nauseoso; vomitibus biliosis &c. Præcursores etiam hæc febris istas molestias habebat, in stadio primo enarratas.

Subiecta huic morbo obnoxia, exstabant varia: Maxime autem feminæ juniores debilesque; dein ætas infantilis.

Morbus contagio non expers esse videbatur. Nam unus in domo morbo infectus, facile ad re-

H 2

liquos

* Vid. l. c. p. 57. seq.



liquos transtulit malum. Sic matrem & quatuor infantes una, hoc morbo laborantes vidi. Quod ad anni tempora attinet: maxime sæviebat vere 1778, & æstate anni proxime antecedentis 1779.

In plurimis febris admodum facilis erat toleratu, & vix pro morbo habendus, qui non ultra aliquot horas de die lecto erant adstricti. Leviter in his tantum rubebat cutis; neque angina erat molesta. Alii autem gravius decumbebant, quales erant puellæ sanguine florido donatæ, quæ propter anginam inflammatoriam periculo non vacabant. Interim tamen neminem ab hoc morbo interemtum scio, si a puero discesserim, cui propter intermissum emeticum, & ob malam dietam, a faucibus, cum iam convalescere inciperet, ad pulmones delata fuit inflammatio mortifera.

Vidi e contrario alios, in quibus tumor atque rubor ab externis pectoris partibus ad collum faucesque, sine tamen omni noxia, sunt delati. Internam vero faucium inflammationem pharyngem magis quam laryngem occupasse, ex impedita deglutitione, salva respiratione, satis abundeque apparebat. Et quidem inter hos quædam varietas adfuit. Nam quamvis in nonnullis rubor atque dolor, quin & tumor aliquis adessent: in multis tamen vix visibilis inflammatio urgebat, magna potius quantitate muci tenacis in fila ductilis, omnem oris cavitatem, quin & fauces atque tubum cibarium replente, qui ex ventriculo, tanquam fonte, sentientibus id ægrotantibus, renasci est visus.

Gar.

Gargarismata vel iniectiones hinc vix ullius erant usus; sed emeticis etat utendum, quibus magna quantitas mucis bilisque, non sine insigni levamine ægrotantium, est egesta. Quibus autem vomitoria non fuerunt propinata, his diu cum morbo, ingentibus anxietatibus stipato, erat luctandum; et multis gargarismatibus vel iniectionibus, quæ oxymel scilliticum atque sal ammoniacum reciperent, opus habebant.

Quod ad maculas scarlatinas autem attinet: die morbi secundo vel tertio erumpentes, non omnem cutem, uti id epidemiæ 1775 solemne fuit, erysipelatis in modum infestabant; sed facies tantum, collum, pectus atque extremitates superiores rubebant, cæteris partibus manentibus liberis. Neque hoc, quod affectum erat, diu hunc colorem retinuit, cuticula iam die decima, vel paulo serius, per squamas reddita decidua.

Hydropem pedissequum febris scarlatinæ, docente id Cel. *Rosenio*, quemque in epidemia 1775 multi subierunt, post hanc febrem enatum me vidisse, non recordor.

Subinde hanc febrem complicatam fuisse cum febre arthritica biliosa; tussi; vel alio denique morbo, dixi jam supra.

Restat ut dicam, materiam pituitariam primi generis in hac febre ferme non semper peccasse, atque ingentes obstructions alvinas creasse.



Ex dictis nunc constat, hanc febrem non admodum fuisse periculofam, &, recta adhibita medela, facili negotio potuiffe superari.

Partem curationis iam antea absolvi. Superest adhuc monere, vomitum etiam in illis casibus fuisse excitandum, in quibus communis methodus medendi emetica vitare iubet, anginæ inflammatoriæ malum puto. Nunquam autem inflammatio erat tanta, quanta in vehementioribus anginæ periculis esse solet, in quibus ne audaciffimus quidem id remediî genus haufui dare non timeret. Cognoscitur autem inde, quanti confitet, caufas morborum fcire!

Emeticis, in his casibus acrioribus, ut tutius per fuperiora corpus poffet purgari, fæpius præmiffi venæfectionem, quæ in reliquis casibus certo nocet,

Quod ad reliquam curam attinet: præter digestiva, propinandas dedi mixturâs falinas, quodammodo camphoratas, atque acidulas. Tandem, cruditate fuperata, laxantia repetita neutiquam potuerunt omitti.

Huic fimilem morbum defcriptum legimus apud III. *Baldingerum* in fcripto illo periodico, quod fingulis menfibus, fub titulo: *Neues Magazin für Aerzte*, * in ufum practîcorum editur. Conferri etiam

* Vid. *Istes Stuck vom Jahr 1779.*



etiam merentur, quæ *Rosenius* in dilecto libro: *de morbis infantum*, super hoc morbo cum orbe literato communicavit. Reliquos auctores vide apud Cel. *Selle*.

DE ANGINA BILIOSA.

Angina biliosa eodem modo, quo febris scarlatina, & incipiens, & desinens est, illo tantum interposito discrimine, quod corpus a maculis integrum præstet. Brevibus hinc tantum de hoc morbo agam, qui tutus esse solebat, & spatii minime longi.

Magis in hoc morbo, quam in præcedenti, deglutitio atque respiratio erant impedita; maior etiam aderat inflammatio, cum tumore atque rubore iuncta. Sed & mucus eiusdem naturæ atque originis, non secus in hac, quam in scarlatina, erat molestus; infantibus præcipue, quibus morbus maxime erat familiaris. Coniuncta cum his malis erant febris levioris gradus, atque varia incommoda circa ventriculum. Signa bilis autem erant ea, quæ in febre scarlatina posui; neque vix alia remedia desiderabat morbus, quam eo loco laudata. Propinavi nempe emetica; gargarismata; mixturas salinas; sub finem laxantia.

Suppurationes, quas in febre scarlatina nunquam vidi, in hac angina biliosa, aliquoties observavi.

Plura de hoc morbo vide apud Ill. Tissotum.*

DE

Avis au Peuple Tom. I. Chap. VI.



DE FEBRE ARTHRITICA BILIOSA.

Inter causas arthritidem excitantes, saburram biliosam circa præcordia stagnantem, non infimum occupare locum, præter *Hippocratem*, * qui a bile corrupta & sanguini admixta articulos male affici docuit, experientia ductus egregie demonstravit Cel. *Musgravius*. ** Pluribus autem atque gravioribus argumentis idem postea comprobare Ill. *Schræderus* & Cl. *Dugend* in Dissertatione Inaugurali de *Arthritide vaga*. *** Sed & epidemice interdum vagatur arthritis, eaque ex causa biliosa. Sic, ut Ill. *Strack* taceam, qui in *Actis Moguntinis* Parte I. **** epidemiam arthritidis vagæ descripsit; ex fomite bilioso, talem morbum vidit Cel. *Stolle*. ****

Erat autem id genus morbi inflammatoriae simul indolis, cui vesicantibus atque antiphlogisticis medebatur medicus *Vindobonensis*, longe diversum a nostra nunc describenda constitutione epidemica, in qua tantum aberat, sanguinis dispositionem inflammatoriam videre, ut ab illa potius quam maxime recederet. Nam genus hominum, quod huic morbo succubuit, quales erant debiles atque tene-
ræ

* *Hippocr.* de intern. aff. Cap. 44.

** De *Arthritide symptomatica* p. 64.

*** *Göttingæ* 1768.

**** P. 317.

***** *Ratio medendi in nosocomio practico* P. I.
1776.



ræ femellæ, inflammationi creandæ, obstabant quam maxime.

Antequam articuli afficerentur, iam per aliquot dies homines, mox in intensiori, mox in remissiori gradu, febre laborare solebant, sentiebantque varia incommoda bilis, ut nauseam; vomitum; dolorem circa regionem ventriculi; sitim; obstructionem alvi ingentem; & præcipue absentiam somni. Vidi hominem hoc morbo laborantem, per tres septimanas somno carere; & qui, subacta materia biliosa, statim somno est reffectus.

Die febris secundo vel tertio articuli manus vel pedis dolere incipiebant, quem paulo post tumor ingens, ut œdema simularet, excepit. Dein uber sudor erumpebat, atque dolor invalescebat, qui plerumque erat fixus, sed sæpius vagus. Neque his incommoda circa ventriculum, paulo ante descripta, sunt emendata, tam diu persistentia, donec lucta naturæ, vel ope artis, vinceretur materia biliosa. Qui ergo medicamentis carebant, diu & per menses huic morbo succubuerunt. Quæ cum ita in nonnullis casibus comparata esse viderem: methodum antibiliosam huic malo opponere nullus dubitavi, quam dein experientia comprobavit.

Equidem methodus illa, supra in parte priori laudata, fuit adhibita, e. g. digestiva atque emetica; sed eligenda etiam fuere talia indicata, quæ, siqua essent, iam ab aliis in arte peritis viris, in hoc morbo salutifera sunt inventa. Kermes autem minere
rale



rale, toties a doctis viris * in his casibus laudatum, egregias minimeque contemnendas virtutes resolventes, diaphoreticas, atque laxantes hic sæpius edidit. In aliis casibus autem, quando nimia quantitas materiæ pituitariæ peccaret, omnem paginam absolvebat *pulvis alterans Plümmeri*. Calomel enim in maxime desperatis arthritidis doloribus summam sæpe utilitatem præstare, vel mea vice, minus apposite arguentibus, absolvat *William* in der Anweisung für diejenigen, welche die Gicht haben. **

Ex classe remediorum salinorum elegi sal mirabile Glauberi, quod in his morbis biliosis egregias possidet vires incidentes, atque resolventes. Possunt inde laudes explicari, quas huic sali, methodo *Gravenhorstiana* præparato, tribuit beatus *Waglerus*; & casus possunt determinari, quando utile.

Cum & huic hominum generi potum calidum nocivum viderem: ut aqua limpida succo citri, vel aceto vini temperata, sitim fallerent, lubenter permissum dedi.

Externe cerato, vel panno, quem *Flanell* dicunt, partes tegere suasi.

Complicationes huic morbo familiares erant scarlatina biliosa, atque tussis; reliqua.

Et ita quidem se habent febres biliosæ anomalæ, quas fufius describere, supra promiseram!

Restat

* Vid. Tiffot, & van den Bosch l. c.

** Aus dem Englischen übersetzt.



Restat adhuc ingens numerus febrium intermittentium, catarrhalium, atque inflammatoriarum, quas plane sicco pede transire, vetat instituti ratio.

Febres intermittentes cæteris febrium speciebus omni quidem tempore erant intermixtæ; sed maxime eas protulerunt ver 1776 atque autumnus 1779, quæ vel primariæ, vel secundariæ, post male curatam febrem biliosam exstiterunt. Et hæc quidem erant vel quotidianæ, vel tertianæ, vel quartanæ. Quotidianarum genus frequentissimum fuit. Saburra biliosa, mucosa, in epidemia regnans, nunquam non in his facile detegenda, eandem postulabat medendi methodum, quam supra in febribus biliosis laudavi; & Chinæ præmaturo usui eadem obstabant impedimenta, quæ supra sunt commemorata, ingens nimirum materiæ visciditas, quod sequenti comprobabitur casu.

Vir cholericus, 60 annos natus, qui in ætate virili multoties febrem intermittentem regularem erat expertus, autumnus 1777, cum plures in eius domo febre biliosa correpti essent, variis laborabat incommodis, ex orgasmo sanguinis bile irritati oriundis, quæ, quamvis interdum leviora essent, tamen non ante æstatem 1778 disparuisse sunt visa. Utebatur dein, ut reliqua taceam, æstatis tempore, aquis Pyrmontanis, quas ex fonte hausit. A Thermis rediens, & se restitutum credens, circa autumnum repullulantem sensit morbi nequitiam, congestionibus nunc magis in motus febriles mutatis, quibus dein iungebantur varia incommoda læsæ digestionis, nec non anxietates ingentes



gentes, ita ut melancholiæ metus nonnunquam fuboriretur. Sed, variorum digestivorum atque evacuantium remediorum usu, corporis conditio quodammodo quidem fuit emendata, motusque febriles propulsi; sed neque anxietates plane disparuerunt, neque crassa linguam tegens pellis ullo opere potuit auferri, a chinæ usu ingravescente malo. Vere 1779 motus febriles denuo excitabantur, qui ad ætatem usque permanebant, pelle linguæ adhærente multo adhuc reddita crassiore. Qui motus febriles, antea sine ordine decurrentes, nunc typum quendam servare inceperunt, quarto quovis die malo ingravescente, persistentibus reliquis diebus a febre liberis. Quibus rite perpenſis, febrem quartanam subolere cœpi. Redii hinc, præmissis præmittendis, ad Chinam. Sed minus res ex æquo parebat. Nam anxietates inde magis increscebant, febre non remittente.

Ad pellem tenacem, linguam tegentem, cuius exemplum habet *Cel. van den Boſch*,* nunc accuratius attendens, nec sedimentum lateritium in urina videns, viscidam atque biliosam intestinorum materiam accusavi, quam omnibus viribus referendam esse putavi.

Cum nimis debilibus armis me antea pugnasse viderem, quamvis sale ammoniaco, atque cæteris resolventibus in magna quantitate eram usus: fortiora tentare decrevi. Inciderunt mihi autem in
men-

* L. c. p. 177. & seq.

mentem eximiae laudes, quas Calomelli in profligandis nonnullis febribus intermittentibus post *Frid. Hoffmannum* tribuit *Cel. Lyson* *. Statui hinc, hoc remedio esse utendum, cuius grana duo cum sale ammoniaco atque rheo singulis mane sumsit, dummodo febris non inquieta aliqua tempora præstaret. Vix aliquot dies erant elapsi, cum pellem in lingua decreascentem viderem, egesta simul, in magna quantitate, pessimum odorem spargente materia biliosa.

Nunc Chinam tentare suasi, quam sine noxa sumturum pollicebar. Neque eventus spei erat adversus: Nam, sine vitio visceribus illato, quievit paulo post morbus. *Febrem catarrhalem biliosam* non diminutam perspirationem, neque frigorificas aëris particulas, sanguini admixtas, illum, que, ex sententia *Keilii*, ** congelantes, sed aliam causam sequi, vero admodum simile est. Inexplicabilis enim aëris quædam constitutio ad hunc morbum requiritur, qua mediante in corporibus materia biliosa onustis, istud malum irritatur.

Ferre omne hominum genus huic morbo succubuit, qui maxime sæviit hyeme 1779, & 1780.

Morbum anteibant lassitudo, atque gravitas corporis; dolores capitis; atque noctes inquietæ.

Dein

* *Eysens practische Abhandlungen aus dem Englischen* 1774.

** *Keil Tentamina Physico medica, Disquisitio* I. p. 24.



Dein, post leve frigus, accedebant indicia catarrhi, ut gravedo; raucitas; angina; tussis; quibus statim iungebantur incommoda quædam circa ventriculum. Maxima ex parte hinc erant nauseosi, cibumque averfantes; & sæpe bilem vomentes. A cibo sumto autem, præsertim, si in carne, lacte, vino atque potu calido delictum erat commissum, peius habebant omnes. Hæc ergo erant vitanda, sed magis cibus levis, acidulæque indolis sumendus; atque haurienda aqua pura, aceto vini mixta. Ab infusionibus pectoralibus nihil solaminis habebant; neque sudorifera ullius erant usus. Medicamenta incidentia autem, salina, digestiva atque leniter laxantia, quin & vomitoria interdum cito sæpe morbum profligarunt. His tamen interponenda erant oxymellita, atque sulphur antimonii auratum tertiæ præcipitationis.

Peior autem erat casus, qui neutiquam periculo vacabat, quando materia ista bilioso - catarrhalis pulmones occuparet, atque peripneumonix nothæ speciem efficeret.

Insidiosus erat morbus, atque in debilibus vix curabilis. Hac, ne quid reticeam, nuper extincta est matrona, cuius historiam morbi p. 85 & 86 suppeditavi, quæ tamen servari potuisset, dummodo emetico permissum dedisset.

Febris inflammatoria biliosa in nostra epidemia admodum varias ludebat formas, atque gignebat morbos nomine magis, quam re ipsa, inter

se diversos, pleuritidem nempe, peripneumoniam, pleuropneumoniam atque hepatitidem. Tantum abfuit, ut venæsectionem in his casibus semper bono eventu secundatam vidissem, ut noceret illa potius in casibus nonnullis. Quando autem ægrotus, vel morbi gravitas id auxilii genus postulerent: videndum erat sane, ne in nimis larga quantitate, una cum sanguine exhaurirentur vires, quod morbum invalescere stabat. Exstat casus a me supra descriptus, qui id comprobat. Anxietates atque respirandi difficultates usque adeo post alteram venæsectionem erant auctæ, ut certo animam efflasset æger, nisi resolventibus atque laxantibus citò a materia biliosa esset liberatus.

Nunquam hinc, qui *Baglivium** sequuntur, tam audacter secabunt venam.

In nonnullis casibus materia, pulmones inflammans, tam viscida est inventa, ut nonnisi pulveribus calomellanis obstructio potuerit referari. Vidi tale exemplum in homine sexagenario, peripneumonia biliosa laborante, & ab omnibus iam pro conclamato habito. Nam pulsus erat ad quævis minuta secunda intermittens. Qui, cum iam per aliquot dies hoc morbo graviter decubuisset, nec quidquam coctæ materiæ per sputa ejicere potuisset: moribundus ferme, secundum effatum *Celsi*, in extrema tentanda, sumisit pulveres nonnullos Calomellis, cum tam egregio eventu, ut statim spu-
ta

* Bagliv. l. c. in Cap. de Pleuritide,



ta coëta haberet, atque per ventrem multa biliosa, cum reditu optimæ sanitatis, egereret.

DE MORBIS BILIOSIS ANOMALIS NON FEBRILIBUS, GENERATIM.

Propositis morbis febrilibus, progredior nunc ad id fœcundum genus morbi biliosi anomali, quod febre vacat. Nolo autem, hanc negationem febris ita intelligi, ut & ad quoscunque motus febriles, quos subinde videre est, extendatur, omnisque pulsus frequentia excludatur. Solemnè potius his morbis erat, frequentibus motibus febrilibus mutari, augeri, quin & imminui. Quid quod! in corporibus nonnullis, in quibus calor præternaturalis nondum antea accendi inceperat, sub finem morbi, vel post usum medicamentorum digestivorum atque alvum laxantium, identidem febrem levioris gradus atque biliosæ indolis subnatam vidi. Inde autem morbi natura non solum in aprico, & contra obiectiones minus credulorum tuta est collocata; sed & ægrotis hoc admodum, fuit proficuum, febre, inter resolventia, remedii optimi munere fungente. Fit autem, ut verbis Cel. *Werlhofii** utar, per ipsos motus naturæ, ægrotantis licet, eosque tam atterendo, alterando, & aperiendo, seu coëtionem & separationem molientes, quam aut congestione ad partes ignobiliores, aut potissimum excretionem critica, materiam morbidam removentes.

Sed

* Werlhof. de limitandis laudibus & vituperiis medelar.



Sed cum ars febres excitandi multum ab hoc viro magno simul sit limitata, dum *non gradus eius* ex sententia *Rhodii in medici arbitrio* sit: nunquam tutum judicavi, febrem irritare.

Subiecta morbis biliosis anomalis non febrilibus maxime obnoxia, exstabant sequentia:

Primo, corpora senilia, quæ, præeunte *Hippocrate* in Aphorismis, ad febres non valde sunt disposita; dein, quæ laxo corporis habitu erant donata, utpote quæ, nam *bebes est*, monente *Lommio*, corpus *obesum*, etiam non facile febriunt; homines porro atrabilarii, & qui de sapore vitriolico adstringente conquerebantur valde; gens iudaica denique post festum paschatis, cum panis non fermentatus illi in cibum cesserat; vel tandem alii, qui singulari quadam corporis dispositione non enarrabili erant præditi, qua febris vel excludebatur, vel retardabatur.

Quum autem istæ conditiones ad finem morbi usque non semper permanerent: fieri utique potuit, ut procedente tempore, & adhibitis medicamentis resolventibus atque laxantibus, vel levior febris gradus, vel saltem motus febriles sæpennmero irritarentur. Quid quod! plus vice simplici veram biliosam febrem sic enatam vidi. Sed tunc cessante notione morbi biliosi anomali non febrilis, relegamus casus ad partem huius operis priorem. Loquor tantum de motibus febrilibus. Equidem non potest negari, morbi naturam biliosam, uti



iam antea dixi, tunc temporis esse extra omnem dubitationis aleam positam; sed neque in omnibus casibus, neque in principio, vel eo tempore hoc accidebat, cum medentis res hoc a natura datum consilii genus expostularet, atque medicum, propter initam methodum antibiliosam, apud ægrotum excusaret. Factum est inde, ut ægrotantes increduli subinde medico irascerentur, atque illum defererent, quoties bilem ab eo accusatam audirent. Quod, cum mihi multoties evenire viderem, istam methodum in nonnullis casibus abdicavi, aliam viam inire statuens. Sed ita peius adhuc ægrotantibus consuli videns, methodum desertam, vellem, nollem, denuo arripere debui; utpote qua apprimè confirmabatur, eandem nec aliam materiam biliosam, quæ in aliis febrem irritabat, hos morbos sibi quoque vindicasse. Quid quod! multoties sine prævia coctione nihil plane quidquam potuit profici; & laxantia, in principio data, morbum auxerunt. Medicina ergo his vix aliter erat facienda, quam febre biliosa decumbentibus; & omnis res versabatur circa digestiva, salina, acida, atque tandem laxantia. Quin imo propter absentiam febris, vel istius moliminis naturæ, quod viscida incidit, crassa attenuat, obstructa resolvit, potioribus atque diutius continuandis medicamentis præparantibus, ad pepasmm superandum, opus habebant isti morbi.

Ex his nunc sole meridiano clarius patet, me ad hanc classẽ morborum non illos casus referre

Quorum sanguine & igne micant oculi

i. e.



i. e. qui ex vehementi quadam animi commotione & præcipue ex ira oriuntur, cum his Ill. virorum *Gaubii* atque *Zückert* referti existent egregie super hac re editi libri, qui consulendi.

Quæ, cum ita essent comparata, nemo mirabatur, multitudinem hominum morbis biliosis anomalis esse extinctam, quorum nomina catalogo morbo bilioso interemtorum frustra inserta quæres. Sic, ut exemplo rem comprobem, gravida habebatur mulier, quæ tantum variis molestiis ex bile male angebatur. Suadebam remedia talia, quæ neque præsentī graviditati nocuissent unquam. Sed spretum fuit consilium. Tussi accedebat hæmoptysis, phthisis, atque dein omnium pessima solutio, mors.

Facili contra negotio a pessimis malis e. g. ab hydropē, cephalæa atque malo hysterico, ex hoc fonte enatis, liberavi alios, qui cum vulgo causam morbi ignorantes, citam medelam admirabantur.

Præcedentia signa morborum biliosorum anomalorum non febrilium maxima ex parte quidem erant ea in stadio Imo enarrata; sed sæpe etiam aderant, quæ passioni cholericæ anteire semiologiæ castus Scriptor, *Cælius Aurelianus* refert; *stomachi* nempe *gravedo* atque *tenso*; *anxietas*; *iacratio*; *vigilia*; *ructationes fumosæ*; *nausea*; *gravedo thoracis cum membrorum defectu*.*

* Vid. Cæl. Aurel. morb. ac. Lib. III. Cap. XX.



Quamvis negare nequeam, morbos, in sequentibus paginis descriptos, non alio tempore, quam durante hac nostra constitutione epidemica, esse enatos; similes tamen & aliis temporibus & aliis locis adesse posse, nullus dubito.

Cum ante aliquot menses in peregrinatione quadam tempus quoddam consumerem, incidi forte fortuna in hominem, iam per multos dies colica biliosa, omnibus symptomatibus nostræ epidemizæ stipata, tentatum. Linguam habebat aridam, siccam, tenaci muco bilioso obductam; sitim ingentem; & continuos conatus ad vomendum. Emeticum non dederat medicus, sed utebatur bolis ex Extr. Chamomillæ, Floribus sulphuris, & paucis granis Rhei conflatis—. Minus sane, propter ingentem visciditatem materiæ, aridebat medicamento forma, quam ipsa medicina. Sed hæc hæc nus!

Restat, ut evincam alios auctores, & præcipue Cel. Tissotum, quamvis aperte de his non loquatur, similes tamen casus morbi anomali non febrilibus observasse, nec plures illum potuisse annotare propter celerem decursum Epidemizæ, quam descripsit. Inquit autem: *Notandum est, generationem febris biliosæ non esse opus unius horæ, congeruntur semisim sordes, obstruuntur viscera, languent gastrici systematis functiones; imperfecta remanet digestio, imperfecta ergo & nutritio; nec eadem inde sanguinis quantitas conficitur,*

*ficitur, nec idem ille elaboratus sanguis, solus fere inflammari capax.**

Epidemia *Lausannensis* non ultra annum sæviit: fieri hinc non potuit, ut tam diversos ludos ageret, cuius Epidemia *Tecklenburgensis* capax fuit.

In Scorbuto autem non aliter rem comparatam esse, Cel. *Dinkgreve* docuit in eleganti Dissertatione, quæ L. B. 1772. prodiit, in qua similitudinem febris putridæ atque scorbuti evincit. Demonstrat hoc, ut reliqua taceam, ex symptomatibus & effectibus huius morbi variis, summam sæpe putredinem arguentibus, cumque iis febris putridæ satis convenientibus, ea tantum cum differentia, ut, quæ in febre putrida citius oriuntur, & se invicem sequuntur, in scorbuto, ob causam eius putridam minus validam, lentius suum cursum persolvant. Quæ si in scorbuto largimur, cur in aliis morbis negemus?

DE TUSSI BILIOSA.

Inter morbos huius profapiæ omnium frequentissimus tussis casus fuit, quam omni anni tempore & omnem ætatem affligentem vidi. Sed cum, durante hac nostra constitutione epidemica, quinque species tussis biliosæ observaverim, quarum unica tantum morbi anomali classẽ subit: numerus ægrotantium huc referendorum inde admodum fane imminuitur.

Prima

* Vid. L. c. p. 101.



1. Prima autem est tussis sympathica, quæ non nisi exacerbationis tempore in febre aderat; reliquo tempore autem, corpore manente ab ea integro.

Altera est tussis symptomatica, priori gravior, non intermittens, nisi per intervalla paulo levior.

Tertia species est accidentalis e. g. catarrhus feбри biliosæ superveniens.

Quarta coniuncta est cum febre catarrhali biliosa supra descripta.

Ultima tandem vel quinta est anomala, sæpe cum, sed frequentius sine febre homines infestans, & periculo non semper vacans, siquidem nemo tussim sine custodia sui tuta diu perferre potest.

Differt dein tussis biliosa ab omnibus reliquis hætenus ab auctoribus scriptis mandatis speciebus. Sic ut catarrhalem atque phthificam in præsentiarum missas faciam, minime cum stomachica, neque ferina, quam & convulsivam dicunt, est confundenda. Prior enim tantum cibus sumtis ingravescit, neque epidemice regnat; posterior autem alternis diebus invalescit, atque per paroxysmos, vomitu stipatos, infantes ferme solum infestat, neque semel superata, si *Rosenia* est credendum, redit. Longe aliter cum tussi biliosa rem esse comparatam, vel inde patet, quod sæpe ea cum febre biliosa sit coniuncta, & frequenter recurrat.

Tandem

Tandem etiam ex signis infra enumerandis constabit, hanc tussis speciem, & quoad causam, & symptomata ab illo morbo populariter grassante differre, cuius descriptionem dedit *Sydenhamus*. *

Maximam autem similitudinem habet cum tussi a vermibus orta, & a *Cel. van den Bosch* ** enarrata. Quamvis affirmare non audeam, in nullis casibus potentiam animatam læsisse; raro tamen hoc accidebat, quin etiam in plurimis ne vestigia quidem interaneorum animalculorum sunt inventa.

Accedentem tussim pro catarrho habebant ægrotantes, quem diaphoreticis lenire studebant. Sed morbus eundo crescebat. In principio percipiebant sensum quendam incommodum circa cardiae regionem, pulsantem, prementem, angustantem. His dein adiungebantur hypochondria inflata, atque dolor maxima ex parte hypochondrium dextrum, quod itidem in epidemia verminosa observavit *van den Bosch*, *** offendens. Si dextrum læsum erat: dolor eo loco residebat, quo bilis vesica a natura posita est, qui interdum tantæ vehementiæ fuit, ut illi ferendo vix vires ægrotantis pares fuissent, nisi fortissima compressione id, quod affectum erat, potuissent lenire. Nam, quando adstantes manibus impositis locum dolentem ex omnibus viribus comprimerent, vel quando ægrotantes

* Epistola responsoria p. 194.

** Vid. l. c.

*** L. c. p. 122.



tes hypochondrium corpori cuidam duro e.g. men-
sæ infigerent: facilius atque promptius non solum
tussiebant, sed & minus dolorem sentiebant. Pa-
roxysmo finito, nullus amplius dolor urgebat, at-
que tunc temporis respirationis negotium nullo mo-
do erat læsum. Atque sic

*Accusabat Cholera dextræ dolor! **

Inventi tamen etiam sunt alii, in quibus fini-
strum latus laboraret. Quod ad reliqua sympto-
mata attinet: pulsus erat debilis, mollis, interdum
iusto frequentior; tussis erat, maxima ex parte,
ficca, & muci tantum quid egerebatur; sub finem
morbi autem in nonnullis, minime vero in omni-
bus, inventa sunt sputa cocta biliosa, quæ mul-
tum de morbo demserunt. Vomitus quidem ra-
ro erat iunctus; præsens tamen, & biliosa egerens,
profuit valde. Plures autem sentiebant nauseam,
saporem ingratum, amaricantem; linguam habe-
bant talem, qualem sæpius descripsi. Aderant dein
plurima incommoda, in stadio primo suppeditata,
præcipue obstructio alvi, pertinax non solum in
senibus, sed & in infantibus inobediens; appeti-
tus varius, in his nullus, in aliis vera voracitas.
Quoad durationem, etiam varietas quædam existi-
tit: gravis atque diu durans erat in senibus, vel
in illis, qui malam diætam sequebantur, vel si alius
morbus simul erat complicatus; levis atque cito
decurrens in infantibus fuit, atque post supervenientem

* Vid. Schol. faler. l. c.

nientem vomitum biliosum, vel etiam diarrhoeam biliosam. Anni temporibus hanc tussim tam parum vidi adstrictam, ut illam potius omni tempore observaverim, nulla causa, transpirationem impediēte, præsente. Interdum epidemice regnabat, & vi venenum cum aliis communicandi, pollere, haud semel est visa.

Ad symptomata rariora, cum hoc morbo coniuncta, referri merentur: fitis, quæ, præeunte *Hippocrate**, atque testante experientia, in cæteris tussis casibus deesse solet; vigilæ dein; surditas; anxietas ingens; atque sanguinis striæ, citra inflammationem, per sputa reiectæ.

Male tractata oppressit multos, vel inflammationem, cuius indicia nulla antea exstiterant, excitando; vel pulmones materia tenaci viscidaque, quin & purulenta** opplendo; vel denique febrem lentam accendendo. Inde autem a priori morbo longe diversum statum oriri, nullus non videt. Morbi nequitiam multi hinc nimis sero intellexerunt;

&

* Aphor. 4. § 4.

** Vidi nuper feminam, sex menses gravidam, magnam quantitatem materiæ purulentæ tussi reicere. Nulli motus febriles, neque tussis antecesserant. Memini autem, me ante aliquot menses, in femina, cum illam forte fortuna viderem, fomitem biliosum detexisse; atque illi consilium salutare, quod autem spretum est, dedisse.



& adhuc doleo mortem patris multorum infantum, qui ob ignorantiam aliorum, vi morbi coactus, sic manus dedit victas.

Ex dictis nunc patet, variam, pro diverso morbi statu, ineundam fuisse methodum medendi, & in casibus posterioribus mox venæsectione; vesicantibus; expectorationem promoventibus; mox etiam aliis fuisse pugnandum. Sed ab his morbis deuteropaticis me nunc ulterius arcens, paucis verbis methodum medendi exponam, tussi biliosæ aptam.

In multis casibus emetico curationem inchoare, e re esse videbatur; atque sane plus vice simplici, unico emetico id effeci, quod a multis digestivis, atque laxantibus incassum antea speraveram. Interdum tamen etiam hoc medicamenti genus commode potuit omitti, materia nempe biliosa inferiores ventris partes obsidente. Omisissis nunc medicamentis expectorantibus, sæpe ventriculum lædentibus, ut oleosis atque dulcibus, sed non *mel- le*, quamvis illud damnet *Sanctorius*, * propinanda dedi medicamenta digestiva, salina, acida atque leniter laxantia. His interdum iungenda erant Extr. amara; Gummata ferulacea; oxymel scilliticum; sulphur antimonii auratum tertiæ præcipitationis; quin & interdum Calomel. Decocta sive infusa pectoralia nullum usum præstiterunt. Nullum enim hominum genus, quocunque etiam morbo

* Static. Sect. III. No. 101.

morbo bilioso laboraret, potus calidos perferre potuit. Egregie contra aqua frigida, vel simplici, vel aceto vini mixta, sitim extinxerunt.

Quæcunque autem adhibebantur medicamenta, his semper tam diu fuit utendum, donec nulla immundities linguam amplius tegeret.

Medicamentis pretiosis minime opus habet hæc tussis species. Sed vilissime sæpe constabat illam superari e. g. Cremore tartari solo.

Monendum adhuc restat, ex dictis morbi naturam biliosam extra omnem dubitationis aleam esse positam. Videntur nempe pulmones, intercedentibus nervis consentientibus, per acrimoniam bilis ad tussim excitari. Hoc, quod dixi, veritati consentaneum esse, singulari exemplo surditatis, una cum tussi biliosa & incipientis & desinentis, paucis adhuc comprobabo.

CASUS.

* Vir 68 annos natus, temperamenti cholericomelancholici, vitæ mobili deditus, & in diætâ, si a pinguibus discessero, vix vitium committens, hætenus, præterquam quod illum ante biennium iam semel tussis biliosa exercuerat, optima valetudine utens, accedentem tussim sibi iam notam, medicamentis diaphoreticis atque sudoriferis, quæ tamen in priori morbo non sumserat, superare quidem studebat, sed frustra. Aucta magis est de die in diem tussis, cui statim iungebatur surditas. Tussiendo



fiendo nihil emoliebatur æger, atque habebat noctes inquietas; alvi quandam obstructionem; sitim; saporem ingratum atque amarum. Maxima incommoda autem sentiebat in hypochondrio sinistro, ubi dolor, qui in priori morbo hypochondrium dextrum occupaverat, per paroxysmos irruens, ægrotum male habebat. Motus febriles erant nulli; neque inflammationis indicia poterant detegi. Interim tamen istud malum adeo pertinax, ut nullis medicamentis consuetis & internis & externis posset molliiri, ægrotum iam marcescentem reddidit. Tandem post aliquot septimanas tentata sunt medicamenta digestiva, atque laxantia antibiliosa; atque hausit multa diluentia, frigida, acidæ indolis. Vix dici potest, quanta faragine medicamentorum opus fuerit ad materiam viscosissimam resolvendam, atque de loco removendam, quæ tamen tandem manus victas dedit. Nunc, post egestam magnam quantitatem materiæ biliosæ, subito cessaverunt dolor atque surditas, optime sic confirmato Aphorismo *Hippocratis*; * *Quibus biliosæ sunt egestionēs, surditate superveniente cessant. Et quibus surditas, biliosis supervenientibus, cessat.*

Quilibet hanc historiam morbi cum illo tussis casu comparans, quem scripto suo periodico, *neues Magazin für Aerzte* nuper inseruit Ill. *Baldingerus*, ** ingentem sane phœnoménorum inveniet similitudinem, sed admodum dissimilem eventum.

DE

* Aphorism. 4. 28.

** 1tes Stück vom Jahre 1779.



DE ORTHOPNOEA BILIOSA.

Præcedenti vicinus morbus est orthopnoea biliosa, qua senes atque mulieres parturientes, *quin & iudæos post festum paschatis identidem vidi laborantes. Oritur illa sæpe ex tussi male tractata, uti iam supra monitum est; sed subinde etiam sine prævia tussi ingruit. Respirandi facultas in his propter materiam mucosam biliosam, ex primis viis ortam, atque pulmones opplentem, admodum erat læsa. Sublime hinc in lecto tenere caput debant ægrotantes, admodum anxii. Quamvis interdum aliquid cocti eiicerent: frequentius tanten spumam tantum in ore gerebant, quæ reiecta statim renascebatur. Quando autem cocta reiicerentur: erant lutea, viridia, quin nigra. Ex variis signis autem constabat, & infra septum positas partes, & præcipue ventriculum, sibilu infestari. Vomitoriis hinc raro potui carere, quæ & ipsis parturientibus aliquoties eo effectu dedi, ut instanti periculo metus detraheretur. Sequens autem erat formula maxime arridens:

℞. Pulv. Ipecacuanh. gr. XV — XX.

Aquæ emeticæ** Unc. sem. — drach. VI.


Sulphur. antimon. aur. 3tiæ præc. gr. II.

Oxymell. scill. Unc. sem.

M. S.

* Huic vitio mulieres opportunæ sunt magis, quam viri, inquit *Arctæus Cappadox.* vid. Libr. I. Cap. XI.

** Aqua emetica constat ex tartari emetici gr. I. & aquæ comm. Unc. I. m.



M. S. Cochleatim singulis semihoris fumendum, donec vomitus adfit. Hoc remedio nonnullos feliciter liberatos scio.

In levioribus malis provinavi cremorem tartari cum sulphure supra laudato antimonii, cui etiam alio tempore admixta fuerunt Extractum Taraxaci, gummi ammoniacum, atque radix scillæ, ex quibus dein pilulæ sunt formatæ. Profuit etiam gummi ammoniacum in aceto solutum. Sed neutiquam digestiva potuerunt omitti; quin & laxantia eccoprotica, ventriculo grata, vel vinum medicatum per epicrasin laxans, utilia erant.

Morbus male curatus, vel in mortis subitanæ causam abfit, vel excitavit morbum alium e. g. hydropem.

DE RAUCITATE BILIOSA.

Frequens symptoma vel febris biliosæ, vel tussis biliosæ, vel febris scarlatinæ, vel denique modo memoratæ orthopnoæ esse consuevit raucitas. Interim tamen etiam sæpe illam vidi enatam ex mera causa biliosa absque ulla alia complicatione, vel symptomate.

Subiecta huic morbo maxime obnoxia erant, docente experientia, homines spirituosos dediti. Quamvis in aliis prompte emendaretur malum, in his tamen periculi non expers fuit. Quum enim istud hominum genus, immemor dicti *Plutarchici*:



*chici: * robur laudabile quidem, sed morbo facile corruptibile*, levioribus casibus haud facile ferretur, sed morbum toleratu non difficilem, semper contemnat: fieri aliter non potest, quam ut succedente tempore, ex raucitate neglecta, propter causas hic commodè omittendas, orthopnoea atque phthisis oriantur.

Natura hujus morbi biliosa latere non potuit attendenti ad oris siccitatem, sitim; sensum quendam mordicantem circa ventriculi regionem; ad linguam denique impuram atque biliosam. Alvus tam parum in his, quam in reliquis malis ex bile, recte respondebat, nimiaque siccitate peccabat. Medicamenta erant ea, quæ iam toties laudavi. Vidi raucitatem, iam iam per menses toleratam, neque aliis medicamentis obedientem, unico emetico funditus & subito profligatam. Vomuit autem vir 40 annorum, qui emeticum proprio suasu, longitudinis morbi impatiens, sumserat, & extrema, quæcunque etiam ceciderit alea; tentare statuens, multa bile remixtam materiam.

DE SINGULTU BILIOSO.

Frequenter sane in febribus biliosis singultus casus occurrit, qui etiam interdum cum inflammâtionē hepatis coniunctus procedens haud leviter terreat diæti *Hippocratici* ** non immemorem: *ab hepatis inflammatione singultus, malum.*

Alia

* Plutarch. de Liber. educat. Cap. VIII.

** Aphorism. VII. 17.



Alia autem est illa singultus species, quæ, post fugatam febrem biliosam, homines diu exercere solet. Peccant autem tunc temporis reliquæ faburæ biliosæ, circa bilis vesicam nidulantes, atque inflammationem hepatis simulantes.

Haud procul ab hoc posteriori casu distat singultus anomalus, hoc tantum interposito discrimine, quod causa latere, nec febris adesse soleat.

Oris tamen ficcitas, fitis, sapor amarus, sensus incommodus circa ventriculum, nec non ventris obstructio satis de morbi indole testabantur.

In methodo medendi talia ergo erant adhibenda, quæ bili movendæ apta, supra enarravi.

Nunquam hoc malum vidi molestius, quam in femina, octo mensium gravida, quæ id incommodum duodecim dies ita est experta, ut morbus neque noctes, neque dies liberos præstaret.

Nulla autem fuit alia medicamenta, quam ex classe salinorum; acidorum; atque dein decocta Tamarindorum potui illi sunt data, quibus non solum ab hoc gravi malo feliciter est liberata, sed iusto etiam tempore puellam est enixa.





DE SALIVATIONE EX CAUSA BILIOSA.

Salivationis spontaneæ varias causas, eius in morbis salubritatem, noxios effectus atque medelam in singulari Dissertatione de *Salivatione spontanea* descripserunt Ill. *Funkerus* atque Cl. *Hecker*. * Excitati in hac dissertatione exstant varii clari viri, qui sponte salivam in variis ægitudinibus viderunt fluentem. Sic, ut variolas, febres quasdam intermittentes, atque malum hypochondriacum taceam, in scorbuto illam vidit apud Ill. *Hallerum* ** *Ronseus*; in febre lenta nervosa *Huxhamus*; *** in constitutione verminosa *van den Bosch*. Neque dubitat Ill. *Hallerus*, obstructiones glandularum atque hepatis hac via posse eliminari, præsentem simul febre intermittente, saluberrimo subinde multorum morborum averruncio.

Sed hæc per transennam! ad descriptionem salivationis, propter præsentiam materiæ biliosæ enatae, me nunc verto, de qua apud auctores nondum satis constat, an pro effectu salutari, vel noxio habenda. Occurrit autem iste casus in febribus biliosis vario modo. Adest enim vel in principio morbi, quod magnæ cruditatis indicium est; vel sub finem accedit, salutariter partem materiæ morbo demens.

Ab his diversa est salivatio biliosa anomala, quæ longe profusior est, & corpus fluidis exhaurit,

K

nec

* Halæ 1768.

** *Elementa Physiologiæ* Tom. VI. p. 58.

*** *Opera phys. med.* II. p. 89.

nec tamen causam morbi imminuit. Minime ergo ista evacuatio critica, vel salutaris est dicenda. Dicta sequens casus confirmat.

CASUS.

Vir 60 annorum, nullam suæ valetudinis curam gerens, atque simul herniosus, eo tempore, cum plures in vicinitate febre biliosa, laborarent, primo colica biliosa atque ingentibus vomitibus est vexatus. Primo iniectus est clyster; dein solita medicamenta anticolica ei sunt propinata. Cum autem vomitus non cessaret, atque herniæ causa hoc non fieri constaret: datum ei est emeticum, quod multa biliosa eduxit, atque sic quievit dolor. Cætera autem medicamenta neglexit æger. Post aliquot dies accedebant salivæ continuæ sputationes. Cum linguam tenacissimo muco obduc-tam viderem: dedi digestiva. Vix inceperat his uti, cum saliva parciior flueret. Suasi hinc, vellet ita pergere. Sed recusabat. Rediit hinc non solum molesta salivatio; sed appetitus etiam quotidie imminuebatur. Ægrotus id videns, denuo in digestivis atque rheo custodiam quærere incepit: neque spe est deiectus, fluxu salivæ iterum cessante. Mox vero cum ad pristinam securitatem rediret, morbus recurrebat, a quo nulla arte potuit liberari. Nam ægrotus tantam fluidorum depauperationem (nam sputa quotidiana adscendebant ad libram dimidiam) sine insigni virium iactura haud diu perferre potuit; & tabefactus tandem, accedente tussi, malo succubuit, a quo potuisset liberari, dummodo consiliis locum dedisset.

Hule



Huic quodammodo similem casum describit *Galenus*: * *Quidam humorem repente expuit li-
quidæ bili in colore perquam similem, medium
videlicet inter flavum ac pallidum, (in descripto
casu humor erat pallidus) at nulla acredine in-
fectum, atque ita quotidie maiorem eius quan-
tatem expuit, dein levi suborta febricula ta-
bescere incipit. Prosper Alpinus, ** qui hunc
hunc locum excitat, addit: vidi alium eodem mo-
do sex mensibus, ac alium quoque diutius labo-
rantem, igitur, qui primus nobis occurrit, ini-
tio quidem nihil mali habere, sed tandem pessime
affici visus est.*

DE STUPORE PARALYTICO UNIUS PEDIS EX CAUSA BILIOSA.

Quanta mala ex præcordiis oriantur, quin &
apoplexiam inde sæpius enatam esse, singulari di-
ligentia atque eximia eruditione demonstraverunt
Ill. *Schræderus* & Cl. *Koch*. *** Idem argumentum
iam diu antea pertractavit immortalis *Boerhaa-
vius*, **** quod etiam exemplis confirmavit *Perill.
van Swieten*. *****

K 2

Ma-

* Galen. in Libr. 4. de locis affect.

** Prosper Alpinus de præfagienda vita & morte
p. 520.

*** In Dissertat. de Apoplexiæ ex præcordiorum
vitlis origine. Götting. 1767.

**** Consultat. med. p. 65.

***** Commentar. Tom. III. p. 264.



Materiam atrabilariam autem in specie identidem in hanc causam abire, exemplo *Marcelli Malpighii* a *Baglivio* * scriptis traditum est.

Quæ cum ita sint comparata, cum nec nervorum origines in encephalo satis tutam, contra bilis rabiem, habeant custodiam: quis mirabitur, a capite remotiores partes, & nervos ex inferiore ventre oriundos, ab hac labe non prorsus immunes persistere?

Hoc, quod dixi, singulari casu comprobabo, quem in matrona 60 annorum & antea sana, 1778 observavi.

Integra & utroque pede satis libere utens, quondam hæc femina domum reliquit, & ad fontem salentem, iuxta domum situm, aquam vitro hauriendi causa, accessit. Flectit dein genu, atque sic vitrum aqua repletur. Vult assurgere, sed ecce! non potest. Acclamat hinc perterrefacta, prætereuntes vellent sibi auxilio currere, & in domum ferre. Qui dicto obedientes, erigunt illam pede uno insistere non valentem; hinc sellæ impositam, domum portant. Primo sensit in hac parte vehementem dolorem, qui post venæsectionem, atque applicationem fomentationum calidarum, nec non post infusum Florum Sambuci, quod calide hausit, cito satis disparuit, remanente immobilitate in hac parte cum stupore coniuncta. Paulo post integrum

* Bagliv. Opera p. 681.


grum. crus atque femur tumescere atque frigescere inceperunt. In hoc statu primo accersebatur Chirurgus, qui varia, sed sine ullo levamine, tentavit. Cum ego vocarer, neque absconditam bilem statim subolerem: propinandas feminæ dedi varias Mixturas nervinas; nec non infusum Florum Arnicæ ad ductum Cel. *Collin*; externe autem epispasticis cutis exulcerabatur. Sed hæc omnia erant irrita. Omnibus ergo vestigiis causam morbi latentem accuratius indagare incepti. Mulieris anxietatem autem; eius inquietudinem; sitim; linguam impuram; tensionem ventriculi; obstructionemque ventris; & multa alia ad æquam animi lancem perpendens, atque audiens iam plures in hac domo febrem biliosa antea iam fuisse correptos, & unum hoc morbo adhuc decumbere, similem causam, bilem nempe, etiam hic accusare non dubitavi. Mutatam hinc statim inivi methodum medendi, & victus rationem morbis biliosis accommodavi. Interdixi nempe lactis atque carnis usum, quibus ægra valdopere delectabatur. Propinata autem sunt resolventia, atque digestiva salina acidæ indolis; dein per quatuordecim dies utebatur medicamentis eccoproticis, iunctis sub finem roborantibus, quibus ingens quantitas materiæ biliosæ educebatur. Vix ab hac acrimonia liberata fuit ægra: cum vires parti debilitatæ, panno quotidie fricandæ, & sensus motusque redirent, remanente adhuc per aliquod tempus debilitate totius corporis, quæ etiam corticis Chinæ usu postea est emendata, ita ut in præsentiarum satis laudabili sanitate fruatur.



DE ANXIETATIBUS ANOMALIS. BILIOSIS.

Non dubito fore plerosque, qui hoc loco de anxietatibus præcordiorum seorsim me differuisse videntes, id superfluum, nec ordini fatis convenienter factum censebunt, putantes, hac de re satis superque in parte huius operis priori esse relatum. Nec his, qui ita sentiunt, nihil, præterquam quod natura polymorpha ita facere iusserit, regere possum. Nam cum illa in producendis morbis admodum multifaria sit, neque iisdem legibus semper adstringi amet: multifariam etiam desiderat descriptionem. Hoc multis quidem in locis huius tractationis est demonstratum; sed præsentī morbo magis adhuc comprobabitur. Videlicet durante eo tempore, quo febris biliosa popularis erat, sæpenumero, citra febrem, ex mera collectione materiæ putridæ biliosæ circa præcordia hærentis, tantas anxietatum turbas, & inexplicabiles animæ inquietudines enatas vidi, ut mortem ægrotantes, optime cæteroquin valentes, & muniis suis subeundis apti, vitæ præferre non dubitarent. Ab eiusmodi anxietatibus dilaceratus, & mentis quodam errore simul impulsus, guttur sibi præscindere tentaverat rusticus quinquagenarius, qui dein per sylvas atque per montes sanguine conspurcatus vagabatur, & quemvis hominum adspectum fugiebat. Tandem magis dolo, quam vi propinquorum coercitus, curæ meæ est commissus, qui nil, detecta in eo hac materia biliosa, præter Mixturas salinas consuetas, quibus pauca grana tartari emetici admixta

mixta



mixta erant, opus habuit. In reliquis casibus initius malum fuit, præsertim si sibi a cibis crudis, infantibus, potu calido, atque vehementibus animi commotionibus temperarent ægrotantes. Præcipua incommoda erant hypochondria inflata, tummentia: vidi etiam totum ventrem, non secus ac in tympaniticis fit, tumidum ac durum; in nonnullis vesicam, in aliis alvum exonerandi sentiebantur molestiæ, & hi spiritum non nisi superne eructabant.

Insignis erat ad iram proclivitas, quin & in aliis magna tristitia. Somnus nullus, vel saltem admodum turbatus.

Quod ad pulsum vero attinet: admodum varius, durante paroxismo, existit; magnus erat in his, in aliis summe debilis. Venæsectio hinc erat res altioris indaginis, dubiique eventus. Neque congestiones sociæ (échauffements) ita poterant curari. Hoc sibi proprium vindicat malum, quod robustissimum hominum genus infestet, & sæpe per aliquod tempus sine noxa possit tolerari. Quod si vero morbus a materia putrida oriatur: ancipitis eventus est, & dicimus cum *Prosp. Alpino* * *omnem inquietationem perpetuo malam esse; verum, quæ vitio stomachi fiunt, hæc quidem etsi malæ sint, tamen nunquam per se solæ quicquam certi significant, de morte ac vita ægrotantium præsagienda.* Quando autem huic malo diu tolerato facies emaciata, atque mala respiratio, quod in

* De Præ sag. vit. & morte p. 168.



Iudæo semel observavi, accedunt: tunc motus ostia pulsant propter internam putredinem.

Transit cæteroquin morbus non curatus vel in ipsam febrem biliosam; vel in maniam; vel in tympanitidem; vel denique in hydropem. In iuvene quodam erat morbus vere migratorius; Anxietates exceperit febris biliosa, quam Mania secuta est, quæ tandem post aliquot septimanas, superveniente surditate, est curata. Quod restat, anxietatum causam materiale subinde circa præcordia hædere, iam dudum artis medicæ doctores egregie docuisse, vel me tacente, cuivis notum erit; neque ulteriorem iste locus desiderat demonstrationem. Requiritur tantum, ut evincatur, in his casibus materiam biliosam febrilem peccasse. Quod, cum a longa disputatione abhorream, sequenti adhuc comprobabo casu.

CASUS.

Anno 1778, mense aprili convenit mecum vir 52 annorum, robustus, antea semper sanus, de summis anxietatibus præcordiorum, nec non de levi quadam tussi conquerens. Cum ante mortem uxoris, quæ reliquiis febris biliosæ erat extincta, & cujus discessum ægre admodum ferebat, talia nunquam antea senserat: incipientis ulceris pulmonalis metus illum prehenderat. Huic morbo variis medicamentis, quin & venæsectione, incassum obviam iverat; & nunc, cum illum viderem, in eo erat, alteram venam tundere.



In signa ulceris antecedentia atque præsentia autem inquirens, nec talia inveniens, (nam non antecesserant inflammatio, horror, motus febriles &c.) longe aliam anxietatum causam subolere incipi, atque timui, ne saburra biliosa marem quoque irritaret, quæ feminam paulo ante iugulaverat. Convictus dein hac de re sum redditus, cum illum de diuturna alvi obstructione, atque de conatu ad vomendum conquerentem audirem. Statim illi, vellet alteram venæsectionem omittere, sed potius emetico, quod præscripseram, uti, autor suasor-que fui. Adnuebat patiens quidem, medicamentum sumere: sed, propter timorem latentis ulceris, hausit tantum medicaminis partem dimidiam, quæ illi vix nauseam creabat. Jussi hinc sequenti die, cum illum viderem, metumque discuterem, integram portionem sumere. Pollicebatur etiam, se consilio pariturum. Sed quid evenit? Circa noctem, quæ diei medicinali antecedebat, evigilat, sentit se admodum nauseosum, vomitque vicibus repetitis, cum ingenti reiectione materiæ biliosæ. Sequenti mane, post quietam noctem, se allevatum sentiens, prodiit ferme sanus. Longe huic infomnia fuerunt feliciora, quam quæ *Publio Cornelio Rufo* acciderunt, qui, referente *Plinio* * *dormiens oculorum amisit visum, cum id sibi accidere somniaret.* Neque hunc ex hoste vulneratum pectus a vomica liberaffet, quam sibi finge-
bat tantum, in quo tamen *Pheræus Jason* deploratus a medicis, propter vomicam, subito invenit medicinam.

Erat

* Vid. Plin. Hist. nat. L. VII. Cap. 50.

Erat autem in hoc casu, ut cum *Tiffoto* * lo-
 quar, *materia supra evacuationem cocta*; in aliis
 casibus *infra evacuationem* cruditas peccabat.

DE HÆMORRHAGIIS EX CAUSA BILIOSA.

III. *Schræderus* in *Academia Georgiana*, dum
 viveret, Professor medicinæ meritissimus & Ar-
 chiater regius, auditores suos, referente Cel. *Mar-
 cardo*, ** sæpe sæpius monuit: sese per experien-
 tiam persuasum habere, plurimarum hæmorrhagia-
 rum causam, nisi ex aliqua stasi in visceribus hypo-
 chondriacis, quæ spasticas efficiat contractiones, in
 colluvie biliosa primarum viarum latere; nec, ubi
 hæc abundaverit manifeste, præsertim in febre, du-
 bitandum vix unquam esse, quin accedentis forte
 fluxus sanguinei symptomati culpa, magna ex
 parte vel unice in illa colluvie resideat. Confir-
 mavit hoc assertum doctissimus Dissertationis auctor,
 exemplo mulieris, febre biliosa decumbentis, &
 uteri hæmorrhagia, quamvis iam in ea esset æta-
 te, ubi natura hoc tributum solvere iam iam de-
 fierat, tentatæ. Huius asserti, experto medico
 digni, rectitudinem, epidemia Tecklenburgensis
 identidem novis exemplis confirmavit. Durante
 enim hac nostra constitutione epidemica, veteres
 morbi hæmorrhagici recruderunt; ex aliis causis
 enati

* L. c. p. 28.

** Vid. Dissert. examin. rigor. malign. febr. Göt-
 ting. 1770.

enati sunt aucti; & novi ex hoc fonte sunt enati. Menfes præcipue id malum maxime experti sunt, qui mox erant suppressi, mox aucti, mox anticipantes. Vix omittenda annotatio, quod sub mensibus profusis sæpe sæpius febrem simul viderim accensam. De vomitu cruento, nec non de hæmorrhagiis narium symptomaticis dixi iam supra. Proximum est, de hæmorrhagiis anomalis sermonem facere. Loquar autem tantum de casibus infuetis, ut de hæmoptysi, mictu cruento, atque hæmorrhoidibus. Ne autem quis iudicet, me alios casus non vidisse: provoco ad ingentem hæmorrhagiam uteri, ad quam levandam circa mediam noctem sum vocatus. Nulla febris iuncta erat, nec alia causa quam biliosæ indolis potuit detegi. Subacta hinc ea materia, cum sanitate mulier in gratiam rediit.

DE HÆMOPTYSI EX CAUSA BILIOSA.

Hæmoptysis biliosa iracundum genus hominum maxime sibi vindicat.

Inter plures, qui hoc morbo decubuerunt, maxime ægrotavit femina ex gente iudaica oriunda, cuius historiam morbi, quia quædam attentione digna, nec ubivis obvia continet, paucis depictam cum lectoribus communicabo.

Hæc femina, 32 annos nata, ad iram admodum proclivis, atque 6 infantum mater, artem medicam, antequam hæmoptysi tentaretur, ex me petiit. Laborabat



borabat autem ea tunc temporis tussi sicca atque ingenti pectoris oppressione, quæ ex male curata pleuropneumonia notha remanserant. Hæc videns, & de materiæ biliosæ fomite nil sciens, vomicæ cuidam latenti unice medicinam faciendam esse putavi. Præscripsi hinc species emollientes atque pectorales Theiforma hauriendas. Sed ventriculus hæc recusabat, atque vomitu reiciebat; neque quodammodo mutata medicamenta, propter augmentum anxietatum, perferri potuerunt. Quid quod! paulo post subortus est vomitus materiæ purulentæ, sanguine remixtæ. Ex hoc tempore ægra quotidie sanguinem tussi in magna quantitate rejicere incepit. Varia temperantia contra dirum hunc morbum me absque effectu bono hactenus tentasse, & ægrotantis statum de die in diem in peius ruere videns, historiam morbi chartæ mandatam ad doctissimum *Fein*, medicum *Osnabrugensem* insignem, qui mihi pro sua humanitate, qua pollet eximia, sæpius a consiliis saluberrimis fuit, transmitti curavi, qui mixturam temperantem præscripsit, cui nitrum in ea quantitate erat additum, ut & alvum movere posset. Quamvis his per aliquot dies leniretur malum: recrūduit tamen non solum dein, sed hæmoptysis etiam vehementior est facta, quæ autem mox spiritu vitrioli atque syrupo Diacodii in aqua diluta sumtis, & a modo dicto medico laudatis, adeo est coercita, ut mox tempora quædam quieta morbus præstaret. Cum autem per vires recurreret: altius illum radicum esse censui. Nec sane diu, neque in diffitis partibus quærenda fuit causa morbi continens, materia biliosa ubivis
in

in domo obvia non loquente, sed clamante. Nam vix aliquot septimanas laboraverat mater: cum quatuor eius infantes febre biliosa itidem corriperentur. In ipsa femina autem varia huius colluviei exstabant indicia. Linguam habebat nigerrimam, muco tenacissimo ne instrumento quidem cedenti, obductam; conatus vomendi continuos; & reiectæ materiæ bilis viridis erat admixta; alvus, quamvis frequentibus clysteribus, nec non tinctura Rhei sollicitata, nunquam recte respondebat; & multa alia. Hæc nunc videns, Mixturam Tamarindorum cum nitro atque sale mirabili Glauberi præparatam hausui illi dedi. Quibus per aliquot dies sumtis, venter quidem mollescere incepit; sed de pelle nigra, linguæ adhærente, nihil plane secessit, nec sanguinis reiectio quievit, certo indicio, tenacissimam & a salibus vix ac ne vix quidem resolubilem materiam biliosam pituitariam in primis viis dominio uti. Cogitare hinc incepti de calomellis usu egregio. Antequam autem hoc medicamentum propinarem, tentavi adhuc alia atque alia, sed frustra.

Sumsit ergo primo mane pulverem ex Calomellis gr. II. Nitri depur. atque Rhei aa. gr. XV. constantem; sumta dein reliquo tempore diei mixtura temperante. Cum nil incommodi feminæ inde oriri viderem: admonui, vellet ita sequentibus diebus pergere. Vix aliquot dies erant elapsi: cum quietiorem feminam viderem, quæ mihi etiam dixit, sputa sanguine haud amplius fuisse mixta, & se per ventrem tenacia quædam atque pessimi odoris egressisse; quod ad linguam attinet, pellis decre-
crescere



crescere videbatur. Suasi hinc diutius his medicamentis uti. Quæ ita per quatuordecim dies adhuc pergens, ab ingenti quantitate materiæ biliosæ, cum reditu virium atque bonæ carnis, est liberata, lingua interim reddita pura, nec hæmoptysi amplius molestante. Quid quod! post aliquot septimanas redierunt menses, antea suppressi. Sed cum inflata pulmonibus vulnera singularem adhuc expostularent medelam, quam hæc femina propter varias domesticas occupationes, atque propter morbum infantum neglexit: fieri certo aliter non potuit, quam ut metus renascituri mali suboriretur. Attamen semel tantum suæ negligentiae luit poenam.

Recte ad historiam morbi & ad præcedentia attendens, non dubitabit primum morbum inflammatorium Pleuropneumoniam anomalam biliosam nominare; unde reliqua in historia morbi suppeditata possunt explicari.

DE MICTU CRUENTO EX CAUSA BILIOSA.

Huius morbi causa 1777 consilium medicum ex me petiit vir 58 annorum, temperamentum cholericum, qui in antecedentibus annis frequenter laboraverat erysipellate, a quo tamen iam ante quinquennium per feri lactis usum erat liberatus.

Morbi præsentis natura autem talis erat. Primis morbi diebus vix alia incommoda ægrotus sensit, quam

quam quæ ex mala digestionem oriri solent. Interdum hinc satis bene valebat, sed noctes erant admodum inquietæ, habebatque tunc temporis continuum nifum ad matulam. Postea vero, cum non sine molestia atque dolore redderetur urina: percepit sanguinem illi esse admixtum. Vocatus ego, cum pulsus iusto frequentiore sentirem, sitimque naturali maiorem viderem, malum ex meris congestionibus ortum credidi; quibus, temperantibus, & præcipue spiritu vitrioli ex aqua sumto, mederi æstimabam. Sed isti malo hætenus adhibita remedia haud paria esse, ex augmento morbi non solum patebat, sed etiam ex motibus febrilibus auctis. Habebat insuper linguam impuram, biliosam; saporem amarum, nauseosum; frequentes ructus; varia circa ventriculum incommoda; alvum obstructam; & multa alia. Quæ nunc videns, non potui non bilem non solum accusare, sed metus etiam est subortus, ne febris biliosa accenderetur. Propinandos hinc illi dedi pulveres salinos, incidentes atque temperantes; & victus rationem dein ita institui, uti febre biliosa decumbentibus fieri debet. Quibus per 48 horas adhibitis, statim sanguinis fluxus quievit. Pergebat tamen ægrotus adhuc per aliquot dies hoc remedii genere uti, qui dein, haustis laxantibus, ingentem quantitatem saburræ biliosæ per alvum reddidit, & hætenus optima sanitate fruitur.

Anno præcedente 1779 medicinam feci murario cuidam hæmorrhoidario, cui iste fluxus sanguinis in mictum cruentum non alia ex causa est mutatus, quam



quam propter præsentiam istius materiæ, quam toties nominavi. Eadem aderant incommoda, quæ in præcedenti casu sunt commemorata; quin & iisdem remediis est restitutus.

Tertius denique ægrotus neglexerat mictum cruentum ex eodem fonte enatum. Incidit hinc in phthisin atque tabem corporis; tandem, superveniente profusa hæmoptysi, subito e vivis est sublatus. Ultimis suæ vitæ mensibus meum efflagitavit consilium; sed nimis sero. Fomitum biliosum adhucdum præsentem multifaria, ex lingua & reliquis desumenda indicia, satis superque demonstrabant.

DE HÆMORRHOIDIBUS EX CAUSA BILIOSA.

Restat, ut de hæmorrhoidibus loquar. Variis incommodis, ex bile oriundis, iam anno 1777 tentatus fuerat vir quidam 31 annos natus, vitæ mobili deditus, & vitam sobriam agens, a quibus autem & medicamentis & conveniente vitæ regimine est liberatus, reliquo tempore valetudinem suam notitia sui corporis atque observatione sustentans. Sequenti anno renascens malum quidem sentiebat, sed propter occupationes publicas, & quia multum temporis in itinere consumebat, mature morbo obviam ire impediabatur. Primum ergo, quod illum vexabat, erat tussis biliosa, cui varia incommoda circa ventriculum adiungebantur; dein apparebant hæmorrhoides tumentes atque dolentes. Utebatur pulve-


pulveribus ex Cremore tartari atque floribus sulphuris præparatis ; & tumores aliquoties, quia tempestas non permittebat hirudines colligere, lanceola aperiebantur. Quamvis ita egregie allevarentur æger: tumores tamen semper subito renascebantur, qui dictam operationem denuo postulabant. Hæc videns, de evacuanda materia biliosa serio cogitare cœpi. Mixturam itaque digestivam atque laxantem parari iussi, alternis horis cochleatim fumendam. Materię peccantis autem tanta erat visciditas, ut aliquot libras huius medicaminis opus haberet æger, antequam ab omni materia liberaretur; ipso autem liberato, tumores hæmorrhoidarii evanidi sunt redditi, nec unquam postea redierunt.

DE OBSTRUCTIONE URINÆ EX CAUSA BILIOSA.

Singularem etiam obstructionis urinæ casus desiderat expositionem, hic non omittendam.

Duplici autem modo illam ortam vidi. Prima est ea, quæ fit, quando materia biliosa mucosa, metastatice ad vesicam urinariam delata, stagnando tantam visciditatem acquirit, ut per urethram ferri non possit, quin etiam hanc aperturam claudat. Alter casus autem oritur, quando viscida inquinamenta biliosa intestinum rectum adeo distendunt, ut dilatatum urethram comprimant.

Dicta exemplis confirmabo.



CASUS I.

Vir circiter 88 annorum, non obstante hac vetustate, satis laudabili sanitate fruens, subito inter concionem sensum quendam incommodum circa regionem pubis percepit; quem, si urinam reddidisset, cessaturum sperabat. Concione finita, quam cito potest, vesicam levandi copiam frustra quærit. Nam guttatim urina tantum emittitur, dolorem non levans. Domum redux, regionem pubis pelle quadam (nam fuit venator) tegit calide. Sequenti die nondum restitutus, misit filium me consulturum, cui medicamenta quædam antispastica, & in- & externe adhibenda, cum admonitione dedi, ut clystere venter apertus servaretur. Sed cum hæc frustra hætenus essent adhibita: vocabar die morbi quarto. Lingua erat mucosa, biliosa; fitis ingens; motus febriles aperti; genæ coloratæ; uber sudor, superiores partes tegens; venter inflatus, quodammodo durus, pressus tamen haud magnum dolorem excitans; alvus obstructa; atque conatus ad vomendum; urina ferme plane suppressa. Propter metum internæ inflammationis clyster emolliens, qui excrementa quædam dura eduxit, est positus; & venter, post applicationem catheteris, fomentis calidis tectus, cum interim mixtura temperante uteretur æger. Quamvis inde quodammodo levaretur: catheter tamen quovis die debuit repeti, qui facili negotio applicabatur. Die decimo autem ad me venit Chirurgus, consilium ex me quærens, quid in præsentiarum faciendum, cum frustra catheterem applicasset. Una nunc cum
Chi.



Chirurgus ægrotantem accedo, atque miror, instrumentum facili negotio posse applicari, sed nullam urinam sequi. Mutamus hinc instrumentum: nec meliori eventu id facimus. Circa vesperam iterum tentamus operationem, sed absque effectu bono. Abeuntes, nos sequenti mane redituros, pollicemur. Redeuntes ægrotum adeo debilem invenimus, ut moribundo ferme similis esset. Instrumento hinc illi auxilio currere tentavimus quidem, sed irritum opus egimus.

Dolentes nunc casum senis, mortis rapinam sese iam iam æstimantis, reliquimus miserum Deo committentes; nec æstimantes, in tam debili corpore, istam operationem, quæ a *Flurandio* nomen habet, & quæ a Celi *Schmuckero* * laudibus est elata, applicari hic posse.

Sed quid accidit? Circa vesperam sentit ægrotus ingentem mingendi conatum, & gaudet guttulas quasdam ex urethra profluentes videre. Comprimit hinc ventrem, & feliciter sic liberatur ab ingenti quantitate materiæ viscosissimæ, albumini ovi similis.

Hac materia liberatus æger, statim convalescere incepit, pervenitque ad id tempus, quod medicinæ locum præstat. Sumtis enim laxantibus, quæ

L 2

Multa

* *Schmuckers chirurgische Wahrnehmungen. Theil II. p. 469.*



multa biliosa eduxerunt, ad pristinam sanitatem rediit senex, cui

*Nunc opus est succis; per quos renovata senectus,
In florem redeant, primosque recolligat annos.**

CASUS II.

Alter ischuriæ casus sequenti sese habet modo.

Anno 1777 vocabar ad mulierem gravidam habitam, & per nonnullos dies obstructione urinæ laborantem. Accedens inveni Chirurgum, ex quo percepi, obstetricem ante horam advocatam censere, decumbentem hanc haud diu a partus tempore abesse, & a capite prævio urinæ fluxum impidiri. Percontanti, quænam auxilia essent adhibita, responsum tulit Chirurgus: se per clysteres repetitos atque acres, urinæ viam aliquoties aperire frustra tentasse, quia medicamenta, subter in alvum missa, statim regurgitarint; In præsentiarum autem emollientia in forma cataplasmatum ventri esse imposita. Ex decumbente ipsa autem, cuius ventrem æqualiter tumidum & in inferiore parte dolentem inveni, dein audiui, se iam per aliquot retro septimanas varia incommoda circa ventriculum observasse, & alvum nunquam recte respondisse, quin in hac integra septimana bis illam tantum exonerasse. Linguam habebat impuram; biliosam; sitim ingentem; nec non apertos quosdam motus febriles.

omif.

* Ovid. Metamorph.



Antequam uteri statum gravidum explorarem: vesicam ab urina admodum distentam, liberandam esse putavi, quia istud a Chirurgo hætenus erat omissum. Dein post educationem magnæ quantitatis urinæ fœtentis, digitos, uterum explorandi causa, vaginæ immisi. Animadverti autem statim in cavitate pelvis media corpus quoddam durum, capiti infantis non absimile, omnemque hanc cavitatem ita implens, vel partes ita committens, ut ne digiti ungui quidem via pateret, istuc hærere. Cum autem uteri orificium nullibi inveniretur: haud diu hæsitavi, illis pensitatis, quæ ex ægra audieram, hunc tumorem pro distensione intestini recti habere, ex induratis orta inquinamentis biliosis, hic stagnantibus, & urethram comprimentibus.

Propinandam nunc illi dedi, quia clysterum atque aliorum instrumentorum usus nullum hic inveniebat locum, mixturam temperantem, cui in magna quantitate addita erant sal mirabile Glauberi, nec non egregium istud resolvens sal ammoniacum. Quibus per aliquot horas sumtis, egesta est ingens quantitas materiæ biliosæ, teterrime fœtentis; disparentibus dein tumore ventris, & suspicione graviditatis.

Huic quodammodo similem casum describit *Schenkius*. *

DE

* Lib. III. p. 399.



DE MORBIS MENTIS, ET QUIDEM DE MOROSITATE EX CAUSA BILIOSA.

Ingentem miseriarum numerum descripsi, quas materia biliosa tanquam ex pyxide Pandoræ in corpus humanum effundit; proximum nunc est, ut de functionibus animalibus læsis sermo fiat. Nulla autem est animæ facultas, quam non, durante febre, vel post febrem male curatam, inde viderim alteratam, auctam, quin & imminutam, uti iam supra nonnullis locis annotavi. Immo omnes fere libri medici sunt adeo repleti talibus observationibus, ut non opus sit, exempla adferre. Nam si consulantur Auctores, scribentes de morbis acutis, male sanatis; statim patebit, quod uni ægro hoc, alteri illud genus delirii ex morbo remanserit, licet in cæteris recte sapiant.

Sed exempla etiam sunt, historica fide comprobata, quod homines propter præsentiam materiæ biliosæ, citra febrem, identidem deliraverint, uti hoc evenit *Fernelio*, insigni Gallorum & medico & philosopho. Sed quid multis opus, cum iam diu antea ab *Aretæo* sit observatum: *si melancholia in præcordiis residet, causam circa septum transversum immorari, & bilem vel supra vel infra prorumpere.* * Dixit hinc *Boerhaavius*: *lædit bilis atra organum sentiens, imaginans, & impetum faciens ut penitus invertatur.* **

Operæ

* *Aretæus Capp. Lib. I. Cap. V.*

** *Boerhaav. de morb. nerv. p. 438.*

Operæ hinc vix erit pretium, toties observatis novum exemplum addere, nisi forsan unicum singularis morositatis, quam in homine 42 annorum, tum temporis observavi, cum eius uxor febre biliosa, cui medicinam faciebam, graviter decumberet.

Non quidem ab hominibus, ut verbis *Aretæ Capp.* * utar, fugiens, de inanibus conquerens, vitæ maledicens, mortem expetens, stupore fatuitateque captus, omnium ignarus, sui quemet immemor in morem bestiarum ferme vitam agebat. Sed exiit illi animi tenor in rigorem torvitatemque duram & inflexibilem, quæ quoscunque adfectus humanos adimit, & in totius generis humani odium evehitur. Pulsus erat tardus, debilisque; lingua impura; venter quoad tactum durus; alvus obstructa. Quævis oblata primis temporibus spernebat; fumsit tamen dein pilulas eccoproticas, atque pauca alia. Tandem inferius descendebat bilis, atque convaluit.

Sed hæc hætenus! Plures morbos biliosos anomalos non febriles utique recensere possem, sed nolo limites propositos transvagari, quamvis metus me teneat, ne istud *Ippalli Pythagorici Philosophi: nondum nihil fecisti; nam nondum tibi potest invideri*, acclametur. Hinc nomina tantum morborum indicabo, in quibus simile fermentum biliosum peccavit.

Est

* Vid. l. c. p. 65.



Est autem primo tabes quædam corporis, quæ in hominibus oritur, ad hunc morbum dispositis, ex diu tolerata materia biliosa mucosa. Juvant in hoc morbo gummata ferulacea, præcipue gummi ammoniacum; sulphur antimonii auratum liquidum; Elixirium vitrioli &c.

Scorbutum in leviori gradu inde etiam videri enatum: quod nemo mirabitur, qui supra laudatam Dissertationem Cl. *Dinckgreve*, in qua similitudo scorbuti & febris putridæ evincitur, quæque Theorizæ morborum biliosorum anomalorum haud contemnendum argumentum addit, aliqua attentione legerit.

Congestionibus, quas échauffemens nuncupant, vix aliter quam per éductionem materiæ biliosæ, & per roborantia, potui mederi.

Saburram biliosam identidem menses suppressere, graviditatemque simulare, dictum iam supra est. Vidi puellam, criminis furtivæ graviditatis accusatam, per supervenientem diarrhœam biliosam, ab hac suspitione liberatam. Sed quis omnes morbos enarrabit, qui ex sordibus oriuntur extra vasa circulationis depositis, ibique ob inertiam solidorum congestis, spontaneæ putrescentibus, & putrescendo omnia laxantibus, flatusque generantibus, qui, laxis iam iam fibris non coerciti, eas ultra tonum distendunt, vicina obstruunt, comprimunt, lacerant? *Inde languent*, inquit Cel. *Tissot*, *gastroici systematis functiones; imperfecta remanet digestio,*

*digestio, imperfecta ergo & nutritio; nec eadem inde sanguinis quantitas conficitur, nec idem ille elaboratus sanguis.**

DE PROPHYLAXI.

Morborum biliosorum omnium, quæ nosci potuerunt, naturæ generatim membratimque ita se habent.

Tractatui autem vix pretium esset habendum, nisi etiam diceretur, quibus auxiliis morbo venienti possit occurri: primo quia in contemplatione naturæ nihil quidquam videri potest superfluum; dein, quia nondum plane deferbuit malum, atque in venis nonnullorum adhucdum agitur venenum; tandem etiam, ut cuilibet licitum sit scire, quid salutis suæ maxime opus.

Sed timeo, multos literarum secreta callentes, relata iam fastidio damnassee; brevibus hinc tantum ad deliberandum proponam, quænam mihi ipsi, sæpius a materia biliosa inquinato, contra hunc morbum dedere securitatem, ut ita simul a crimine me possim liberare, quod medicis plerumque & præcipue a *Plinio* iniuste imputatum deprehendo, utpote qui eos *periculis alienis discere, & experimenta per mortem agere,*** modo tanto viro indigno accusat.

Multo-

* Vid. Tissot. l. c. p. 101.

** Plin. hist. nat. Lib. XXIX. Cap. VIII.



Multoties medicamenta specifica tentavi, sed persuasum nunc habeo, quodcunque etiam magnis laudibus celebretur remedium, nunquam satis tutum esse, nisi exquisita diæta simul adsit. Ex omnibus autem regulis diæteticis ad bilem efficacissima est, quæ patientiam atque temperantiam iubet. Patientia opus est, quia nunquam, nisi truncatam velimus habere medelam, statim cocta redditur materia, quæ tempore potius eget. Temperantiam autem ideo debemus adhibere, quia sine illa tantum semper morbo accedit, quantum per medicamenta illi adimitur.

Ista autem moderatio non solum versatur circa eas res, quæ ore hauriuntur, sed etiam circa multa alia. Aëre ergo, hunc morbum timens, puro debet uti; animi vehementes commotiones, & præcipue iram vitare; corpus semper ita movere, ne propter otium torpeat nimis, vel propter intensos labores vigescat supra modum; membra contra frigus atque aërem humidum bene quidem velare, sed tamen sedulo cavere, ne diffuant sudore. Præstat hinc omni aëri atque anni tempori adsuescere; & mox in agro esse, mox in urbe, sed sæpius ruri secundum monitum *Celsi*. Maxima cura autem alvi est habenda. Adstrictam solvimus Cremore tartari; sale Seignette, vel aliis: fusam vero coercemus Sale Ammoniaco, vel Rheo. Abstinemus autem a purgantibus. Quantitas cibi sumendi unice ex naturali appetitu determinanda; atque vitanda, quæ supra satietatem sumta lædunt; nec non ea, quæ sola luxuria excogitavit. Ali-

nus



aus cibus est, qui intus facile corrumpitur, iurulentus atque pinguis. Ferme omnis caro; lac; caseus; ova; placentarum genera; nec non oleosa atque dulcia cibus tunc debent subtrahi. E contrario insculas acidæ indolis, atque olera tenera, nec non multa alia, quæ supra laudavi, optime vertuntur in cibum. Aqua limpida potum optimum præstat; & vinum, quod *Stapbylus* docuisse fertur, aqua diluendum, vel saltem modice tantum adhibendum. Quod ad vinum adustum autem attinet; de eo valeat lex *Carthaginensis*, quæ vinum prohibet; minime vero *Cretensium*, aliorumque usus dissolutus probetur.


Quæ dum aguntur; lingua sæpe inspicienda, laudandaque ea, quæ ab impuritatibus munda est redita.

Durum quidem hoc videri posset illis, qui a prisca simplicitate, quam in germanis populis eximie laudat *Tacitus*, longissime deflexerunt, neque in cibus simplicibus, agrestibus pomis, recentibus feris, aut lacte concreto acquiescere consueverunt.

At negligentia poenam fert, & vincuntur homines malo; cum in abstinentia e contrario vera atque certa contra hunc morbum adsit securitas.

T A N T U M.

DUO.



DUORUM INFANTUM MORTIS CAUSA
PER ANATOMEN DETECTA.

Cel. *Schelhammerus* olim dixisse fertur: *quæ ad scientiam medicam parum vel nihil faciunt, soleo negligere, aut certe non magni æstimare.* Recte ita quidem magnus vir, nisi etiam, cuius criminis accusatur a Cel. *Timmermanno*, ad quoscunque lusus naturæ hoc assertum extendisset. Nam cum istis ita sæpe res est comparata, ut morbum identidem incurabilem reddant, cuius notitia tamen medico omnino necessaria erit, siquidem ex sententia immortalis *Boerhaavii* æque magnus medicus est, qui incurabilem morbum bene distinguit, ac qui sanabili medicinam facere callet. Fuerunt hinc omni tempore indefessi naturæ perscrutatores, qui etiam id diligentissime rimati sunt, quod longissime a naturali discedit. Provoco tantum ad *Schenkium* atque *Bonnetum*. In nostris temporibus autem ista mira naturæ optime pertractarunt Ill. *Timmermannus*, atque Cl. *Insfeldt* in Dissertatione de *Lusibus naturæ*. **

Sed cum tam parum ab his, quorum opera eum in finem evolvi, quam etiam a *Plinio*, qui tamen dixit: *concretis quosdam ossibus ac sine medullis vivere accepimus*,*** intestinorum tenuium atque crasso-

* Vid. Diff. de notandis circa naturæ in humana machinæ lusibus. Duisburg. 1750.

** Lugduni Batav. 1772.

*** Plin. Hist. natur. Lib. VII. Cap. XVIII.

crassorum defectus sit annotatus: operæ erit pretium, singularem illam intestinorum deformationem, cum vita infantum coævam, quam ante aliquot annos in defuncti infantis cadavere, per sectionem anatomicam detexi, hoc loco describere & oblivioni eripere.

Antequam autem ad descriptionem horum infantum me accingo, monendum habeo, quod utrique infantes ab una eademque matre, interpositis triennio atque tertio infante, qui adhuc vivit, sint enixi.

Vix primus infans sine 1774 lucem mundi aspexerat: cum statim, quamvis legitimo tempore erat natus, iusto debilior esse videbatur, quod autem magnæ quantitati aquarum muliebrium, in quibus submersus fuerat, tributum fuit.

Sed cum ista debilitas in sequentibus diebus magis adhuc crederet, atque infans omnia vomitu rejiceret, neque alvus per clysteres sollicitari potens esset: aliam latentem causam subolere incepimus. Tentavimus hinc varia, quæ continuum vomitum sedarent; vires reficerent; alvum apertam redderent. Sumimus mox lenia laxantia e. g. Electuarium de Manna; vel Syrupum de Cichorio cum rheo; mox Saponem venetum; mox antacida; mox etiam lenia opiata, iunctis suppositoriis atque clysteribus, nec non balneis; sed irrita erant omnia. Sugere impotens infans, atque vix ossibus hærens e vivis discessit die sexto, qui postero die terræ est commissus.

Alter



Alter infans paulo robustior, natus mense Decembri 1777, mammas secundo iam die arripere tentavit, multumque spei iniecit. Cum meconium autem non descenderet per alvum: statim illi datus est syrupus de Cichorio cum rheo, quem autem statim vomitu rejecit. Applicatum hinc illi est suppositorium; dein clyster ex lacte atque melle est iniectus, qui etiam aliquoties est repetitus; sed non alia, quam recto intestino immissa, redierunt. Solvebatur hinc pauxillum saponis veneti in sero lactis dulci, cui syrupus de Cichorio atque rheo addebatur, quod infanti per vices propinabatur. Sed hoc etiam usu erat destitutum. Nam ne ea quidem ventriculus retinebat, quæ sugendo acceperat. Vires hinc infanti, priori similimo, de die in diem decreverunt, qui nec ultimis diebus fugere valebat. Suboriebatur hinc metus priori similis fatalis eventus. Nec timor inanis erat, flammula vitæ die sexto extincta.

Ardebat nunc animus, tam absconditi morbi causam scire, quam nulla coniectura consequi poteram. Et sane ne Oedipus quidem talia cogitasset, quæ culter anatomicus post mortem detegebat.

Venter erat tumidus atque quodammodo, praesertim in regione ventriculi inflatus; reliquis partibus macilentis, flaccidis, atque sine carne.

Incisis integumentis abdominalibus atque peritonæo, statim protrudebatur intestini pars inflata, quam pro colo distento habebam; sed maiori plaga facta,

facta, revolutisque integumentis, ut situs viscerum posset inspicere, multo magis hoc, quod inflatum erat, prominebat; quin etiam solum tantam ventris cavitatem implebat. Nam, ea paulo elevata atque remota, nullibi inveniebam longum illam intestinorum canalem, multis gyris insignem. Statim hinc percepi, a more consueto hic naturam deflectere, & attentione opus esse. Attendens nunc ad id, quod distentum erat, non statim potui distinguere, an ventriculus vel colon transversum esset. Superabat autem paulo longitudinem ventriculi, & in diametro æquabat vesicam suillam aëre distentam. Hanc partem diutius dein adspiciens, detexi chordam quandam albam linearis crassitiei atque latitudinis, quæ isti modo descriptæ parti in ea directione atque situ erat adnexa, quam omentum maius in relatione ventriculi habere solet. Putabam hinc in principio vermem esse, cui admodum similis erat. Quid quod! ista similitudo adhuc magis crescebat, cum viderem hanc partem, quam chordam dixi, ab utroque latere ad cavitatem pelvis infimam deferri. Nam hic detexi glomer quoddam multis gyris implexum, longissimum, atque tenue, in omnibus plane vermi simillimum. Deferui autem nunc hoc glomer eo animo, ut antea naturam partis distentæ eruerem. Mox autem apparebat, ventriculum atque duodenum in tam vastum atque amplum corpus abiisse. Sed nunc quærenda erat ratio, cur fluida in his partibus contenta, non in ventris cavitatem abiissent, quam positam inveniebam in clauso infimo ostio intestini duodeni. Erat enim duodenum eo loco,



loco, ubi in statu naturali per mesocolon reptans cum ieiuno committitur, abruptum, tumidum, durum atque concretum. Neque videbatur huic parti unquam ieiunum intestinum adnexum fuisse. Nunc rei dubiæ lux quædam affulsit. Adducebar enim statim ad credendum, glomer antea descriptum, nihil aliud esse, quam intestinula a vehementi distensione reliquarum partium in hunc locum protrusa. Neque opinio me fefellit, statim detecto intestino recto. Proximum nunc erat, hoc glomer evolvere, atque intestinum ieiunum quærere: quod etiam in infima parte pelvis situm, atque ita acuminatum inveni, ut crassam acum latitudine non superaret. Dum itaque omnibus vestigiis glomer sequebar: detexi etiam illam chordam, quam supra, colon transversum simulare dixi, pro colo habendam esse. Et ita quidem præternaturalis intestinorum conditio erat comparata! Similem casum frustra apud *Timmermannum* atque *Insfeldtium* quæsi. Proxime huic accedunt observationes, quas Cel. *Roedererus* in *Programmate* Observationes ex cadaveribus infantum morbo-* *sis* sistente prodidit. Cum autem istud programma mihi non ad manus sit, allegabo, quæ in *Vogel's neue medicinische Bibliothek*** excerpta exstant: Die 3te Beobachtung war bei einem Kinde, welches sechs Tage nach der Geburt gestorben, und alle Nahrung sogleich von sich gebrochen: bei diesem war die untere Oefnung des Magens ganz hart und sehr zusammen-

* Göttingæ 1758.

** Vid. 4ter Band p. 365.

sammen gezogen. Ein gleiches Uebel wurde noch bei einem andern Kinde bemerkt.

Reliqua viscera erant sanis simillima, nisi forsitan hepar ingenti magnitudine peccaret. Sed memini, beatum *Meckelium*, optimum meum Praeceptorem, saepius monuisse, hoc in neonatishaud insolitum esse. Sed haftenus anatomia!

Quamvis primi infantis cadaver non secuerim: dubitandum tamen non est, in eo similem perversam structuram partium non peccasse, quam in posteriori culter anatomicus detexit. Nam phaenomena in utrisque; ut ovum ovo, erant similia: sive ad continuos vomitus, vel ad obstructionem alvi, vel denique ad diem mortis attendas. Memorabile sane, quod & infans, cuius descriptionem dedit *Rœdererus*, itidem sextum diem non supervixerit. Quod restat, Physiologis hanc totam observationem perpendendam trado; & praecipue illis, qui statuunt, infantem in utero materno per succum amnii nutriri. Nondum per indefessos anatomicorum labores, *Halleri* * praesertim, vasa lactea in ventriculo, quin & in duodeno potuerunt detegi. Quod si illa desunt: nutritio in his infantibus, sane per os, impossibilis fuit. Sed non ulteriori refutatione opus habet hæc res, quæ egregie a Cl. *Herm. Vogelio* ex variis argumentis est reiecta in *Commentatione physiologica*,
M qua

* Anfangsgründe der Physiologie, 6ter. Band.

*qua fœtum in utero materno non liquore am-
nii, sed sanguine per venam ad venam umbili-
calem advecto nutriri ostenditur. Göttingæ
1761.*





INDEX.

Instituti ratio	-	-	pag. I
Historica cognitio epidemiae Tecklenburgensis, Annor. 1776 — 1780.	-	-	10
I. Pars, quæ febrem epidemicam describit.			
Divisio partis prioris	-	-	17
Stadium morbi primum	-	-	18
Stadium secundum	-	-	21
Stadium tertium	-	-	21
De nonnullis symptomatibus	-	-	45
De nonnullis complicationibus	-	-	45
De nonnullis digressionibus	-	-	56
De crisi, five de naturæ moliminibus	-	-	58
De salubritate febris biliosæ	-	-	61
De methodo medendi	-	-	61
Pars II. describit morbos biliosos anomalos			
De morbis biliosis anomalis generatim	-	-	91
De Febribus biliosis anomalis generatim	-	-	99
De Febre nervosa biliosa	-	-	101
De Febre bullari biliosa	-	-	110
De Febre scarlatina biliosa	-	-	115
De Angina biliosa	-	-	119
De Febre arthritica biliosa	-	-	120
De morbis biliosis anomalis non febrilibus generatim	-	-	128

De Tussi biliosa	-	-	-	133
De Orthopnoea biliosa	-	-	-	141
De Raucitate biliosa	-	-	-	142
De singultu bilioso	-	-	-	143
De Salivatione biliosa	-	-	-	145
De Stupore paralytico unius pedis ex causa biliosa	-	-	-	147
De Anxietatibus præcordiorum ex causa biliosa	-	-	-	150
De Hæmorrhagiis biliosis generatim	-	-	-	154
De Hæmoptysi biliosa	-	-	-	155
De Mictu cruento ex causa biliosa	-	-	-	158
De Hæmorrhoidibus ex causa biliosa	-	-	-	160
De obstructione urinæ ex causa biliosa	-	-	-	161
De morbis mentis ex causa biliosa, & quidem de morositate	-	-	-	166
De Prophylaxi	-	-	-	169
Sectio cadaveris	-	-	-	172

